

Jisas Kraiské Luk kavin kudi

Jisasna jébaaké dé Luk keni kudi kavik

¹⁻³ Némaan du Tiopilas, ménéké wuné kéné kudi kaviyu. Méné kutdéngék. Du las naané wale rate de nak pulak apa jébaa yak. Yadaka nak du wani jébaa batnyé yadaka vétakne wani jébaa yasaakudaka véte de wani jébaaké naanat kudi wakwek. Waga kutdéngte kéga wawo méné kutdéngék. Wupmalemu du wani jébaaké saapéte nyégaba kudi kaviké de mawulé yak. Yate de naanat taale wakwen duna kudi pulak de kudi kavik. Waga méné kutdéngék. De waga yadanké wuné wawo wani muké kaviké wuné mawulé yo. Méné miték kutdéngménuké wuné miték kaviké wuné yo. Wupmalemu apu wani muké miték kutdéngké nae derét wuné waatak. Waate bulaa kutdéngte miték sanévéknwe miték kaviké wuné yo.

⁴ Kaviwuru méné miték kutdéngké méné yo. Wani muké ménat yakwatnyédan kudi wan adél kudi.

Jon yaadéranké dé Gotna kudi kure giyaakwa du wakwek

⁵ Yerot Judiana némaan ban radén tulé Gotna gaba jébaa yakwa nyédé du dé nak rak. Déku yé Sekaraia. Dé Abaisana kembá dé rak. Déku taakwa léku yé Ilisabet lé Eronna kembá lé rak.

⁶ Déknyényba Eron akwi nyédé duna némaan ban dé rak. Re kiyaadéka déku képmawaara wupmalemu de wawo nyédé du de rak. Bét

Némaan Ban Gotna méniba yéknwun mu yakwa du taakwa bét rak. Bét déku apa kudi miték véknwute wadékwa pulak yate bét kapéredi mu las kaapuk yabérén.

⁷ Lé baadi las kaapuk kéraalén. Yaléka bét kapmu bét rak. Baadi kaapuk. Bét gwalepa bétbu yak.

⁸ Nyaa nak Sekaraia béré Gotna gaba nyédé duna jébaa de yak.

⁹ Yate de akwi nyédé du yadan pulak yate de nyédé duna jébaaké kudi bulte de wak, Sekaraia Némaan Ban Gotna gat wulæ yéknwun yaama yakwa mu sérakdu yaatnyé waareduké.

¹⁰ Wadaka dé wulaadéka yéknwun yaama yakwa yaatnyé yadakwa tulé de wupmalemu du taakwa kaapaba jawe téte de Gorét waatak.

¹¹ Waatadaka dé Sekaraia awulaba téte dé vék Némaan Ban Gotna kudi kure giyaakwa du nak yéknwun yaama yaalakwa yaatnyé tékwa jaabéna yéknwun tuwa saknwuba tédéka.

¹² Vétakne kwagénte dé wupmét kapére yak.

¹³ Yadéka dé Gotna kudi kure giyaakwa du déré wak, "Sekaraia, méné wup yamarék. Got ménâ kudi débu véknwuk. Véknwute débu wak, ménâ taakwa Ilisabet du nyaan kéraaluké. Kéraalu méné déku yé Jon waaké méné yo.

¹⁴ Ménâ taakwa wani nyaan kéraalu méné wupmalemu du taakwa wale guné yéknwun mawulé yate dusék takwasék yaké guné yo.

¹⁵ Wani nyaan néwaana biyaaba wekna kwaadu dé Gotna Yaamabi déku mawuléba wulæ téké dé yo. Dé wain gu waagété gu wawo kamarék yaké dé yo.

16 Dé Gotna méniba némaan du raké dé yo. Radu guné déké yéknwun mawulé yate dusék takwasék yaké guné yo. Dé wadu déknyényba Gotké kuk kwayén Isrelna wupmalemu du taakwa de deku Némaan Ban Gotna kudi tépa véknwuké de yo.

17 *Dé Gotna yéba kudi wakwen du Ilaija rate apa yadén pulak, dé rate apa yaké dé yo. Yate dé wadu yaapa deku baadiké tépa yéknwun mawulé yado Gotna kudiké kuk kwayékwa du nak mawulé yate Gotna kudi véknwukwa du taakwa yadakwa pulak yéknwun mawulé yaké de yo. Dé taale yéte wadu du taakwa miték sanévéknwute Némaan Ban yaadéranké raségéké de yo.” Naate dé Gotna kudi kure giyaakwa du wak.

18 Wadéka dé Sekaraia dérét wak, “Yaga pulak ye wuné wani kudi adél yadéranké kudéngké wuné yo, ané taakwa wale gwalepa yatén bege?”

19 Naate wadéka dé Gotna kudi kure giyaakwa du wak, “Wuné Gotna kudi kure giyaakwa duna némaan du nak. Wuna yé Gebriel. Wuné Gotna méniba wuné tu. Téwuréka Got wunat wadék wuné déku kudi kure giyao. Dé wadék wuné wani yéknwun kudi ménat wakweké nae wuné giyaak.

20 Bulaa mé véknwu. Méné wuna kudi kaapuk véknwuménén. Bulaa méné kudi bulmarék raké méné yo. Raménu wakwewurén akwi mu yaaké dé yo. Yaadu wani tulé wuna kudi adél yadu méné tépa kudi bulké méné yo.” Naate watakne dé yék.

21 Du taakwa kaapaba téte Sekaraiaké téségéte

* **1:17:** Mt 11:14, 17:11-13; Mal 4:5, 6

de sanévéknwu wanévéknwuk, dé Gotna kudi buldakwa gat wulae bari yaalamarék yadén bege.

22 Yadaka dé kukba kaapat yaale de wale kudi bulké dé yapatik. Yadéka de kudténgék. Dé Gotna gaba yégon pulak yate dé nak pulak mu dé nak vék. Waga kudténgdaka dé kudi bulké yapatiye dé kudi bulké mawulé yate déku taabat male dé yak.

23 Dé nyaas las re déku jébaa yabutitakne dé déku gayét tépa gwaamale yék.

24 Ye re kukba déku taakwa Ilisabet lé nyaan ték.

25 Téte lé baapmu naktaba léku gaba rak. Rate lé wak, “Déknyényba wuné nyaan kéraamarék yan taakwa rawuréka du taakwa de wunat waséléknék. Yadaka wuné nyékéri yak. Bulaa Némaan Ban Got wunéké mawulé lékte wunat débu kutkalé yak.” Naate lé Ilisabet wak.

Gotna kudi kure giyaakwa du dé Mariat wak-wek

26 Ilisabet nyaan téléka baapmu nak taaba sékét nak taababa kayék nakurak yédéka, Got wadéka dé déku kudi kure giyaakwa du nak déku yé Gebriel dé Nasaretnét giyaak. Nasaret Galiliba dé tu.

27 *Wani tulé taakwa nak léku yé Maria lé waba rak. Déknyényba lé du wale kaapuk kwaalén. Déknyényba léku néwepa Josepna kém wale kudi debu gik, lé kukba Josepké yéluké. Josep déknyényba ran némaan ban Devit déku kémbo dé rak.

* **1:27:** Mt 1:18

28 Got wadéka Gebriel giyae dé Mariat wak, “Nyénéwa rakwa. Némaan Ban Got nyénéké mawulé lékte nyéné wale dé tu.”

29 Naate wadéka wani kudi véknwute wani kudiké kudéngmarék yate wup yate lé sanévéknwu wanévéknwuk.

30 Yaléka dé lérét wak, “Nyéna Maria, wup yamarék yaké nyéné yo. Got nyénéké dé yéknwun mawulé yo. Yate nyénat kutkalé yaké dé yo.

31 *Mé véknwu. Nyéné nyaan te du nyaan nak kérae déku yé Jisas waaké nyéné yo.

32 Dé némaan ban raké dé yo. Apat kapére yasaakukwa ban Got dérét waké dé yo, ‘Méné wuna nyaan.’

Naate watakne Némaan Ban Got wadu déku képmawaara Devit némaan ban rate Judana du taakwaké védén pulak, dé némaan ban rate deké véké dé yo.

33 Dé némaan ban apuba apuba rasaakuké dé yo Isrelna du taakwaké.

Rate deké miték vésaakuké dé yo apuba apuba.”

Naate dé Gebriel wak.

34 *Wadéka lé Maria dérét wak, “Yaga pulak nyaan téké wuné yo, du ramarék yawurékwa bege?”

35 Naate waléka dé wak,
“Gotna Yaamabi nyénéké giyaaké dé yo.
Giyaadu Got nyénéké apa kwayéké dé yo.
Yadu nyaan te kéraaké nyéné yo.

* **1:31:** Mt 1:21 * **1:34:** Mt 1:20

Kéraanyénu wani nyaanké waké de yo, ‘Dé wan yéknwun nyaan. Wan Gotna nyaan.’ Naate waké de yo.

36-37 “Kéni kudi wawo mé véknwu. Got akwi mu yaké dé apa yo. Nyéna kémna taakwa nak Ilisabetké de wak, ‘Wan baadi kéraamarék yakwa taakwa.’ Naate wadaka gwalepa yaléka Got wadék lé nyaan lé tu. Baapmu nak taaba sékét nak taababa kayék nakurak lé nyaan tu.”

38 Naate wadéka lé Maria wak, “Wuné véknwu. Wuné Némaan Ban Gotna jébaa yakwa taakwa. Wunat wakweménén pulak Némaan Ban yaké dé yo. Wan yéknwun.” Naate waléka dé wani du Gotna gayét gwaamale yék.

Maria lé Ilisaberét véké nae lé yék

39 Maria walkamu re gwalmu kawu saakére lé Judana nébuba tékwa gayét nak bari yék.

40 Ye lé Sekaraiana gat wulæ lé Ilisabet wale kudi bulék.

41 Bulléka Ilisabet Mariana kudi véknwuléka léku biyaaba kwaan nyaan dé génék. Géndéka dé Gotna Yaamabi Ilisabetna mawuléba wulæ ték.

42 Tédéka lé némaanba waate lé wak, “Got nyénat débu kutkalé yak. Wan adél. Nyénat kutkalé yadén mu nak taakwat kutkalé yadén mat débu talaknak. Got nyéna biyaaba kwaakwa nyaanét wawo débu kutkalé yak.

43 Nyéné wuna Némaan Banna néwaa nyéné ro. Nyéné wunéké yaanyénén wan yéknwun.

44 Nyéné yae wuné wale kudi bulnyénéka wuné nyéna kudi véknwuréka wuna biyaaba kwaakwa nyaan dusék yate géndéka wuné véknwuk.

45 Nyéné Némaan Ban Gotna kudi miték véknwute nyéné wak, ‘Wakwedén pulak yaké dé yo. Wan adél.’ Waga watakné nyéné yéknwun mawulé yate miték raké nyéné yo.” Waga lé Ilisabet wak.

Mariana gwaaré

46 Maria wani kudi véknwutakne lé gwaaré kéga waak:

47 Wuné yéknwun mawulé yate wuné Némaan Banna yéba kevéréknu.

Got wunat kutkalé yate wunat déku taababa débu taknak.

Taknadénké wuné déké yéknwun mawulé wuné yo.

48-49 *Wuné némaa taakwa kaapuk.

Wuné bakna taakwa rate déku jébaa yakwa taakwa wuné ro.

Rawuréka dé yéknwun mu yasaakukwa ban rate wunéké débu sanévéknwuk.

Sanévéknwute dé apat kapére yakwa ban rate wunat némaa mu débu yak.

Yadénké bulaa, kukba wawo, akwi du taakwa waké de yo, ‘Got Mariat débu kutkalé yak. Wan adél.’

50 *Gotna kudi miték véknwukwa du taakwa deké Got mawulé dé léknu.

Bulaa, kukba wawo, Got waga pulak yakwa du taakwaké mawulé lékgé dé yo.

51 Got apat kapére yate dé wupmalemu apa jébaa dé yo.

* **1:48-49:** Lu 11:27 * **1:50:** Sam 103:13, 17

Dé wadéka deku sépé deku gwalmuké sanévéknwute deku yéba kevérékgwa du taakwa de yaage yu.

52 Dé wadéka kés képmāa nak képmāaba ran némaan du de bakna du de ro.

Dé wadéka bakna du taakwa némaan du taakwa de ro.

53 *Gwalmu yamarék du taakwaké dé yéknwun mu kwayu.

Wupmalemu gwalmu yan du taakwat wadéka de gwalmu yamarék yate bakna de yu.

54-55 *Déknyényba Got dé Ebrayam naana képmawaarat las wawo dé wak, ‘Guné Isrelna du taakwa, gunéké mawulé lékte bulaa, kukba wawo, gunat kutkalé yaké wuné yo.’ Naate watakne wani kudiké sanévéknwute dé déké jébaa yakwa Isrelna du taakwat dé kutkalé yo apuba apuba.

56 Wani gwaaré waga waatakne Maria Ilisabet wale lé rak. Baapmu kupuk re lé léku gat gwammale yék.

Ilisabet lé Jonét kéraak

57 Kukba Ilisabet nyaan kéraaléran tulé yaadéka lé du nyaan kéraak.

58 Kéraaléka Ilisabetna kém léku du taakwa wawo véknwute de lé wale yéknwun mawulé yate dusék takwasék yak. Yate de wak, “Némaan Ban Got yéknwun mu débu yak Ilisabetké.” Naate de wak.

59 *Nyaa nak taaba sékét nak taababa kayék

* **1:53:** Sam 34:10, 107:9

* **1:54-55:** Jen 17:7

* **1:59:** Jen

17:10-12

vétik yédéka nak nyaan de du taakwa yae de jawuk, déku kémna du, ‘Gotna du’ naate, wani nyaanna sépé sékudoké. Jawudaka déku sépé sékwe de wani nyaanna yé Sekaraia waaké de mawulé yak. Sekaraia wan déku yaapaná yé.

60 *Mawulé yadaka lé déku néwaa lé wak, “Aya, kaapuk. Déku yé Jon waaké naané yo.”

61 Naate waléka de lérét wak, “Déknyényba béna kémna duwat wani yé kaapuk waadan.”

62 Naate watakne de déku yaapa Sekaraiat waataak. Sekaraia wekna kudi bulmarék radéka de dérét taabat yate kéga waataak, “Samu yé waaké naané yo dérét?”

63 Naate waatadaka dé taabat yate déké nyéga kwayédoké dé derét wak. Wadéka kwayédaka dé nyégaba kavik, “Déku yé Jon.” Waga kavidéka de akwi sanévéknwu wanévéknwuk.

64 Yadaka déku kudi bari yéknwun yadéka dé Sekaraia tépa kudi bulék. Bulte dé Gotna yéba kevéréknék.

65 Yadéka de wani gayéba ran du taakwa akwi de wupmét kapére yak. Yadaka de wani muké kudi bulkére yék, Judiana nébuba tékwa akwi gayéba.

66 Yadaka wani kudi véknwukwa du taakwa de kutdengék. Némaan Ban Got wani nyaanké dé apa kwayék. Waga kutdengte sanévéknwu wanévéknwute de wak, “Kukba wani nyaan yaga pulak raké dé yo?”

Sekaraia dé gwaaré waak

* **1:60:** Lu 1:13

67 Gotna Yaamabi dé wani nyaanna yaapa Sekaraiana mawuléba wulæ ték. Tédéka dé Gotna kudi kéga wakwek:

68 Naané Isrelna du taakwa, naana Némaan Ban Gotna yéba kevérékgé naané yo.

Naanat kutkalé yaké débu giyaak.

Giyae dé Setenna taababa naanat kéraaké dé yo.

69 Dé débu wak, naanat kutkalé yaran ban apa yate naanéké yaaduké.

Wani ban Gotna jébaa yan du Devit déku kémba yaalaké dé yo.

70-71 *Déknyényba Got wadéka déku yéba kudi wakwen du de keni kudi wakwek, “Naana maama naanéké kélék yakwa du wawo naanat viyaapérekgé mawulé yado Got naanat kéraaké dé yo deku taababa.”

72 *Déknyényba Got dé naana képmawaarat wak, “Wuné gunéké mawulé lékgé wuné yo.

Yate wuné gunat kutkalé yaké wuné yo. Wan adél.”

73-74 *Wani adél kudi Got dé naana képmawaara Ebrayam déku kémét wawo dé wak.

Wadén pulak yate dé naanat kutkalé yate naanat naana maamana taababa kéraaké dé yo.

Kéraadu naané déké wup yamarék yate déké yéknwun jébaa yaké naané yo.

* **1:70-71:** Sam 106:10
22:16-17

* **1:72:** Jen 17:7

* **1:73-74:** Jen

75 Yate naané keni képmaaba rate akwi nyaadéku kudi miték véknwute yéknwun mu male yaké naané yo.

Yate déku méniba miték raké naané yo.

76 *Wani kudi watakne dé Sekaraia déku nyaanét kégä wak:

Méné wuna nyaan, kukba du taakwa ménéké waké de yo, “Némaan Ban Gotna yéba kudi wakwekwa du.”

Naate waké de yo, méné taale yéte Némaan Banna yaabu kutménérän bege.

77 Yate méné déku du taakwat wakweké méné yo, dé yadan kapéredi mu yatnyéputiye derét kérae déku taababa taknadéranké.

78-79 *Wupmalemu du taakwa kapéredi mu yate de gaankétéba de ro.

Rate kukba de yalakgé de yo.

Naana Némaan Ban Got naanéké némaa mawulé lékte débu wak, wadén du déku gayéba re keni képmaat naanéké giyaaduké.

Giyae naanat kérae naanat yéknwun yaabuba taknaké dé yo, naané Got wale nakurak mawulé yate dé wale miték ranoké.

Naate dé Sekaraia wak.

80 *Kukba wani nyaan Jon némaan yadéka déku mawulé miték dé ték. Dé du ramarék taaléba dé rak. Rate dé Isrelna du taakwat Gotna kudi wakwedérän tuléké dé raségék.

* **1:76:** Mt 3:3, 11:10 * **1:78-79:** Mt 4:16; Jo 8:12 * **1:80:** Mt 3:1-6

2*Maria lé Jisasnyét kéraak*

¹ Wani tulé Romna némaan ban déku yé Ogas-tas wupmalemu képmaaba rakwa du taakwaké némaan ban rate dé wak, déku du déku képmaaba rakwa akwi du taakwana yé kavidoké.

² Déknyényba de akwi du taakwana yé kaa-puk kavidan. Wani jébaa batnyé yadaka dé Sairinias Romna némaan banké jébaa yate Siri-na képmaaba dé némaan ban rak.

³ Akwi du taakwa deku néwaaget de yék, deku yé kaviké.

⁴ *Josep Isrelna némaan ban Devitna kém̄ba dé rak. Devitna néwaage wan Betleyem. Betleyem Judiaba dé tu. Josep Galiliba tékwa gayé Nasaret kulaknyéntakne dé déku kém̄na néwaage Betleyemt yék.

⁵ Déku néwepa wadan taakwa wale bét Betleyemt yék, bétku yé kaviké. Wani taakwa léku yé Maria lé nyaan ték.

⁶⁻⁷ Bét ye Betleyem sabababétku wupmalemu du taakwa kwaa gaba radaka ga sékérékdéka taalé kaapuk tén bétaké. Yadéka lé nyaan kéraaké yate lé bulmakawu kwaadakwa gaba wulaak. Wulæ lé maknanyan kéraak. Kéræ lé baapmu wurét kusépmék. Kusépmé bulmakawu kan kwaamba taknaléka dé kwaak.

*Gotna kudi kure giyaakwa du de sipsipké
téségén duwat wakwek*

* **2:4:** Jo 7:42

⁸ Wani gaan du las nak taaléba deku sipsipké de téségék. Wani taalé Betleyem tékwaba dé tu.

⁹ Téségédaka dé Némaan Ban Gotna kudi kure giyaakwa du nak Gotna gayéba giyae tédéka apakélé yaa pulak yaante dé kayénarék. Kayénarédéka véte de wupmét kapére yak.

¹⁰ Yadaka dé Gotna gayéba giyaakwa du derét wak, “Guné wup yamarék yaké guné yo. Mé véknwu. Yéknwun kudi wakweké wunék. Akwi du béré taakwa béré keni kudi véknwute yéknwun mawulé yate dusék takwasék yaké de yo.

¹¹ Bulaa taakwa nak nyaan lébu kéraak Devitna gayéba. Kéraalén nyaan wan gunat Setenna taababa kérae gunat kutkalé yaran ban. Wan Got wadén ban Krais. Wan naana Némaan Ban.

¹² Bulaa ye wani nyaanét véke guné yo. Néwaa baapmu wurét kusépmé bulmakawu kadému kan kwaamba taknalék dé kwao. Ye véte kudéngké guné yo wuna kudi adél yadékwaké.” Naate dé wak.

¹³ Wadéka de Gotna kudi kure giyaakwa wupmalemu du bari giyae de wani ban wale ték. Téte kéga de gwaaré waak:

¹⁴ Got awuré déku gayéba rate miték débu yak.

Déku yéba kevérékno.

Got yéknwun mawulé yadékwa du taakwa miték raké de yo keni képmaaba.

Naate de waak.

Sipsipké téségén du ye de Jisasnyét vék

¹⁵ Wani du waga gwaaré waatakne de derét kulaknyéntakne gwaamale waarék Gotna gayét.

Waarédaka de sipsipké téségén du deku kapmu bulte de wak, “Betleyemét yéno. Ye Némaan Ban wakwedén nyaanké sékale véké naané yo.”

¹⁶ Naate watakne de bari bari yék. Ye gayé saabe de Maria bét Josep, wani nyaanét wawo de vék. Nyaan bulmakawu kadému kan kwaamba dé kwaak.

¹⁷ Nyaanét vétakne de Gotna kudi kure giyaakwa du wani nyaanké wakwedén kudiké de du taakwat wakwek.

¹⁸ Wakwedaka véknwute de akwi kwagénte de wak, “Aki. Wan yaga pulak mu?”

¹⁹ Naate wadaka lé Maria sipsipké téségén duna kudi véknwute lé léku mawuléba sanévéknwu wanévéknwuk.

²⁰ Sipsipké téségén du gwaamale yéte Gotna yéba kevérékte de déké yéknwun mawulé yak. Yate de wak, “Némaan Ban Got naanat kudi wakwedéka véknwutakne naané wani mu akwi naanébu vék.” Naate de wak.

De déku yé Jisas waak

²¹ Nyaa nak taaba sékét nak taababa kayék vétik yédéka nak nyaa de “Gotna du” naate wani nyaanna sépé sékuk. Sékwe de déku yé Jisas waak. Déknyényba Maria nyaan témarék yan tulé Gotna kudi kure giyaakwa du dé wani yé lérét wakwek.

Simion bét Ana bét Jisasnyét vék Gotna gaba

²² Maria nyaan kérae lé Moses wakwen apa kudi wadékwa pulak yaké lé mawulé yak, léku sépé Gotna méniba tépa yéknwun yaduké. Yate nakurak baapmu pulak yédéka lé Josep wale bét

Jerusalemét yék. Némaan Ban Gotké kwayéké nae bét Jisasnyét kure yék Jerusalemét.

23* Némaan Ban Gotna apa kudi nak kéga dé wo, “Taakwa kéraadaran akwi maknadut de Gotké kwayéké de yo.”

24 Némaan Ban Gotna apa kudi nak wawo kéga dé wo, “Du bét taakwa bétku du nyaan Gotké kwayéte bét nyaamiyo vétik viyae déké kwayéké bét yo. Nyaamiyo kwayémárék yate nyaamiyo pulak api kwayéké bét yo.” Maria bét Josep wani kudi wadékwa pulak yaké yate bét Jerusalemét yék.

25 Wani tulé du nak déku yé Simion dé Jerusalemba rak. Dé yéknwun mu male yate dé Gorét waatakwa du dé rak. Got Isrelna du taakwat kutkalé yadéran tuléké dé raségék. Gotna Yaamabi déku mawuléba dé wulæ ték.

26 Déknyényba Gotna Yaamabi dé Simionét wak, “Méné kiyaamarék yate wekna rate méné Némaan Ban Got wadén ban Kraisnyét véké méné yo.” Naate wadéka dé wani muké dé raségék.

27 Gotna Yaamabi déku mawuléba wulæ téte wadéka dé Gotna kudi buldakwa némaa gat wulaak. Wulaadéka bét Jisasna néwepa dérét kure wulaak, Gotna apa kudi wadékwa pulak maknayanét yaké.

28 Kure wulaabétka dé Simion wani nyaanét nyégéle déku taababa kure téte, dé Gotna yéba kevérékte dé kéga wak:

29-30 Némaan Ban, déknyényba waménén kudi bulaa adél dé yo.

* **2:23:** Eks 13:2, 12, 15; Lev 12:8

Bulaa wunébu vék naanat kutkalé yate naanat kérae Gotna taababa taknaran banét.

Bulaa méné ména jébaa yakwa du wunat waménu wuné yéknwun mawulé yate kiyaaké wuné yo.

31 Kéni banét ménébu wak, dé wani jébaa yadu akwi képmaaba rakwa du taakwa védoké.

32* Yaa yaante gaan yaabuba kayénarédékwa pulak keni ban nak gena du taakwana mawuléba kayénaréché dé yo.

Kayénarédu de Gotké miték sanévéknwuké de yo.

Sanévéknwute de Isrelna du taakwa deku yéba kevérékgé de yo.

33 Jisasna néwepa Simion wadén kudiké bét sanévéknwu wanévéknwuk.

34-35* Yabétka dé Simion Gorét waatak, dé bérét kutkalé yaduké. Waatatakne dé nyaanna néwaa Mariat kégé wak:

Mé véknwu. Got débu wak, keni du jébaa yadu Isrelna wupmalemu du taakwa déké kuk kwayédo Isrelna wupmalemu du taakwa déku kudi véknwudoké.

Dé Gotna jébaa yadu wupmalemu du taakwa déké kuk kwayéché de yo.

Kuk kwayédo nak du taakwa deku mawuléché kuttdéngé de yo.

Du las dérét kapéredi mu yado nyéné vényénu nyéna mawulé sépélak génché dé yo.

Naate dé Simion wak.

* **2:32:** Jo 8:12

* **2:34-35:** 1 Ko 1:23; 1 Pi 2:6-8

36-37* Gwalepa taakwa nak léku yé Ana, lé Gotna kudi buldakwa némaa gaba lé rak. Lé Panyuelna takwanyan. Asana kémba lé rak. Lé Gotna yéba kudi wakwekwa taakwa lé rak. Déknyényba lé du rak. Raléka kwaaré nak taaba sékét nak taababa kayék vétik yédéka dé léku du kiyaak. Kiyaadéka lé wupmalemu (84) kwaaré lé kawi taakwa lé rak. Rate lé Gotna kudi buldakwa gaba rak. Rate wani ga kulaknyénymarék yate gaan nyaa lé Got wale kudi bulék. Nak apu nak apu kadémuké yaakétte lé Got wale kudi bulék.

38 Simion kudi wakwebutidéka Josep bét Maria wekna tébétka lé yae wani nyaanét véte lé Gotna yéba kevéréknék. Kevérékte lé Jerusalemba ran du taakwat kudi wakwek, wani nyaanké. Déknyényba Got dé wak, du nak yae derét kutkalé yate derét kérae déku taababa taknadéranké. Déknyényba wadén kudi adél yadékwaké lé Ana wani tuléké raségékwa du taakwat kudi wakwek.

De Nasaretnét de tépa gwaamale yék

39* Némaan Ban Gotna apa kudi wadékwa pulak yabutitakne bét Jisasna néwepa dérét kure bét Nasaretnét tépa gwaamale yék. Nasaret Galiliba dé tu.

40 Wani nyaan némaan ye dé apa yak. Yadéka déku mawulé yéknwun yadéka dé wupmalemu muké kutdéngék. Got dé déké miték véte dérét kutkalé yak.

Jisas dé Gotna kudi buldakwa némaa gaba rak

* **2:36-37:** 1 Ti 5:5 * **2:39:** Mt 2:23

41 Akwi kwaaré Jisasna néwepa bét Jerusalemét yék Pasova waadakwa tuléna kadému kaké.

42 Jisasna kwaaré taaba vétik sékérék maanba kayék vétik yadéka bét dérétkwole de yék, akwi kwaaré yabérén pulak.

43 Kukba Pasova waadakwa tuléna kadému kadan nyaa yédéka de deku gayét yédakwa yaabuba gwaamale yék. Yédaka dé Jisas Jerusalemba dé wekna rak. Radéka déku néwepa kaapuk las kutdéngbérén.

44 Bét bétku mawuléba bét wak, “Jisas ana kém wale dé yu.” Waga wate bét nyaa nak bét yaabuba yék. Ye garabu yaap rate bét yaabuba yén bétku kém bétku du taakwat waatak déké.

45 Waatatakne dérétkwole vémárék yate bét déké sékalék. Sékale sékale bét sékalpatik. Sékalpatitakne bét Jerusalemét gwaamale yék, déké sékale véké.

46 Ye nyaa kupuk bét déké sékalék. Sékale kukba bét vék dé Gotna kudi buldakwa némaa gaba radéka. Dé nak duwat Gotna kudiké yakwatnyékwa némaa du wale rate deku kudi véknwute dé derét kés mu nak muké waatak.

47 Yadéka déku kudi véknwun du de kwagénte sanévéknwu wanévéknwuk, dé miték kutdénge deku kudi miték kaatadén bege.

48 Déku néwepa dérétkwole bét sanévéknwu wanévéknwuk. Yate lé déku néwaa dérétkwole wak, “Wuna nyaan, samuké méné anat waga yo? Ané ménéyaapa wale wup yate ané ménéké gege gayéba sékalék.” Naate lé wak.

49 Waléka dé bérét wak, “Samuké béné wunéké sékalék? Wuné wuna yaapaná gaba rawuréran

wan yéknwun. Kéba rawuréranké kaapuk kutdéngbénén, kapu yaga pulak?"

⁵⁰ Naate wadéka bét wani kudiké las kaapuk miték kutdéngbérén.

⁵¹ Yabétká dé bét wale tépa gwaamale ye de Nasaret saabak. Saabe rate dé bétku kudi véknwute dé wabérén pulak yak. Yadéka déku néwaa wani muké léku mawuléba lé sanévéknwu wanévéknwuk.

⁵² Jisas apa du yadéka déku mawulé yéknwun yadéka dé wupmalemu muké kutdéngék. Got, du taakwa wawo, de akwi déké yéknwun mawulé yak.

3

Gu yaakutaknan du Jon dé kudi wakwek

¹⁻² Taibirias Romba némaan ban wupmalemu (14) kwaaré radéka aniké kwaaré Got dé Jonét kudi wakwek. Wani tulé Taibirias wekna Romba némaan ban radéka Pontias Pailat dé Judiana némaan ban dé rak. Wani tulé Yerot Galiliba rakwa du taakwaké némaan ban radéka, déku némaadu Pilip Ituriaba rakwa du taakwaké, Trakonaitisba rakwa du taakwaké wawo némaan ban radéka Laisenias Abiliniba rakwa du taakwaké dé némaan ban rak. Yadaka Anas bét Kaapas akwi nyédé duna némaan du bét rak. Wani tulé Sekaraiana nyaan Jon du ramarék taaléba radéka Got dé dérétt kudi wakwek.

³*Wakwedéka Jon déku kudi véknwute dé Jordan kaabélé yékwaba yeyé yeyak. Yeyé yeyate dé du taakwat kéga wakwek, "Guné yagunén

* ^{3:3:} Ap 13:24, 19:4

kapéredi mu kulaknyénygunu wuné Gotna yéba gunat gu yaakutaknaké wunék. Guné waga kulaknyéntakne Gotna yéba gu yaakugunu dé guna kapéredi mawulé yatnyéputiké dé yo.” Naate dé Jon wakwek.

⁴*Jon waga yadénké déknyényba Gotna yéba kudi wakwen du déku yé Aisaia Gotna nyégaba kéga dé kavik:

Du nak dé wao du ramarék taaléba.

Waate dé kéga wo, “Némaan Banna yaabu kutké guné yo.

Kutgunu yaabu miték kwaaké dé yo déké.

⁵Akwi kérém sérémké guné yo, yaabu dawulimarék yaduké.

Akwi némaa nébu akwi makwal nébu wawo miték vaaké guné yo, yaabu waárémárék yaduké.

Anygwa yan yaabu kutgunu yaabu kedéng yéké dé yo.

Matu rakwa yaabu matu kéraasolagunu yaabu miték kwaaké dé yo.

⁶Waga yagunu akwi du taakwa véké de yo derét kutkalé yaduké Got wadén banét.”

Wani aja kudi déknyényba Aisaia dé kavik. Du taakwana mawulé miték tédu, de Jisas yaadéranké miték sanévéknudaranké, dé wani kudi kavik.

⁷Du taakwana mawulé miték téduké Jon dé derét kudi wakwek. Wupmalemu du taakwa Jon derét gu yaakutaknaduké yaadaka dé derét kudi wakwek. Kéga dé wak, “Guné kapéredi mawulé yakwa du taakwa guné. Got apakélé kot véknwute

* ^{3:4:} Ais 40:3-5

némaan ban raran nyaaké dé yao. Wani nyaaké Got du taakwa yadan kapéredi muké rékáréka yaké dé yo. Wani nyaaké sanévéknwute guné, du yaawi tudaka yaage yékwa kaabe pulak, guné wunéké yaage yao.

8 *Wunéké yaamarék. Taale guné yagunén kapéredi mu kulaknyéntakne yéknwun mu male yaké guné yo. Yagunu nak du taakwa véte waké de yo, ‘De kapéredi mu kulaknyéntakne bulaa yéknwun mu de yo.’ Naate waké de yo. Guné guna mawuléba guné wo, ‘Naané Ebrayamna képmawaara naané ro. Dé Gotna méniba yéknwun mu yakwa du radék naané wawo Gotna méniba yéknwun mu yakwa du taakwa naané ro.’ Naate wate guné yénaa guné yo. Guné yéknwun mu kaa-puk yagunékwa. Got mawulé yadéran dé wadu kéni matu du ye de Ebrayamna képmawaara pulak raké de yo. Ebrayamna képmawaara ra-gunékwaké Got kaapuk sanévéknwudékwa. Yagunékwa muké dé sanévéknwu.

9 *“Aja kudi nak wakweké wunék. Du sék akumarék yakwa miké sanévéknwute kwajélek kéræe wani mi véléké dé yo. Véle yaaba tuké dé yo. Bulaa wani aja kudiké mé sanévéknwu. Bulaa Got déku kudi véknwumarék yaran du taakwat yadan kapéredi mu yakataké dé yo. Yakatadu de yaa yaansaakukwa taalat yéké de yo.”

10 Jon waga wadéka de déku kudi véknwute wup yate de dérét waatak, “Naané samu yaké naané yo?”

* **3:8:** Ap 26:20; Jo 8:39 * **3:9:** Mt 7:15-20

11 Naate wadaka dé derét wak, “Guné baapmu wut vétik yagunérān, guné baapmu wut las yamarék du taakwaké kwayéké guné yo. Guné kadému taknagunérān, guné kadému yamarék du taakwaké kwayéké guné yo.”

12 *Wani kudi wadéka de takis nyégélkwa du las de déké yaak, dé derét gu yaakutaknaduké. Yae de dérét wak, “Némaan du, méné Gotké méné naanat yawkatnyu. Naané samu yaké naané yo?”

13 Naate wadaka dé derét wak, “Guné Romna gapman gunat wakwen pulak male takis nyégélké guné yo. Yate yéwaa las wawo nyégélmarék yaké guné yo.”

14 Wani kudi wadéka de waariyakwa du las dérét waatak, “Naané yaga pulak? Naané samu yaké naané yo?” Naate wadaka dé derét wak, “Guné du taakwaké apa yate deku yéwaa bakna kéraamarék yaké guné yo. Guné du taakwaké yénaa kudi wakwete deku yéwaa kéraamarék yaké guné yo. Guné jébaa ye nyégélgunérān yéwaaké yéknwun mawulé yaké guné yo.”

15 *Jon waga yate waga wadéka akwi du taakwa sanévéknwu wanévéknwute deku mawuléba de wak, “Jon wan naanat kutkalé yaduké Got wadén ban Krais dé, kapu yaga pulak du dé?”

16 Naate sanévéknwudaka dé Jon derét wak, “Wuné gunat Gotna yéba gu wuné yaakutakno. Wuna kukba yaaran du wan némaan du. Wuné bakna du wuné ro. Déku apa wuna apat dé talaknak. Yaga pulak déku jébaa yaké wuné yo, wuné bakna du rawurékwa bege? Dé némaan

* **3:12:** Lu 7:29 * **3:15:** Jo 3:28; Ap 1:5, 13:25

du radéka wuné déké jébaa yaké wuné yapatiyu, wuné bakna du rawurékwa bege. Wuna kukba yaaran du Gotna Yaamabi gunéké kwayéké dé yo. Guna kapéredi mu kérae yaaba tuké dé yo.

¹⁷ Du wit kérae yéknwun wit sék kéraaké de gériyu. Géritakne de yéknwun wit sék gaba takne de apa yatjado. Yadakwa pulak wuna kukba yaaran du waga yaké dé yo. Dé déku du taakwat kérae kure ye déku gayéba takne, kapéredi mu yan du taakwat kéræ yaansaakukwa yaaba yatjadaké dé yo.”

¹⁸ Jon wani kudi du taakwat wakwete dé Gotna kudi las wawo dé wakwek, deku mawulé miték téduqué.

Yerot wadéka de Jonét raamény gaba taknak

¹⁹ *Galiliba rakwa du taakwana némaan ban Yerot dé déku némaadu wekna radéka dé déku taakwa kéraak. Léku yé Yerodias. Wupmalemu kapéredi mu las wawo dé yak.

²⁰ Yadéka Jon dérét waatidéka Yerot dé keni kapéredi mu wawo dé yak. Dé wadéka déku du de Jonét raamény gaba taknak.

Jon Jisasnyét dé Gotna yéba gu yaakutaknak

²¹⁻²² *Déknyényba Yerot Jonét raamény gaba taknadoké wamarék yadén tulé Jon déké yaan akwi du taakwat dé Gotna yéba gu yaakutaknak. Yaakutakne dé Jisasnyét wawo Gotna yéba gu yaakutaknak. Yaakutaknadéka téte Got wale kudi buldéka nyét kepukadéka dé Gotna Yaamabi nyaamiyo pulak ye dé Jisaské giyaak.

* **3:19:** Mt 14:3-4; Mk 6:17-18 * **3:21-22:** Jo 1:32-34; Mt 17:5; Lu 9:35

Giyaadéka kudi nak Gotna gayéba dé wak, “Méné wuna nyaan. Ménéké wuné mawulat kapére yo. Ménéké wuna mawulé yéknwun dé yo.”

Jisasna képmawaarana yé

²³ Jisas déku kwaaré wupmalemu (30) yadéka dé déku jébaa batnyé yak. Du taakwa de déké wak, “Wan Josepna nyaan.” Naate de wak.

Josep wan Yilaina nyaan.

²⁴ Yilai wan Matatna nyaan.

Matat wan Livaina nyaan.

Livai wan Melkaina nyaan.

Melkai wan Janaina nyaan.

Janai wan Josepna nyaan.

²⁵ Josep wan Matataiasna nyaan.

Matataias wan Emosna nyaan.

Emos wan Neamna nyaan.

Neam wan Eslaina nyaan.

Eslai wan Nagaina nyaan.

²⁶ Nagai wan Meatna nyaan.

Meat wan Matataiasna nyaan.

Matataias wan Semenna nyaan.

Semen wan Josekna nyaan.

Josek wan Jodana nyaan.

²⁷ Joda wan Joananna nyaan.

Joanan wan Resana nyaan.

Resa wan Serababelna nyaan.

Serababel wan Sialtielna nyaan.

Sialtiel wan Neraina nyaan.

²⁸ Nerai wan Melkaina nyaan.

Melkai wan Edaina nyaan.

Edai wan Kosamna nyaan.

Kosam wan Elmadamna nyaan.

Elmadam wan Erna nyaan.
²⁹ Er wan Josuana nyaan.
Josua wan Eliesana nyaan.
Eliesa wan Jorimna nyaan.
Jorim wan Matatna nyaan.
Matat wan Livaina nyaan.
³⁰ Livai wan Simionna nyaan.
Simion wan Judana nyaan.
Juda wan Josepna nyaan.
Josep wan Jonamna nyaan.
Jonam wan Elaiakimna nyaan.
³¹ Elaiakim wan Meliana nyaan.
Melia wan Menana nyaan.
Mena wan Matatana nyaan.
Matata wan Netanna nyaan.
Netan wan Devitna nyaan.
³² Devit wan Jesina nyaan.
Jesi wan Obetna nyaan.
Obet wan Boasna nyaan.
Boas wan Salmonna nyaan.
Salmon wan Nasonna nyaan.
³³ Nason wan Aminadapna nyaan.
Aminadap wan Atminna nyaan.
Atmin wan Anaina nyaan.
Anai wan Yesronna nyaan.
Yesron wan Peresna nyaan.
Peres wan Judana nyaan.
³⁴ Juda wan Jekopna nyaan.
Jekop wan Aisakna nyaan.
Aisak wan Ebrayamna nyaan.
Ebrayam wan Tirana nyaan.
Tira wan Neyona nyaan.
³⁵ Neyo wan Serakna nyaan.

Serak wan Reuna nyaan.
 Reu wan Pelekna nyaan.
 Pelek wan Ebena nyaan.
 Ebe wan Selana nyaan.
³⁶ Sela wan Kenanna nyaan.
 Kenan wan Apaksatna nyaan.
 Apaksat wan Siemna nyaan.
 Siem wan Noana nyaan.
 Noa wan Lamekna nyaan.
³⁷ Lamek wan Metusalana nyaan.
 Metusala wan Inokna nyaan.
 Inok wan Jaretna nyaan.
 Jaret wan Mayalalelna nyaan.
 Mayalalel wan Kenanna nyaan.
³⁸ Kenan wan Inosna nyaan.
 Inos wan Setna nyaan.
 Set wan Adamna nyaan.
 Adam wan Gotna nyaan.

4

Seten dé Jisasna mawulé yaknwuk

¹ Gotna Yaamabi Jisasna mawuléba wulae téte apa yate wadéka dé Jodan kaabélé kulknyénytakne dé yék. Yédéka Gotna Yaamabi dé dérétt kérae kure yék du ramarék taalat.

² Kure yédéka dé wani taaléba wupmalemu (40) nyaa radéka dé Seten déku mawulé yaknwuk. Wani tulé dé kadému las kaapuk kadén. Yadéka wani nyaa yédéka kukba dé Jisasnyét kaadé yak.

³ Yadéka dé Seten dérétt wak, “Méné kéga méné wo, ‘Wuné Gotna nyaan.’” Naate wate bulaa

wani muké wunat wakwatnyéké méné yo. Méné waménu kényi matu walaakwe kadému yaké dé yo.

4 *Yadu wuné ménéké kudténgké wuné yo.” Naate wadéka dé wak, “Aya kaapuk. Wani muké kényi kudi Gotna nyégaba dé kwao: Du taakwa kadémuké male sanévéknwute de miték ramarék yaké de yo. Wani kudi véknwute matu kadému yaduké wamarék yaké wuné yo.”

5 *Jisas wani kudi wadéka Seten dérét dé kérae kure waarek. Kure waare dé dérét kényi képmaaba tékwa akwi gayé bari wakwatnyék.

6 Wakwatnyéte dé dérét wak, “Got kusékétdék kényi képmaaba tékwa akwi gayé, wani gayéba rakwa akwi du taakwa akwi gwalmu wawo wan wuna taababa de ro. Wuné wani mu duké nak kwayéké mawulé yawuréran wuné wani duké kwayéké wuné yo, dé deké némaan ban raduké. Wuné wani mu ménéké kwayéké wuné yo.

7 Méné kwati yaane wunéké waadé daate wuna yéba kevérékménéran wuné ménéké kwayéké wuné yo. Kwayéwuru méné deké némaan ban raké méné yo.”

8 *Naate wadéka dé wak, “Aya kaapuk. Kényi kudi Gotna nyégaba dé kwao: Ména némaan ban wan Got male. Méné déké waadé daate dérét waataké méné yo. Déku yéba male kevérékgé méné yo.

Wani kudi véknwute wuné ménéké waadé daamarék yaké wuné yo. Yate ména yéba kevérékmárék yaké wuné yo.”

* **4:4:** Diu 8:3

* **4:5:** Jo 12:31, 14:30

* **4:8:** Diu 6:13

9 Jisas wani kudi wadéka Seten dé dérét kéræe kure yék Jerusalemét. Kure waare dérét dé Gotna kudi buldakwa némaa gana madulba taknak. Takne dé dérét wak, “Méné kéga méné wo, ‘Wuné Gotna nyaan.’ Naate wate méné mé akére dawuli.

10-11 *Wani muké keni kudi Gotna nyégaba dé kwao:

Got déku kudi kure giyaakwa duwat wadu de ménéké miték véké de yo.

Méné deku taababa miték raké méné yo.

Rate ména sépékwaapa matuba viyaamarék yaké méné yo.

Ména maan wawo matuba viyaamarék yaké méné yo.

Méné wani kudi véknwute akére dawuliye miték raménu akwi du taakwa véte kutdéngké de yo. Méné Gotna nyaan.”

12 *Naate wadéka dé wak, “Aya kaapuk. Wani muké keni kudi Gotna nyégaba dé kwao: Got wan ména Némaan Ban. Dé apa yate ménat kutkalé yaduké méné waagété yakwa du pulak yamarék yaké méné yo. Wani kudi véknwute wuné akére dawulimarék yaké wuné yo.”

13 *Naate wadéka dé Seten nak jébaa yaduké Jisasnyét kaapuk wadén. Yate dérét kulaknyénytakne dé wak, “Nak nyaa gwaamale yaaké wuné yo. Sal nak apu dé wuna kudi véknwuké dé yo?” Naate watakne dé yék.

Jisas Galiliba dé batnyé jébaa yak

* **4:10-11:** Sam 91:11-12 * **4:12:** Diu 6:16 * **4:13:** Yi 2:18, 4:15

14 Gotna Yaamabi Jisasna mawuléba téte apa yadéka dé Galilit tépa gwaamale yék. Yédéka wani képmaaba tékwa akwi gayéba de du taakwa déké kudi bulék.

15 Dé Gotna kudi buldakwa gat wulae du taakwat dé Gotna kudi wakwek. Wakwedéka de akwi Jisasna yéba kevéréknék.

Nasaret de Jisaské kuk kwayék

16 Jisas waga yate dé Nasaretnét yék. Déknyényba makwal baadi rate dé néwepa wale wani gayét yék. Ye wani gayéba re dé némaan du yak. Ye kulaknyéntakne dé yék. Wani tulé Nasaretnét gwaamale ye dé wani gayéba rak. Rate yaap ra nyaa dé Gotna kudi buldakwa gat wulaak. Akwi yaap ra nyaa wulaadén pulak ye dé Gotna kudi buldakwa gat wulaak. Wulae re dé Gotna kudi nyégaba véte wakweké nae dé ték.

17 Tédéka de Gotna yéba déknyényba kudi wakwen du Aisaia kavin nyéga déké kwayék. Kwayédaka laapiyakne dé vék kéri kudi kavitaknadéka. Véte dé derét kéga wakwek:

18 *Némaan Ban Got wunat débu wak, wuné déku kudi gwalmu yamarék du taakwat wakwewuruké.

Watakne déku Yaamabi tiyaadék dé wuna mawuléba wulae tu.

Got wunat débu wak, wuné yae kéri kudi derét wakwewuruké.

De raamény ga pulakba kwaakwa du taakwa bulaa miték raké de yo.

De méni kiyaan pulak yan du taakwa bulaa miték kudéngké de yo.

* **4:18:** Ais 61:1-2

Kaagél kutkwa du taakwa tépa kaagél kutmarék yaké de yo.

¹⁹ Bulaa Némaan Ban Got du taakwat kutkalé yaké dé yo.

²⁰ Jisas waga wakwetakne wani nyéga kusépmé dé wani gaké téségékwa duké kwayék. Kwayétakne wani kudiké derét yakwatnyéké nae dé rak. Radéka wani gaba rakwa akwi du taakwa de dérét male vék.

²¹ Védaka dé derét wak, “Bulaa Gotna nyégaba kwaakwa kudi adél débu yak. Yadéka gunébu véknwuk.”

²² Naate wadéka de wani kudi véknwute de kwagénte déku kudiké sanévéknwu wanévéknwuk. Yate de wak, “Aki. Wan yéknwun kudi dé wakweyo.” Naate watakne de wak, “Wani du wan Josepna nyaan. Yaga pulak dé wani yéknwun kudi wakweyo?”

²³ De waga wadaka dé Jisas derét wak, “Sal guné saaki wagunékwa kudi wunat kéga waké guné yo? ‘Dokta, méné ména sépat kutkalé yaké méné yo.’ Waga wate sal guné kéga wawo waké guné yo? ‘Kapaneamba yaménén jébaaké naanébu véknwuk. Yaménén pulak méné ména néwaageba rate waga male yaké méné yo.’ Naate wagunérán kudi kéga wuné kaato.

²⁴ Gunat wuné wakweyo. Gotna yéba kudi wakwekwa du deku néwaageba rate kudi wak-wedaka deku néwaageba rakwa du taakwa deku kudi véknwumuké kélik de yo. Adél wuné gunat wo.

²⁵ *Mé véknwu. Déknyényba Gotna yéba kudi

* ^{4:25:} 1 Kin 17:1-18:1

wakwekwa du Ilaija radéka Isrelba wupmalemu dukiyaataakwa de rak. Wani tulé kwaaré kupuk baapmu las wawo radaka maas kaapuk viyan. Yadéka akwi gayé apakélé kaadé wale de rak.

26 Radaka Got Ilaijat kaapuk wadén, dé ye Isrelba rakwa dukiyaataakwat kutkalé yaduké. Got Ilaijat dé wak, dé ye nak képmaaba rakwa dukiyaataakwat nak kutkalé yaduké. Lé Saidonba tékwa gayé déku yé Sarepatba lé rak.

27 *Kéni kudi wawo mé véknwu. Gotna yéba kudi wakwekwa nak du déku yé Ilaisa radéka wupmalemu lepéro yan du Isrelba de rak. Radaka Ilaisa derét kaapuk kutnébuldén. Nakurak dut male dé kutnébulék. Wani du wan Siriana képmaaba yaan du nak déku yé Neman. Wan Isrelna du kaapuk.”

28 Gotna kudi buldakwa gaba ran du taakwa Jisas wakwen kudi véknwutakne de kutdéngék. Jisas waga wakwete derét dé waatik. Waga kutdéngte de rékarékat kapére yak.

29 Yate raapme de Jisasnyét kulékiye gayé kulaknyéntakne kaapat tébétsagwadék. Deku gayé awuré nébuba dé nak tu. Jisasnyét tébétsagwadéte de dérét wani nébuba tén tépaat kure yék. Dérét tépaaba yatjadaké nae de dérét wanét kure yék.

30 Kure ye waga yaké de yapatik. Dé deku nyédéba ye derét kulaknyéntakne dé yék.

Jisas wadéka dé kutakwa kure tén du yéknwun yak

* **4:27:** 2 Kin 5:1-14

31 Jisas dé Kapaneamét dawulik. Wani gayé Galiliba dé ték. Dawuliye saabe dé rak. Rate yaap ra nyaa dé Gotna kudi buldakwa gat wulae dé du taakwat Gotna kudiké yakwatnyék.

32 Apa yate dé derét Gotna kudi wakwek. Waga wakwedéka de véknwute kwagénte de déké sanévéknwu wanévéknwuk.

33* Yadaka dé kutakwa kure tékwa du nak rak wani gaba. Radéka lé kutakwa némaanba waak.

34 Waate lé wak, “Méné Nasaret ban Jisas. Méné naanat samu yaké méné yaak? Naanat yaalébaanké méné yaak, kapu yaga pulak? Wuné ménat wuné kutdéngék. Méné Gotna yéknwun du.”

35 Naate waléka dé wak, “Nyéné kudi bulmarék. Wani dut kulaknyéntakne mé yaage yé.” Naate wadéka lé wani dut takubalaakuléka dé képmaaba akérék. Akérédéka lé dérét yaalébaanmarék ye dérét kulaknyéntakne lé yék.

36 Yéléka akwi du taakwa véte kwagénte deku kapmu bulte de wak, “Aki. Kéni du samu kudi dé wakweyo? Dé apa yate du taakwa kure tékwa kutakwat wadéka de wani du taakwat kulaknyéntakne de yu.”

37 Naate wadaka de wani képmaaba tékwa akwi gayéba Jisaské kudi wakwekéreyék.

Jisas dé Pitana naakumat kutnébulék

38 Jisas Gotna kudi buldakwa ga kulaknyéntakne dé Saimonna gat wulaak. Saimonna naakuma apakélé kiyakiya yadéka

* **4:33:** Mt 8:28-29; Jo 6:69; Lu 8:28

lé kwaak. Kwaaléka de Jisasnyét wak, dé yae lérét kutnédébulduké.

³⁹ Wadaka wulæ lé kwaan wale téte wadéka dé kiyakiya kaapuk yak. Yadéka wani taakwa bari raapme lé kadému kawu saakére deké kwayék.

Wupmalemu du taakwat Jisas dé kutnédébulék

⁴⁰⁻⁴¹* Garabu nyaa dawulidéka yaap ra nyaa yédéka de kiyakiya yakwa du taakwa baadi, sépékwaapa kapére yan du taakwa baadi, kutakwa kure tén du taakwa baadir wawo de Jisaské kure yék. Kure yédéka dé déku taabat wani du taakwa baadir kudéka de tépa yéknwun yak. Yadaka dé kutakwat wadéka de wupmalemu du taakwat kulaknyényék. Kulaknyényte de waak, “Méné Gotna nyaan.” Naate waate de kudéngék. Dé Got wadén ban Krais dé. Waga kudéngdaka dé derét némaanba wak, de wani muké kudi wakwemarék yadoké. Wadéka de yaage yék.

Jisas yeyé yeyate dé Gotna kudi wakwek

⁴² Ganbaba raapme dé Jisas wani gayé kulaknyéntakne dé du ramarék taalat yék, Got wale kudi bulké. Yédéka de du taakwa déké sékalte de déké yék. Ye dérét véte de wak, “Méné naané wale raké méné yo. Nak gayét yémarék yaké méné yo.”

⁴³ Naate wadaka dé derét wak, “Wuné nak gayét ye Gotna kudi wakweké wuné yo, Got némaan ban rate du taakwaké védéranké. Got wani jébaa yawuruké nae wadék wuné yaak.”

⁴⁴ Naate watakne Galilina képmaa kulaknyéntakne ye dé Judiana képmaaba yeyé

* **4:40-41:** Mt 8:29; Mk 3:11-12

yeyate dé Gotna kudi buldakwa gaba Gotna kudi du taakwat wakwek.

5

Jisas dé wak du las dé wale yédoké

¹ Nak nyaa Jisas Genesaretna kwawu nak maaléba tédéka de wupmalemu du béré taakwa béré yae jawe dé wale de ték, Gotna kudi véknwuké.

² Téte dé vék bot vétik kwawu maaléba rabétka. Gukwami wurékwa du taknaba bot kulaknyéntakne de laaké yakutnyék. Yakutnyédaka deku bot vétik rabétka dé vék.

³ Véte dé botba nak waarek. Wani bot wan Saimonna bot. Waare rate dé Saimonét wak, dé bot yaanésapmédu walkamu yéluké. Wadéka waga yadéka dé awulaga botba rate dé maaléba tén du taakwat Gotna kudiké yakwatnyék.

⁴ *Kudi wakwebutitakne dé Saimonét wak, “Bot mé nyédé kwawut kure wulæ méné ménæ du wale guné laaké yatjade guné gukwami las wuréké yo.”

⁵ Naate wadéka dé wak, “Némaan Ban, bulaa gaan naané apa jébaa naané yak. Yate naané gukwami las kaapuk wurénan. Waménénké sanévéknwute wuné laaké tépa yatjadaké wuné yo.”

⁶ Waga watakne laaké yatjade de wupmalemu gukwami wurék. Wurédaka laaké périkgé nae dé yak.

⁷ Yadéka de nak botba ran duwat waak, de yae derét kutkwedoké. Waadaka yaadaka de bot

* ^{5:4:} Jo 21:2-6

vétikba gukwami kéraasagwadék. Yadaka bét bot vétik guba dawuliké nae yak.

8:10 Yadéka véte wupmalemu gukwami wurédanké sanévéknute dé Saimon Pita kwagénék. Dé wale botba ran du wawo de kwagénék. Sebedina nyaan vétik Jems bét Jon bét wawo bét kwagénék. Bét Saimon wale bét jébaa yak. Kwagénte dé Saimon Jisasna maan wale kwati yaane dé dérét wak, “Némaan Ban, méné wunat kulaknyéntakne yéké méné yo. Wuné wale ramarék yaké méné yo, kapéredi mu yakwa du rawurékwa bege.” Naate wadéka dé dérét wak, “Méné wup yamarék. Méné gukwami kutménén pulak méné wuna jébaa yate méné du taakwat kéraaké méné yo, de wuna jébaaba yaaladoké.”

11 Naate wadéka de botba maalat ye maaléba tébétsawurétakne de deku akwi gwalmu kulaknyéntakne de dé wale yék.

Jisas wadéka dé lepéro yan du yéknwun yak

12 Jisas ye dé gayéba nak rak. Wani gayéba lepéro yan du dé nak rak. Wupmalemu waasé dé ték déku sépéba. Wani du Jisasnyét véte dé yae kwati yaane waadé daate dé dérét wak, “Némaan Ban, wuné yéknwun yawuruké méné mawulé yaménérān méné waménu wuné yéknwun yaké wuné yo.”

13 Naate wadéka dé dérét taabat kutte dé wak, “Wuné yéknwun yaménuké wuné mawulé yo. Méné yéknwun yaké méné yo.” Naate wadéka dé wani lepéro kaapuk yadéka dé wani du yéknwun yak.

14 *Yadéka dé dérét wak, “Mé véknwu. Ménat yawurén muké nak duwat wakwemarék yaké méné yo. Méné Gotna kudi buldakwa gaba jébaa yakwa nyédé duké ye déku méniba témenú dé ména sépat véké dé yo. Védu méné yéknwun yaménénké méné Moses déknyényba wakwedén pulak Gotké kwaami kwayéké méné yo. Kwayéménú nak du taakwa véte lepéro kaapuk yadéka méné yéknwun yaménénké kutdéngké de yo.” Naate wadéka dé yék.

15 Jisas waga yadéka gege gayéba wupmalemu du taakwa de déku apaké kudi bulék. Bulte wupmalemu du béré taakwa béré de Jisaské yaak, Gotna kudi véknwute Jisasnyét waatado dé sépékwaapa kapére yan du taakwat kutnébulduké.

16 *Yaadaka dé wupmalemu apu derét kulaknyéntakne dé du ramarék taalat ye waba dé Got wale kudi bulék.

Jisas wadéka dé maan kapére yan du yéknwun yak

17 Nak nyaa dé Jisas du taakwat Gotna kudiké yakwatnyédéka de Parisina du las, apa kudiké kutdéngkwa du las, waga de rak. Wani du Galilina képmaaba tékwa akwi gayé, Jerusalem, Judiana képmaaba tékwa nak gayé wawo, wani gayéba de yaak. Yae radaka dé Némaan Ban Gotna apa Jisasna mawuléba wulae tédéka dé kiyakiya yakwa du taakwa, sépékwaapa kapére yan du taakwat wawo dé kutnébulék.

* **5:14:** Lev 14:1-4; Lu 17:12-14 * **5:16:** Mk 1:35

18 Yadéka du las de maan taaba kapére yan dut nak jaabéba yaate yaak. Yaate yae de gat wulæ Jisas ténbæ taknaké de mawulé yak.

19 Yadaka wupmalemu du taakwa tédaka taalé dé sékéréknék. Sékérékdéka dérét kure wulaadaran yaabu kaapuk kwaan. Yadéka gaba waare de ga nak nyédé péraak. Pérae de wani du kwaadén jaabéba baagwi lékiye de wani yaabuba kusadak du taakwana nyédéba. Kusade de Jisasna ménibæ taknak.

20 *Taknadaka Jisas dé kutdéngék. De deku mawuléba de wak, dé wani dut kutnëbulké apa yadéranké. Waga kutdénge dé wani dut wak, “Wuna du, wuné yaménén kapéredi mu wunébu yatnyéputik.”

21 Jisas wani kudi wadéka de apa kudiké kutdéngkwa du, Parisina du wawo waga de deku kapmu bulte de wak, “Wani du wan yaga pulak? Got kapmu du yadan kapéredi mu yatnyéputiké dé yo. Wani du dé wak, ‘Wuné yadén kapéredi mu wunébu yatnyéputik.’ Naate wate dé Gorét waséléknu, bakna du bege.”

22 Naate wadaka Jisas deku mawulé kutdénge dé derét wak, “Samuké guné guna mawuléba waga sanévéknwu? Waga yamarék yaké guné yo.

23-24 Wuné Akwi Du Taakwana Nyaan keni képmaaba rate yadan kapéredi mu yatnyéputiké wuné apa yo. Guné wani muké kaapuk kutdénggunén. Yadén kapéredi mu yatnyéputiwurénké wakwete bakna kudi wuné wakwek, kapu némaa kudi wuné wakwek? Dé

* **5:20:** Mt 8:13

raapme yéduké wawuréran wan némaa kudi wakweké wuné yo, kapu yaga pulak? Guné wuna apaké miték kutdénggunuké wuné wani kudi bulaa dérét wakweké wuné yo.” Naate watakne dé maan kapére yan dut wak, “Méné raapme ména jaabé kéræe kure méné ména gat yéké yo.”

²⁵ Naate wadéka dé akwi du taakwana méniba bari raapmék. Raapme dé kwaadén jaabé kéræe Gotna yéba kevérékte dé déku gat kure yék.

²⁶ Yédéka véte de akwi du taakwa kwagénék. Kwagénte Gotna yéba kevérékdaka deku mawulé géndéka de wak, “Aki. Bulaa nak pulak apa mu naanébu vék.”

Jisas dé Livait wak dé wale yéduké

²⁷ Kukba Jisas ye dé vék takis nyégélén du nak takis nyégéldékwa gaba radéka. Wani duna yé Livai. Véte dé Jisas dérét wak, “Méné wuné wale mé yaa.”

²⁸ Naate wadéka dé raapme akwi gwalmu kulknyéntakne dé Jisas wale yék.

²⁹ Livai ye dé Jisaské apakélé kadému séraknék déku gaba. Séraktakne wadéka de takis nyégélkwa wupmalemu du, kapéredi mu yakwa nak wupmalemu du, Jisasna du wawo, waga de bét wale kadému kak.

³⁰ Kadaka de Parisina du las, deku jébaaba wulæ apa kudiké kutdéngén du las, waga de Jisasna duwat waatite de wak, “Samuké guné takis nyégélén du, kapéredi mu yakwa du las wawo, de wale guné kadému gu ko?”

31 Naate wadaka dé Jisas derét aja kudi kéga wak, “Yéknwun yakwa du taakwa doktaké kaapuk yédakwa. Sépékwaapa kapére yan du taakwa de doktaké yu. Yédaka dokta dé deku sépé kutnébulu.”

32 Naate watakne dé wak, “Wuné du taakwana kapéredi mawulé wuné kutnébulu. Kapéredi mawulé yakwa du taakwa yadan kapéredi mawulé kulaknyéntakne wunéké yae wuna kudi véknwudoké wuné giyaak. Yéknwun mawulé yakwa du taakwaké kaapuk sanévéknwurén.” Naate dé Jisas derét wak.

Kadémuké yaakétdakwaké dé Jisas kudi wakwek

33 Du las yae de Jisasnyét wak, “Gu yaakutakanwa du Jonna du de Got wale kudi bulké yate wupmalemu apu de kadémuké yaakéru. Yaakétté bakna rate de Got wale kudi bulu. Parisina du waga male de yo. Ména du waga kaapuk yadakwa. De akwi nyaa de kadému gu ko. Samuké ména du de kadémuké yaakétmarék yo?”

34 Naate wadaka dé Jisas derét aja kudi kéga wakwek, “Du nak taakwa yaké yadu de kadému sérakne yéknwun mawulé yate kadému kaké de yo, kapu du nak wadu de kadémuké yaakétké de yo? De kaké de yo. Taakwa yaran du de wale radu de yéknwun mawulé yate kaké de yo.

35 Kukba de nak du yae wani dut kure yédo wani tulé de déku du taakwa déké mawulé lékte kadému kamarék yaké de yo. Wuné wuna du wale wekna rawuréka de yéknwun mawulé yate kadému de ko.”

36 Wani kudi watakne dé derét aja kudi vétik wawo kéga wakwek: “Du taakwa kulé baapmu wut nak taakwi kéræ jégwaa baapmu wutba tékwa yaabuba kaapuk takne kétaapadakwa. De kulé baapmu wut nak taakwi kéræ jégwaa baapmu wutba tékwa yaabuba takne kétaapadarán kulé baapmu wut jégwaa baapmu wut véteti gétyiaaké bét yo. Kulé baapmu wut nak taakwi jégwaa baapmu wutba miték kwaamarék yaké dé yo.

37 Déknyény kwaaré viyae putidan meme sépéba kulé wain gu kaapuk wuknasadadarán kulé baapmu wutba tékwa yaabuba takne kétaapadarán kulé baapmu wut jégwaa baapmu wut véteti gétyiaaké bét yo. Kulé baapmu wut nak taakwi jégwaa baapmu wutba miték kwaamarék yaké dé yo.

38 Kulé meme sépéba wuknasadadarán kulé baapmu wutba tékwa yaabuba takne kétaapadarán kulé baapmu wutba tékwa yaabuba takne kétaapadarán kulé baapmu wut jégwaa baapmu wut véteti gétyiaaké bét yo.

39 Déknyényba yadan wain gu kakwa du taale de kulé wain gu kamuké kélík yaké dé yo. Yate de wo, ‘Déknyényba yadan wain gu wan yéknwun.’ Naate wate de déknyényba yadan muké mawulé yo.” Waga dé aja kudi wakwek, déknyényba ran duna kudi véknwukwa du déku kulé kudiké kélík yadaranké.

6

Yaap ra nyaaké dé Jisas kudi wakwek

1 Yaap ra nyaa nak dé Jisas déku du wale de wit tékwa képmaaba nak yék. Yéte déku duwat kaadé yadéka de wit kubu las sékwe de deku taabat géríte de wit sék kak.

2 *Kadaka de Parisina du las véte de derét wak, “Guné wit kubu sékwe taabat gériyu yaap ra nyaa. Naana apa kudi kéga dé wo, ‘Guné yaap ra nyaa jébaa yamarék yaké guné yo.’ Wani apa kudi kaapuk véknwugunékwa. Guné wit kubu sékwe taabat gériye guné jébaa yo, yaap ra nyaa. Wan kapéredi mu guné yo.”

3-4 *Naate wadaka dé derét wak, “Déknyényba naana képmawaara Devit yadén muké de Gotna nyégaba kavik. Wani kudiké guné kaapuk sanévéknwugunékwa. Déknyényba Devit déku du wale kaadé yadéka dé Gotna kudi buldakwa gat wulæ wani gaba jébaa yakwa nyédé duwat dé waatak, Gotké kwayéte taknadan kadému deké kwayédoké. Waatadéka kwayédaka Devit wani kadému déku duké kwayédéka de akwi de kak. Waga yate de naana apa kudi kaapuk véknwudan. Naana apa kudi kéga dé wo, ‘Gotna gaba jébaa yakwa nyédé du male Gotké kwayédan kadému kaké de yo. Nak du wani kadému kamarék yaké de yo.’ Naate wadéka Devit déku du wale waga yadaka guné deké kéga kaapuk wagunékwa, ‘Wan kapéredi mu de yak.’ Naate wamarék yate samuké guné naanéké guné kéga wo? ‘Guné naana apa kudi véknwumarék yate kapéredi mu guné yak.’ Guné waga wate guné kaapuk miték kutdénggunén.”

5 Naate watakne dé derét wak, “Wuné Akwi Du Taakwana Nyaan wuné yaap ra nyaaké némaan ban wuné ro. Wuné du taakwana jébaaké kusékétwuru de kusékétwurén pulak yaké de yo,

* **6:2:** Eks 20:10

* **6:3-4:** 1 Sml 21:3-6

yaap ra nyaa.” Naate dé Jisas wak.

Yaap ra nyaa Jisas wadéka dé taaba léknén du yéknwun yak

6 Nak apu, yaap ra nyaa dé Jisas Gotna kudi buldakwa gat wulae dé du taakwat Gotna kudiké yekwatyék. Wani gaba yéknwun tuwa taaba léknén du dé nak rak.

7 *Radéka de apa kudiké kutdéngkwa du, Parisina du wawo, wani gaba waga rate de Jisasnyét vék. Deku mawuléba de wak, “Jisas yaap ra nyaa wani dut kutnébulké dé yo, kapu kaapuk? Dérét kutnébuldéran dé naana apa kudiké kuk kwayéké dé yo. Waga yadérən naané dérét kotimké naané yo.”

8 Naate wadaka déku kapmu dé deku mawulé kutdéngék. Kutdéngte dé taaba léknén dut wak, “Mé raapme méné kéba téké yo.” Naate wadéka dé raapme dé waba ték.

9 *Tédéka dé Jisas derét wak, “Wuné gunat kudi nak waataké wunék. Naana apa kudi yaga dé wo? Yaap ra nyaa naané yéknwun mu yaké naané yo, kapu kapéredi mu yaké naané yo? Yaap ra nyaa kiyaaké yakwa du taakwat kutkalé yaké naané yo, kapu derét viyaapérekgé naané yo?”

10 Naate watakne derét nak nak vétakne dé wani dut wak, “Ména taaba mé kedéng.” Naate wadéka dé déku taaba kedéngdéka dé tépa yéknwun yak.

* **6:7:** Lu 14:1-5 * **6:9:** Jo 7:23

11 *Yadéka de rékarékat kapére yak. Yate de deku kapmu bulte de wak, “Naané Jisasnyét samu yaké naané yo?” Naate de wak.

Jisas dé wak de déku kudi kure yékwa du radoké

12 Wani tulé dé Jisas Got wale kudi bulké nae dé nébat waarék. Waare gaan dé Got wale kudi bulék. Wekna kudi buldéka dé yé téknék.

13 Yé tékdéka nyaa yaaladéka dé déku duwat waadéka de yaak. Yaadaka dé du taaba vétik sékérékne maanba kayék vétik waga derét dé wak, de déku kudi kure yékwa du radoké.

14 *Deku yé kéga.

Saimon. Déké Jisas dé nak yé kwayék, Pita.

Saimonna wayéknā, Andru.

Jems.

Jon.

Pilip.

Batolomyu.

15 Matyu.

Tomas.

Alpiasna nyaan, Jems.

Saimon. Dé déknyényba gege gayét yéte dé wak, “Nak képmaana du naanéké némaan du ramuké kélék wuné yo.”

16 Jemsna nyaan, Judas.

Judas Iskariot. Kukba dé Jisasnyét maamaké kwayék.

Jisas dé wupmalemu du taakwat kutkalé yak

17 Jisas déku du wale dawuliye dé tépiyaa yan taaléba nak dé ték. Déku wupmalemu du dé

* **6:11:** Lu 11:53-54 * **6:14:** Jo 6:70-71

wale tédaka wupmalemu du béré taakwa béré de wawo de ték. De Jerusalem, Judiana képmaaba tékwa nak gayé, Taia, Saidonba wawo de yaak. Taia, Saidon wawo kus maaléba bét tu.

18 Wani du taakwa las Jisasna kudi véknwuké nae de yaak. Wani du taakwa las kiyakiya yadéka las sépekwaapa kapére yadéka dé derét kutnébulduké de yaak. Wani du taakwat las kutakwa kure tédaka de wawo de yaak. Yaadaka dé wadéka yaage yédaka de wani du taakwa yéknwun yak.

19 *Yaadaka dé wadéka de kudéngék. Jisasna apa apakélé yadéka dé derét kutnébulék. Waga kudéngte de akwi derét taaba kutduké de mawulé yak.

Las yéknwun mawulé yado las géraadaranké dé wakwek

20 Jisas déku duwat véte dé derét wak, “Guné gwalmu yamarék du, guné Gotna kémba ra-gunéka Got némaan ban rate gunéké dé miték vu. Védékwaké guné yéknwun mawulé yaké guné yo.

21 *“Guné bulaa kaadé wale rakwa du, kukba guné wupmalemu kadému kaké guné yo. Ka-guneranké guné yéknwun mawulé yaké guné yo.

“Guné bulaa géraakwa du, kukba guné waagiké guné yo. Waagigunéranké guné yéknwun mawulé yaké guné yo.

22 *“Mé véknwu. Wuné Akwi Du Taakwana Nyaan rawuréka guné wuna jébaaba gunébu yaalak. Du las wuna maama rate gunéké kélík

* **6:19:** Lu 8:46 * **6:21:** Re 7:16-17 * **6:22:** Jo 16:2; 1 Pi 4:14

yate gunéké kuk kwayéte gunat wasélékte gunat kéga waké de yo, ‘Guné kapéredi mu yakwa du.’ Naate wadaran guné yéknwun mawulé yaké guné yo.

23 Déknyényba wani duna képmawaara de Gotna yéba kudi wakwen duwat waga de yaalébaanék. Derét waga yaalébaandanké sanévéknwute de gunat waga yaalébaando guné yéknwun mawulé yaké guné yo. Kukba Got gunat kutkalé yaké dé yo, déku yéba kudi wakwen duwat kutkalé yadén pulak. Yadu guné dé wale miték male rasaakuké guné yo. Rasaakugunéranké guné yéknwun mawulé yate duséknét kapére yaké guné yo.

24 *“Guné wupmalemu yéwaa yan du, bulaa guné yéknwun mu kéraabutitakne guné miték ro. Kukba kapéredi mu gunéké yaadu guné miték ramarék yaké guné yo.

25 “Guné kadému kate biyaa sékérékdéka rakwa du, bulaa guné miték ko. Kukba kapéredi mu gunéké yaadu guné kaadé wale raké guné yo.

“Guné waagikwa du, bulaa guné dusék yo. Kukba kapéredi mu gunéké yaadu guné némaanba géraaké guné yo.

26 “Akwi du taakwa guna yéba kevéréndo guné jéraru yaké guné yo. Déknyenyba guna képmawaara yénaa kudi wakwen duna yéba de kevéréknék. Bulaa rakwa du guna yéba kevéréndo sal guné wawo yénaa kudi wakweké guné yo? Bulaa rakwa du guna yéba

* **6:24:** Je 5:1-6

kevérékdaran kapéredi mu kukba gunéké yaaké dé yo.”

Maamaké mawulat kapére yadaranké dé wak-wek

²⁷*Wani kudi watakne dé Jisas derét kéga wak, “Guné, wuna kudi véknwukwa du, gunat wuné wakweyo. Guné guna maamaké mawulat kapére yaké guné yo. Gunéké kélik yakwa duwat kutkalé yaké guné yo.

²⁸ Gunat kapéredi kudi wakwekwa duwat guné Gorét waataké guné yo, dé derét kutkalé yaduké. Gunat kapéredi mu yakwa duké guné Gorét waataké guné yo, dé deké yéknwun mawulé kwayéduké.

²⁹ Du las guna ménidaamaba yéknwun tuwa saknwuba gunat viyaadaran guné kaatamarék yate walaakwe bakna téké guné yo, de guna ménidaamaba aki tuwa saknwuba viyaadoké. Du las guna baapmu wut kéraadaran guné baapmu wut las wawo deké kwayéké guné yo.

³⁰ Du las gunat gwalmuké waatadaran guné wani gwalmu deké kwayéké guné yo. De guna gwalmu kéraadaran guné wani gwalmu kaatadoké derét waatamarék yaké guné yo.

³¹ Nak du gunat kutkalé yadoké mawulé yagunékwa pulak, guné derét waga kutkalé yaké guné yo.

³² “Kapéredi mu yakwa du taakwa, yéknwun mu yakwa du taakwa, akwi du taakwa de deku du taakwaké de mawulat kapére yo. Guné guna du taakwaké male mawulat kapére yagunéran guné

* **6:27:** 1 Pi 3:9

kapéredi mu yakwa du taakwat talaknamarék yaké guné yo. Guné waga male yagunérán Got waga yagunéranké dé ‘Wan yéknwun’ naamarék yaké dé yo.

³³* Akwi du taakwa kaatate de yéknwun mu yo, derét yéknwun mu yakwa du taakwat. Guné gunat yéknwun mu yakwa du taakwat male yéknwun mu yagunérán guné kapéredi mu yakwa du taakwat talaknamarék yaké guné yo. Guné waga male yagunérán Got dé waga yagunéranké dé ‘Wan yéknwun’ naamarék yaké dé yo.

³⁴ Akwi du taakwa, kapéredi mu yakwa du taakwa wawo de nak du taakwaké gwalmu kwayéte de deku mawuléba de wo, ‘De naanéké tépa tiyaaké de yo.’ Guné waga gwalmu kwayéte wani kudi wagunérán guné kapéredi mu yakwa du taakwat talaknamarék yaké guné yo. Guné waga male yagunérán, Got waga yagunéranké dé ‘Wan yéknwun,’ naamarék yaké dé yo.

³⁵⁻³⁶* Guné kapéredi mu yakwa du taakwa yadakwa pulak yamarék yaké guné yo. Guné derét talakne kéga yaké guné yo. Guné guna maa-maké wawo mawulat kapére yaké guné yo. Yate guné derét kutkalé yaké guné yo. Yate guné deké gwalmu kwayéte wani gwalmu tépa nyégélké sanévéknwumarék yaké guné yo. Guné waga yagunérán apat kapére yakwa ban Got gunéké waké dé yo, ‘Wuna baadi de ro.’ Naate wate gunat miték male yaké dé yo. Yadu guné miték rasaakuké guné yo. Guna yaapa Got dé mawulé léknu, déké sanévéknwumarék yate kapéredi mu

* **6:33:** Lu 14:12-14

* **6:35-36:** Ep 4:32

yakwa du taakwaké. Dé deké mawulé lékdékwa pulak, guné wawo deké mawulé lékgé guné yo.”

Derét bari waatimarék yadaranké dé Jisas kudi wakwek

³⁷*Wani kudi watakne dé Jisas kéga wak, “Nak du taakwa yadan muké sanévéknwute guné derét waatimarék yate bari kéga wamarék yaké guné yo, ‘Wani du taakwa wan kapéredi mu yakwa du taakwa.’ Naate wamarék yagunérən Got yagunén muké sanévéknwute bari gunat waatimarék yate kéga wamarék yaké dé yo, ‘Guné kapéredi mu yakwa du guné.’ Naate wamarék yaké dé yo. Guné wani du taakwat bari wamarék yate guné de yadan kapéredi muké sanévéknwumarék yaké guné yo. Waga yagunérən Got yagunén kapéredi mu yakutnyéputiye dé wani muké tépa sanévéknwumarék yaké dé yo.

³⁸ Guné nak du taakwat kutkalé yaké nae deké gwalmu kwayéké guné yo. Kwayégunérən Got gunat kutkalé yate gunéké kwayéké dé yo. Kwayégunérən Got gunat kwekére kutkalé yamarék yaké dé yo. Kwayégunérən Got gunat némaanba kutkalé yaké dé yo. Kutkalé yadu guné miték male rasaakuké guné yo. Guné nak du taakwat kutkalé yagunékwa pulak Got gunat kutkalé yaké dé yo.”

³⁹ Wani kudi watakne dé Jisas derét keni aja kudi wakwek, “Méni kiyaan du dé nak méni kiyaan dut yaabu wakwatnyéké dé yo, kapu kaapuk? Wan kaapuk. Dérét wakwatnyéké yédérən bét véteti waaguba akéréké bét yo.

* ^{6:37:} Je 2:13

40 *Sékulkwa baadi de bakna du de ro. Derét yakwatnyékwa du de deku némaan du de ro. De derét yakwatnyédo miték sékulte kukba wani baadi derét yakwatnyén du pulak némaan du raké de yo.”

41 Wani aja kudi watakne dé Jisas derét kéga wakwek: “Nak du taakwa yan makwal kapéredi mu wan méniba kwaakwa mukut pulak. Yagunén némaa kapéredi mu wan méniba kwaakwa apakélé baagé pulak. Samuké guné nak du taakwana méniba kwaakwa mukut véte guné guna méniba kwaakwa apakélé baagé kaapuk végunékwa? Guné waga yate nak du taakwa yan kapéredi muké wakwete guné yagunén némaa kapéredi muké kaapuk sanévéknwugunékwa.

42 Guné némaa kapéredi mu yatakne samuké guné makwal kapéredi mu yan du taakwat guné kéga wo? ‘Guné kapéredi mu gunébu yak. Guné miték ragunuké wuné gunat kutkalé yaké wuné yo.’ Waga wamarék yaké guné yo. Guné kapéredi mu yatakne waga wagunéran guné yénaa yakwa du guné ro. Taale guné yagunén némaa kapéredi muké kuk kwayéké guné yo. Kwayétakne guné makwal kapéredi mu yan du taakwat kutkalé yaké guné yo.”

Sék akukwa miké dé Jisas aja kudi wakwek

43 Wani kudi watakne dé Jisas derét kéga kudi wakwek: “Kéni aja kudi mé véknwu. Yéknwun miba kapéredi sék kaapuk akukwa. Kapéredi miba kaapuk yéknwun sék akukwa.

* **6:40:** Jo 13:16

44 Naané miséknét véte naané kutdéngék. Samu mi wan yéknwun mi? Samu mi wan kapéredi mi? Naané kutdéngék. Raamény baagwiba naané misék kaapuk gélénakwa. Kapéredi waaraba naané yéknwun misék kaapuk gélénakwa.

45 *Bulaa wani kudiké mé sanévéknwu. Naané miséknét véte naané kutdéngék. Wani mi wan yéknwun mi, kapu kapéredi mi? Miké kutdéngnakwa pulak, naané nak du taakwana jébaa véte naané deku mawuléché naané kutdéngék. Yéknwun du deku mawuléba yéknwun mawulé male yaaladéka de yéknwun kudi bulte yéknwun mu yo. Kapéredi du deku mawuléba kapéredi mawulé male yaaladéka de kapéredi kudi bulte kapéredi mu yo.

Du vétik ga kaabérénké dé Jisas kudi wakwek

46 *“Guné wunat guné wo, ‘Méné, naana Némaan Ban méné.’ Naate wate guné wuna kudi véknwumarék yo. Samuké guné waga wate wuna kudi véknwumuké guné kélék yo?

47 *Wunéké yaate wuna kudi véknwute wawurékwa pulak yakwa du taakwa wan keni du pulak.

48 Dé yéknwun ga kaaké nae dé apakélé waagu vaak. Vaatakne matuba dé kwaat yaanék. Yaanétakne apa yan yéknwun ga dé kaak. Kaadéka maas viyaadéka kwayé kwe wani gaba sapurukléka wani ga kaapuk akérédén, apa jébaa ye yéknwun ga kaadén bege.

* **6:45:** Je 3:10-12; Mt 12:35 * **6:46:** Mt 7:21 * **6:47:** Je 1:22

49 Wuna kudi bakna véknwute wawurékwa pulak yamarék yakwa du taakwa wan kényi du pulak. Dé ga bari kaaké nae dé apa yamarék yakwa képmaaba dé kwaat bakna yaanék. Kwaat miték téduké sanévéknwumarék yate dé matuba kaapuk vaadén. Yadéka maas viyaadéka kwayé kwe wani gaba sapurukléka dé wani ga bari akérék. Akérédéka kwayé yae lé wani ga yaate yék.” Naate dé Jisas derét wak.

7

Jisas dé waariyakwa duna némaan duké jébaa yan dut kutnélbulék

1 Jisas du taakwat wani kudi wakwebutitakne dé Kapaneamét yék.

2 Wani gayéba dé Romna waariyakwa duna némaan du nak rak. Déku jébaa yan duké nak dé mawulat kapére yak. Yadéka dé déku jébaa yan dut kiyakiya yadéka dé kiyaaké yak.

3 Yadéka wani némaan du dé véknwuk Jisas wani gayéba radékwaké. Véknwutakne dé Judana némaan duwat las wadéka de Jisaské yaak, dé de wale ye déké jébaa yan dut kutnélbulduké.

4-5 Yae de dérét wak, “Wani du dé yéknwun du dé. Dé naané Judaké dé mawulat kapére yo. Dé Gotna kudi bulnakwa ga dé kaak naanéké. Kaadénké méné déku dut kutnélbulménuké naané mawulé yo.”

6 Naate wadaka dé Jisas deku kudi véknwutakne dé de wale yék. Ye ga saabaké yadéka waariyakwa duna némaan du duwat las wadéka de yae Jisasnyét déku kudi kégä wak, “Némaan

Ban, wuné bakna du wuné ro. Méné némaan ban méné ro. Waga rate méné wuna gat yaalamarék yaké méné yo.

⁷ Waga raménékwaké sanévéknwute wuné ménéké kaapuk yaawurén. Méné bakna waménu wuna du tépa yéknwun yaké dé yo.

⁸ Nak du wunéké dé némaan ban ro. Radéka wuné wadékwa pulak wuné yo. Wuné dut nak, ‘Méné yéké méné yo,’ naawuréka dé yu. Nak dut, ‘Méné mé yaa,’ naawuréka dé yao. Wunéké jébaa yakwa dut, ‘Méné jébaa mé ya,’ naawuréka dé wani jébaa yo. Méné yawurékwa pulak yaké méné yo. Yate méné bakna waménu dé wuna du tépa yéknwun yaké dé yo.”

⁹ Wani némaan duna kudi waga wadaka Jisas véknutakne dé wani duké sanévéknwu wanévéknwuk. Yate dé walaakwe déku kukba yaan wupmalemu du taakwat dé wak, “Wani du dé wunéké miték male sanévéknwu. Wuné wawuru du taakwa yéknwun yadaranké dé kutdéngék. Guné Isrelna du taakwa, guné walkamu male guné wunéké miték sanévéknwu. Dé Romna du radéka déku yéknwun mawulé guné Isrelna du taakwa guna yéknwun mawulat débu talaknak. Adél wuné gunat wakweyo.”

¹⁰*Naate wadéka waariyakwa duna némaan du déku du de gat tépa gwaamale yék. Ye wulæ de vék némaan duké jébaa yan du tépa yéknwun ye radéka.

Jisas wadéka dé kiyaan du tépa nébéle raapmék

* **7:10:** Jo 4:51

11 Kukba dé Jisas nak gayét yék. Wani gayéna yé Nen. Wupmalemu du taakwa, déku du wawo, waga de dé wale yék.

12 Ye wani gayéna gwéspété saabaké yadaka de kiyaan kwinébé dut nak yaate yaalak. Déku néwaa dérét male lé kéraak. Nak baadi kaapuk. Léku du déknyényba dé kiyaak. Wani gayéba ran wupmalemu du taakwa de wani taakwa wale yék.

13 *Yédaka Némaan Ban Jisas véte dé mawulé léknék wani taakwaké. Lékte dé lérét wak, “Nyéné géraamarék.”

14 Naate watakne ye dé kiiae kwaan duna jaabéba dé kure ték. Tédéka de jaabé yaatan du ték. Tédéka dé kiyaan dut wak, “Méné, wuna kudi mé véknwu. Méné mé raap.”

15 Naate wadéka dé kiyaan du nébéle raapme rate dé kudi bulék. Buldéka Jisas dé dérét déku néwaaké kwayék.

16 Yadéka de akwi du taakwa kwagénte wup de yak. Yate de Gotna yéba kevéréknék. Kevérékte de wak, “Gotna yéba kudi wakwekwa du nak dé naané wale ro. Wan némaan du dé. Bulaa Got déku du taakwat débu kutkalé yak.”

17 Naate de Jisas yan muké wakwekéreyék. Yadaka de wani gayé wale tékwa gayéba, akwi Judiana gayéba wawo de Jisaské kudi véknwuk.

Jon dé déku du vétiknét wak Jisaské yébéruké

18 Gu yaakutaknan du Jon raamény gaba kwaadéka déku du yae de dérét Jisas yan muké wakwek.

* **7:13:** Lu 8:41-42, 49-55

19 Wakwedaka dé Jon wadéka déku du vétik yaabétka dé bérét wak, “Béné Jisaské ye béné dérét kéga waataké yo, ‘Déknyényba Gotna nyégaba de kudi kavik, naanat kutkalé yaké kukba yaaran duké. Méné wani du méné, kapu nak duké raségéké naané yo?’ Naate dérét waké béné yo.”

20 Naate wadéka ye bét Jisas ran saabe bét wak, “Gu yaakutaknan du Jon anat wadék ané ménéké yao. Kéni kudi ménat waataké ané yao: Déknyényba Gotna nyégaba de kudi kavik, naanat kutkalé yaké kukba yaaran duké. Méné wani du méné, kapu nak duké raségéké naané yo?”

21 Wani tulé dé Jisas kiyakiya yakwa wupmalemu du taakwa, sépékwaaapa kapére yan wupmalemu du taakwat wawo dé kutnélbulék. Kutnélbule wadéka de du taakwat kure téen wupmalemu kutakwa waga de yaale yaage yék. Wupmalemu méni kiyaan du taakwat wadéka de tépa miték vék.

22* Jisas waga yate dé Jonna du vétiknét wak, “Béné gwaamale ye béné véte véknwugunén muké Jonét wakweké yo. Méni kiyaan du taakwa tépa védaka de maan kapére yan du taakwa yéknwun ye de yeyé yeyo. Lepéro yan du taakwa yéknwun yadaka de waan waagété yadéka kudi véknwumarék yan du taakwa de kudi véknwu. Wani du taakwat wunébu kutnélbulék. Wuné wawurék kiyaan du taakwa de tépa nébélé raapme ro. Gwalmu yamarék du taakwat wuné Gotna kudi wakweyo.

* **7:22:** Mt 15:30-31; Mk 7:32-37; Lu 5:12-13, 7:12-16

23 Du taakwa las de wunéké wo, ‘Got déré t débu wak, dé naanat kutkalé yaduké. Wan adél.’ Naate wate de wunéké miték sanévéknwu. Wunéké waga sanévéknwukwa du taakwa de yéknwun mawulé yate miték raké de yo. Waga béné Jonét wakweké yo.” Naate dé Jonna duwat wakwek.

24 Jisas waga wadéka bét Jonna du vétik bét yék. Yébétka dé Jisas waba ran du taakwat Jonké kéga kudi wakwek: “Guné du ramarék taalat ye yaga pulak dut véké guné yék? Apa yamarék yate wimut kutdéka ségénkwa séwaa pulak yakwa dut véké guné yék, kapu yaga pulak? Jon wan wani mu pulak kaapuk. Jon wan apa yakwa du.

25 Yéknwun baapmu wut kusadan dut véké guné yék, kapu yaga pulak? Jon wani du pulak kaapuk radén. Yéknwun baapmu wut kusadan du de némaan banna yéknwun gaba de ro.

26 Gotna yéba kudi wakwekwa dut nak véké guné yék, kapu yaga pulak? Ao, Jon wan Gotna yéba kudi wakwekwa du. Gunat wuné wakweyo. Dé némaan du dé ro. Gotna yéba kudi wakwen nak némaan duwat talakne dé némaan du dé ro.

27* Jonké keni kudi Gotna nyégaba dé kwao:
Got déku nyaanét dé wak, ‘Kén wuna kudi kure yékwa du.

Wuné wawuru dé taale yéte ména yaabu kutké dé yo.’

Naané wani kudi véknwute naané kutdéngék. Jon wan Gotna kudi kure yéte taale yaakwa du.

28 Waga kutdéngte gunat wuné wo. Jonna jébaa keni képmaaba déknyényba ran duna jébaat

* **7:27:** Mal 3:1; Lu 3:2-6

débu talaknak. Talaknadéka dé gunat kutkalé yawuréran jébaaké kaapuk miték kudéngdén. Yadéka de Gotna kém̄ba rate du taakwat kutkalé yawuréran jébaaké kudéngkwa du taakwa akwi deku yéknwun mawulé déku yéknwun mawulat débu talaknak. Wuné gunat adél kudi wuné wakweyo.”

29 *Wani kudi wadéka de takis nyégélkwa du waba tékwa nak du taakwa wawo wani kudi véknwutakne de yéknwun mawulé yak, Jon derét déknyényba gu yaakutaknadén bege. Yéknwun mawulé yate Gotna yéba kevérékte de wak, “Déku kudi adél kudi.”

30 Naate wadaka de Parisina du, apa kudiké kudéngkwa du wawo de wani kudiké kélélik yak, Gotna kudiké kuk kwayédaka Jon derét déknyényba gu yaakutaknamarék yadén bege.

31 Wani kudi watakne dé Jisas derét kéga wakwek, “Bulaa rakwa du taakwa yaga pulak de? Gunat wakweké wunék.

32 Bulaa rakwa du taakwa de ameba kutkwa baadi pulak de ro. De kutte de nak baadir wao. Waate de wo,

Naané gwaaré waate kaang viyaanaka guné kaapuk kétigunén.

Naané mawulé lékte géraanaka guné kaapuk géraagunén.

Guné naané wale nakurak mawulé kaapuk yagunén.

Waga waakwa baadi pulak, bulaa rakwa du taakwa de ro.

* **7:29:** Mt 21:32

33 “De Jon wale nakurak mawulé kaapuk yadan. De wuné wale nakurak mawulé kaapuk yadakwa. Gu yaakutaknan du Jon yae kagunékwa kadému kamarék yate kagunékwa wain gu kaapuk kadén. Yadéka guné déké kélék yate guné wo, ‘Kutakwa déku mawuléba wulæ téléka dé waagté yo.’

34* Naate wagunéka wuné Akwi Du Taakwana Nyaan yae kagunékwa kadému kate kagunékwa wain gu wuné ko. Kawuréka guné wunéké kélék yate guné wo, ‘Mé vé. Wani du wupmalemu kadému kate wupmalemu wain gu dé ko. Kate dé takis nyégélkwa du wale rate, kapéredi mu yakwa nak du taakwa wale rate dé de wale kudi bulu.’

35 Naate wagunéka wuné nak kudi wuné wo. Got dé akwi muké kudéngék. Déku paaté wan yéknwun paaté. Wan adél. Wani kudiké sanévéknwute guné ané déku duké miték sanévéknwuké guné yo.” Naate dé Jisas wak.

Kapéredi mu yakwa taakwa lé Jisasna maan yakutnyék

36 Parisina du nak déku yé Saimon Jisasnyét dé wak, dé yae dé wale kadému kaduké. Wadéka yae wani duna gat wulæ rate dé kadému kak.

37 Parisina duna gaba rate kadékwaké lé wani gayéba rate kapéredi mu yakwa taakwa nak lé kudi véknwuk. Véknwutakne lé matut yadan mak-wal agéráp kure yaak. Wani agérápba yéknwun yaama yakwa gu dé ték.

38 Kure yae lé Jisasna maan wale kwati yaanéte lé géraak. Géraaléka dé léku méniba giyan

* **7:34:** Lu 5:30

gu Jisasna maanba akérék. Akérédéka lé léku maaknaba tén sémeny nébat yatnyék. Yatnyétakne wupmale apu lé déku maanba taama vék (daama réngék). Yate lé yéknwun yaama yakwa gu lé déku maanba sévik.

³⁹ Séviléka Jisasnyét waadéka yaan Parisina du véte dé déku mawuléba kéga wak, “Wani du Gotna yéba kudi wakwekwa du radu mukatik dé akwi muké kutdéngte dérét kutkwa taakwaké kutdéngdu. Lé kapéredi mu yakwa taakwa ralékwaké dé kutdéngdu.”

⁴⁰ Wani kudi wadéka Jisas dé dérét wak, “Saimon, wuné ménat nak kudi wakweké wuné mawulé yo.” Naate wadéka dé wak, “Naanat Gotna kudiké yakwatnyékwa ban, méné mé wakwe.”

⁴¹ Naate wadéka dé keni aja kudi wakwek: “Du vétik bét nak duwat yéwaa bakna nyégélék. Nak du dé wupmalemu yéwaa nyégélék (100 kina). Nak du dé walkamu yéwaa nyégélék (10 kina). Nyégélbétka kukba dé raségék, wani yéwaa kwayékatabérüké.

⁴² Wani du vétik bét déku yéwaa kwayékataké bét yapatik. Yabétka dé bérét wak, ‘Dékumuk. Tiyaakatamarék yaké béné yo.’ Naate wadénké méné yaga méné sanévéknwu? Wani du vétik kiyadé yéwaa kwayén duké mawulat kapére yaké yo?”

⁴³ Naate wadéka dé Saimon wak, “Wupmalemu yéwaa nyégélén du. Waga wuné sanévéknwu.” Naate wadéka dé wak, “Wan adél kudi méné wo.”

44 *Wani kudi watakné Jisas wani taakwaké walaakwe dé Saimonét wak, “Kéni taakwat mé vé. Wuné méná gat yaalawuréka méné naana apa kudi wadékwa pulak kaapuk yaménén. Yate méné gu las kaapuk tiyaaménén, wuna maan yakutnyéwuruké. Kéni taakwa lé léku ménegwát wuna maan lébu yakutnyék. Yate lé léku nébat lébu yatnyék.

45 Méné wunat kaapuk taama véménén (daama réngménén). Wuné kéba yaale taale rawuréka wani taakwa yae lé wuna maanba taama vék (daama réngék). Wupmale apu lé waga yak.

46 Méné wuna maaknaba yéknwun gu kaapuk séviménén. Lé yéknwun yaama yakwa gu wuna maanba lébu sévik.

47 Waga yalék wuné ménat wo. Yalén wupmalemu kapéredi mu wunébu yatnyéputik. Yatnyéputiwurék lé wunéké mawulat kapére yo. Du taakwa walkamu kapéredi mu yadaka wuné wani kapéredi mu yatnyéputiwuréka de wunéké walkamu mawulé de yo.”

48 *Wani kudi watakné dé wani taakwat wak, “Yanyénén kapéredi mu wunébu yatnyéputik.”

49 Naate wadéka de dé wale rate kadému kan du deku kapmu bulte de wak, “Wani du dé yalén kapéredi mu yatnyéputiyu. Wan yaga pulak du dé?”

50 Naate wadaka dé Jisas wani kudi kaatamarék yate dé wani taakwat wak, “Nyéna kapéredi mawulé kutnébulwurékwa apaké miték sanévéknwunyénék wuné nyéna mawulat wunébu

* **7:44:** Jen 18:4 * **7:48:** Mt 9:2-6

kutnébulék. Bulaa yéknwun mawulé yate miték yéké nyéné yo.” Naate dé lérét wak.

8

Taakwa las Jisas wale de yeyé yeyak

¹*Kukba Jisas dé wupmale gayéba yeyé yeyak. Yeyé yeyate dé du taakwat Gotna kudi wakwek, Got némaan ban rate du taakwaké miték védéranké. Déku du taaba vétik sékét maanba kayék vétik waga de dé wale yék.

²⁻³ Taakwa wawo de las dé wale yék. Déknyényba wani taakwa lasnyét dé kiyakiya yak. Lasnyét kutakwa de kure ték. Yadaka Jisas wani taakwat akwi dé kutnébulék. Wani taakwa deku yéwaa kwayéte kadému kérae sérakne de Jisas déku duké wawo kwayék. Wani taakwa nak wan Maria. Léké de wak Makdalaba yaan taakwa Maria. Déknyenyba kutakwa nak taaba sékét nak taababa kayék vétik lérét kure tédaka, Jisas wadéka de lérét kulaknyéntakne yaage yék. Nak taakwa wan Yerotna gaké téségén du déku yé Susa déku taakwa. Léku yé Joana. Nak taakwa wan Susana. Taakwa las wawo waga de yék.

Wit sék yaatnyén duké dé Jisas aja kudi wakwek

⁴ Wupmalemu du béré taakwa béré de Jisaské yae jawuk. Wani du taakwa wupmalemu gayéba de yaak. Yaadaka dé derét keni aja kudi wakwek:

⁵ “Du nak dé déku képmaaba wit sék yaatnyéké nae dé yék. Ye yaatnyédéka de wit sék las yaabuba de akérék. Akérédaka du taakwa yeyé yeyate de

* **8:1:** Lu 24:10

yaabuba ran wit sékba akik. Akidaka de api yae kéræ de kak.

⁶ Wit sék las matuba de akérék. Walkamu képmæa male dé waba ték. Matuba akére buréle waarédaka mégi miték kutmarék yadéka képmæa yépidéka de bari rékaa ye de kiyaak.

⁷ Wit sék las de raamény waara ténba akérék. Akére radaka raamény waara wure dé kaku-tapmék.

⁸ Wit sék las de yéknwun képmæaba akérék. Akére waba re de miték wurék. Wure de wup-malemu yéknwun sék akuk.” Naate watakne dé Jisas wak, “Guné kudéngké mawulé yate waan kwekére miték véknwuké guné yo.”

Jisas aja kudi derét wakwedékwaké de déré wakwek

⁹ Jisas wani kudi wadéka de déku du wani aja kudiké déré wataak.

¹⁰*Waatadaka dé derét wak, “Got némaan ban rate du taakwaké miték véké dé yo. Védu de déku kembæ raké de yo. Wani muké déknyényba Got dé kudi paakuk. Paakutakne dé kusékéru, guné bulaa wani muké kudénggunuké. Nak du taakwa kudéngmarék yaké de yo. Véte miték vémárék yaké de yo. De kudi véknwute de wani kudiké kudéngmarék yaké de yo. Yadaranké derét wuné aja kudi wakweyo.

Jisas dé kudi wakwek wani aja kudiké

¹¹*“Bulaa wani aja kudiké wakweké wunék. Wani wit sék wan Gotna kudi.

* **8:10:** Lu 10:21 * **8:11:** 1 Pi 1:23

12 Du taakwa las de Gotna kudi debu véknwuk. Véknwudaka Seten yae dé wani kudi deku mawuléba kérae kure yu. De Gotké miték sanévéknwute Gotké yédakwa yaabuba yémuké kélík yate dé wani kudi kérae kure yu. Kure yédéka de wani kudiké yékéyaak yo. Wani du taakwa wan yaabuba akérén wit sék pulak.

13 Du taakwa las de Gotna kudi bari véknwu. Véknwute wani kudiké yékñwun mawulé yate dusék takwasék de yo. Yate de kaapuk miték sanévéknwudakwa. Wani kudi deku mawuléba dawulimarék yadéka de kaapuk miték sanévéknwudakwa. Yadaka kapéredi mu las deké yaadéka de Gotna kudi bari kulaknyényu. Wani du taakwa wan matuba akérén wit sék pulak.

14 *Du taakwa las taale de Gotna kudi miték véknwu. Véknwute de kéri képmaana muké male sanévéknwudaka deku mawulé yéwaa gwalmu kéraaké dé génu. Wani mu dé Gotna kudit taknatépu. Taknatépédéka de wani du taakwa Gotna jébaa kaapuk yadakwa. Wani du taakwa wan raamény waara ténbä akérén wit sék pulak.

15 *Du taakwa las de Gotna kudi miték véknwute wadékwa pulak yate de déku kudiké mawulat kapére yo. Yate déku kudi miték véknwusaakute yékñwun mawulé yate Gotké yékñwun jébaa de yasaaku. Wani du taakwa wan yékñwun képmaaba akérén wit sék pulak.” Naate dé Jisas wak.

Jisas aja kudi dé wakwek téwayéké

* **8:14:** Lu 18:18, 22-24 * **8:15:** Jo 6:29; Je 1:22

16 Wani kudi watakné dé Jisas wak, “Kéni aja kudi mé véknwu. Du téwayé sérakne kure yae sapgutaknadan awu gwaléba de takno, kapu jaabé gwaléba de takno? Wan kaapuk. De jaabé takuba de takno, wani gat wulaaran du wani téwayé yaante kayénarédu miték védoké.

17 Paakwe rakwa mu kukba véké guné yo. Akélak wakwedan kudi kukba kudéngké guné yo.

18 Wani kudiké mé sanévéknwu. Guné miték sanévéknwe wuna kudi miték véknwuké guné yo. Wuna kudi miték véknwukwa du taakwa kukba Gotna kudiké miték kudéngké de yo. Wuna kudi miték véknwumarék yakwa du taakwa de wo, ‘Naané Gotna kudi naanébu kudéngék.’ Naate watakné kukba de déku kudiké yékéyaak yate bakna raké de yo.” Naate dé Jisas wak.

Jisas dé déku néwaa déku wayéknajeké wakwek

19 Wani tulé Jisasna néwaa déku wayéknaje wawo de déké yaak. Yaadaka wupmalemu du taakwa gat wulæ sékérékne tédaka de dé ténét wulaaké de yapatik.

20 Yapatidaka du las de déréti wak, “Ména néwaa, ména wayéknaje yae kaapaba téte de ménat véké de mawulé yo.”

21 *Naate wadaka dé deréti wak, “Gotna kudi véknwute wadékwa pulak yakwa du taakwa wan wuna néwaa, wuna wayéknaje pulak de ro.” Naate dé Jisas wak.

Jisas wadéka dé némaa wimut kaapuk yak

* **8:21:** Lu 11:27-28; Jo 1:11-13

22 Nyaa nak dé Jisas déku du wale de botba nak waarek. Waare dé derét wak, “Naané kwawu nak saknwat yéké naané yo.” Naate wadéka de botba yék.

23 Yéte dé Jisas widé kwaak. Kwaadéka némaa wimut kutdéka dé gu raapme waare botba gwaade dé sékérékgé yak. Yadéka yalakgé de yak.

24 Yate ye Jisasnyét waaséligénte de dérét wak, “Némaan du, kén naané yalaknu.” Naate wadaka ligéne raapme wadéka wimut kaapuk yadéka dé gu dawuliye dé miték ték.

25 *Tédéka dé derét wak, “Samuké wuné gunat kutkalé yawuréran apaké guné kaapuk miték sanévéknwugunén?” Naate wadéka de wup yate kwagénte deku kapmu bulte de wak, “Aki. Dé wadéka dé wimut gu déku kudi véknwute wadékwa pulak dé yo. Wan yaga pulak ban dé?”

Jisas wadéka de kutakwa yaage yék

26 Jisas déku du wale botba ye de Gegesana képmaa saabak. Wani taalé kwawu nak saknwuba tédéka Galilina képmaa nak saknwuba dé tu.

27 Saabe bot kulaknyéntakne kwawu maaléba yéké yadaka wani gayéba yaan du nak dé Jisasnyét véké yaak. Déknyényba kutakwa de wani dut kure tédaka dé waagété débu yak. Yate dé baapmu wut las kaapuk gidén. Bakna dé rak. Wupmalemu baapmu waga male dé rak. Dé gaba kaapuk radén. Dé du taakwa kiyaadaka rémdan taaléba male dé rak.

* **8:25:** Mk 9:20-24

28-29 *Dérét kure tén kutakwa wupmalemu apu de dérét viyaak. Viyaadaka dé waagété yadéka du las déku maan taaba apa baagwit de gik. Giye déké de téte vék. Védaka dé wani baagwi périkdéka de kutakwa du ramarék taalat dérét kure yék. Wani du dé Jisasnyét véké yaak. Yaadéka dé Jisas wak, dérét kure tén kutakwa yaage yédoké. Wadéka dé dérét vétakne némaanba waate dé dérét kwati yaane waadé daate dé wak, “Jisas, méné awuréba rakwa ban Gotna nyaan. Méné wunat samu yaké méné yo? Wuné ménat wuné waato. Méné wunat kaagél tiyaamarék yaké méné yo.”

30 Naate wadéka dé dérét wak, “Ména yé yaga?” Naate wadéka dé wak, “Wuna yé Wupmalemu.” Naate dé wak, wupmalemu kutakwa kure tédaakwa bege.

31 Wani kutakwa de Jisasnyét wak, “Naané kapéredi taalat yémuké naané kélik yo. Ménat naané waato. Naané wanét yénoké méné wamarék yaké méné yo.” Naate de wak.

32 Wani nébuba wupmalemu baalé de, de tén wale téte, kadému kak. Kadaka de wani dut kure tén kutakwa Jisasnyét wak, “Méné naanat kéléké mawulé yaménérán méné waménu naané wani baaléna mawuléba wulaaké naané yo.”

33 Naate wadaka dé derét wak, “Guné wanét mé yaage yégunu.” Waga wadéka de wani dut kulaknyéntakne ye de wani baalat kure ték. Kure tédaakwa wani baalé némaa tépaaba yaage dawuliye guba akére gu ke de kiyaak.

* **8:28-29:** Lu 4:34

³⁴ Wani baaléké téségén du waga yadaka vétakne de yaage yék. Ye de akwi gayéba ran du taakwat wani muké wakwek.

³⁵ Wakwedaka de du taakwa wani mu véché de yék. Ye Jisas tén saabe de kutakwa kulaknyéntakne yén dut de véché. Dé baapmu wut gitakne yéknwun mawulé yate Jisasna maan wale radéka de véché. Véte de wup yak.

³⁶ Yadaka Jisas wani mu yadéka vén du taakwa de derét kudi wakwek, kutakwa kure tén du yéknwun yadénké.

³⁷ Wakwedaka Gegesana képmaaba ran akwi du taakwa wupmét kapére yate de Jisasnyét wak, dé derét kulaknyéntakne yéduké. Wadaka dé Jisas derét kulaknyéntakne yéké yate dé botba waáréka.

³⁸⁻³⁹ Waarédéka dé déknyényba kutakwa kure tén du dé dérét wak, “Wuné méné wale yéké wuné mawulé yo.” Naate wadéka dé Jisas dérét wak, “Méné ména gayét gwaamale ye méné Got ménat yan muké kudi wakweké yo.” Naate wadéka ye dé déku gayéba ran akwi du taakwat Jisas dérét yan muké dé kudi wakwek.

Jisas dé taakwa vétiknét kutkalé yak

⁴⁰ Jisas kwawu nak saknwat gwaamale ye saabadéka akwi du taakwa dérét véte de dusék takwasék yak, déké raségédan bege.

⁴¹⁻⁴² Yadaka du nak déku yé Jairas dé Jisaské yék. Dé némaan du dé rak, wani gayéba kwaakwa Gotna kudi buldakwa gaba. Dé ye kwati yaane Jisasnyét waadé daate dé dérét wak, “Wuna takwanyan kiyaamale yaké lék. Léku kwaaré wupmalemu kaapuk (12). Wuné baadi nakurak

male. Méné wuné wale yaaké méné yo, lérét kutnëbulké.” Naate wadéka dé dé wale yék.

43-44 Jisas yaabuba yédéka de wupmalemu du taakwa dé wale yék. Yédéka yaabu dé sékérknék. Yadéka lé taakwa nak déku kukba yae lé déku baapmu wutna waabuba kurék.

Wupmalemu (12) kwaaré wény yaaladéka lé rak. Yadéka wupmalemu apu déknyényba wani taakwa lé doktaké yék, de lérét kutnëbuldoké. Ye de lérét kutnëbulké de yapatik. Yapatidaka wani taakwa Jisaské kudi véknwute lé léku mawuléba wak, “Wuné Jisasna baapmu wutba taaba kutwuréran wuné tépa yéknwun yaké wuné yo.” Naate watakne lé déku kukba yae lé déku baapmu wutna waabuba kurék.

Wani taakwa waga kutléka dé wény bari kaapuk yadéka lé yéknwun yak.

45 Yaléka dé Jisas wak, “Kiyadé wunat kurék?” Naate wadéka de akwi wak, “Naané kaapuk.” Waga wadaka dé Pita wak, “Némaan Ban, wupmalemu du taakwa de méné wale tu. De las ménat bakna de kurék, kapu yaga pulak?”

46 *Naate wadéka dé Jisas wak, “Kaapuk. Nak ban wunat apa kéraaké nae dé wunat kurék. Yadéka wuna apa las yédéka wuné kutdéngék.”

47 Naate wadéka lé wani taakwa kutdéngék. Jisas dé léké kutdéngék. Waga kutdéngte lé gente yae lé Jisas tén wale képmaaba kwati yaane waadé daak. Daate akwi du taakwana méniba lé kéga wak, “Wupmalemu (12) kwaaré wunat wényét kapére yadéka wuné tépa yéknwun yaké

* **8:46:** Lu 6:19

nae wuné ména baapmu wutba taaba kurék.
Kure wuné bari tépa yéknwun yak.”

48 Naate waléka dé lérét wak, “Nyéna, wuné nyénat kutnébulwuréran apaké miték sanévéknwute bulaa nyénébu yéknwun yak. Nyéné yéknwun mawulé yate miték yéké nyéné yo.”

49 Jisas wekna téte kudi buldéka dé du nak Jairasna gaba dé yaak. Yae dé wani némaan dut wak, “Ména takwanyan lébu kiyaak. Méné waménu wani némaan ban yaamarék yate déku nak jébaa yaké dé yo.”

50 Naate wadéka dé Jisas wani kudi véknwute dé Jairasnyét wak, “Méné wup yamarék. Méné wuné lérét kutkalé yawuréran apaké miték sanévéknwuménu ména takwanyan yéknwun yaké lé yo.”

51 Naate watakne dé ye wani duna ga saabe dé wak, “Pita, Jon, Jems, béné léku néwepa wawo, guné kapmu wuné wale wulaaké guné yo. Nak du taakwa de wulaamarék yaké de yo.”

52 Naate wadéka waba tén akwi du taakwa wani takwanyanké mawulé lékte de téte géraak. Géraadaka dé derét wak, “Guné géraamarék yaké guné yo. Lé kaapuk kiyaalén. Lé bakna widé lé kwao.”

53 Naate wadéka de dérét waagik, kiyaalénké kutdéngdan bege.

54 Waagidaka dé wulæ léku taababa kutte dé lérét wak, “Nyéné mé raap.”

55 Naate wadéka léku wuraanyan tépa gwaa-male yaadéka lé bari raapmék. Raapléka dé Jisas derét wak, “Kadému las kwayégunu lé kaké yo.”

56* Naate wadéka bét léku néwepa lérét véte bét kwagénte yéknwun mawulé yak. Yabétka dé bérét wak, “Béné nak du taakwat wani muké wakwemarék yaké béné yo.” Naate dé léku néwepat wak.

9

Jisas déku duké dé jébaa kwayék

1 Jisas déku duwat waadéka yaadaka dé deké apa kwayék, de wado akwi kutakwa yaage yédoké. Deké nak apa wawo dé kwayék, de kiyakiya yan du taakwa sépékwaapa kapére yan du taakwat wawo kutnébuldoké.

2 Kwayétakne dé derét wak, “Guné ye du taakwat Got némaan ban rate deké miték védéranké kudi wakweké guné yo. Yate guné derét kutnëbulké yo.”

3* Naate watakne dé derét kéga wakwek, “Guné ye yeyé yeyate wupmalemu gwalmu kure yémarék yaké guné yo. Guné kusadagunén mu male kwaadu yéké guné yo. Sétogunékwa baagé, wut, kadému, yéwaa, wani mu kure yémarék yaké guné yo. Baapmu wut vétik kure yémarék yaké guné yo. Guné du taakwat kutkalé yagunu de gunat kutkalé yate wani mu gunéké kwayéké de yo.

4 Guné gat nak wulae wani gaba male raké guné yo. Guné kés ga nak gat yégunu taale ragunén gaba rakwa du wani muké réköréka yamuké guné taale wulaagunén gaba male raké guné yo. Re wani gayéba jébaa yatakne wani ga kulaknyénytakne nak gayét yéké guné yo.

* **8:56:** Mt 8:4 * **9:3:** Lu 10:4-11; Ap 13:51

5 Guné gayét nak yégunu wani gayéba rakwa du taakwa guna kudi véknwumarék yate, gunéké kuk kwayédaran, guné wani gayé kulaknyényké guné yo. Kulaknyényké yate guna maanba kwaakwa bawusa yatputétakne guné yéké guné yo. Guné waga yagunu de véte waké de yo, ‘Naané derét kapéredi mu naanébu yak. Kukba Got yanan kapéredi mu naanat yakataké dé yo.’ Naate waké de yo.”

6 Naate wadéka ye de gege gayéba yeyé yeyak. Yeyé yeyate Gotna kudi wakwete de kiyakiya yan du taakwa, sépkwaapa kapére yan du taakwat wawo de kutnébulék.

Yerot Jisaské dé kudi véknwuk

7-8 Galilina képmaaba rakwa du taakwana némaan ban Yerot dé Jisas yadén jébaaké kudi véknwuk. Dé déku jébaa yadéka de du taakwa las de déké kéga wak, “Gu yaakutakne kiyaan du Jon débu tépa nébéle raapmék.” Wadaka las de wak, “Wan déknyényba ran du Ilaija.” Las de wak, “Gotna yéba kudi wakwen nak du déknyényba kiiae bulaa débu tépa nébéle raapmék.” Naate wadaka Yerot wani kudi dé véknwuk. Véknwudéka déku mawulé kapére yadéka dé sanévéknwu wanévéknwuk.

9 *Yate dé wak, “Wuné wawuréka de Jonna maakna tépakanék. Bulaa nak duké wuné kudi véknwu. Wani du wan kiyadé?” Naate wate dé Jisasnyét véké dé mawulé yak.

* **9:9:** Mk 6:27

Jisas wupmalemu (5,000 pulak) duké dé kadému kwayék

¹⁰ Jisasna du gwaamale yae de Jisasnyét yadan akwi muké wakwek. Wakwedaka dé derét kwole wani taalé kulaknyéntakne de deku kapmu Bet-saidat yék.

¹¹ Yédaka wupmalemu du béré taakwa béré wani muké kudi véknwute de déku kukba yék. Ye déké yaadaka dé vête deké yéknwun mawulé yate dé derét kudi wakwek, Got némaan ban rate du taakwaké miték védéranké. Wakwetakne dé kiyakiya yan du taakwat kutnébulék.

¹² Garabu yadéka de déku du déké yae de wak, “Kén du ramarék taalé. Méné waménu keni du béré taakwa béré de gege gayét ye kadému las kéræ katakne de kwaaké de yo.”

¹³ Naate wadaka dé derét wak, “Guné deké kadému kwayéké guné yo.” Naate wadéka de wak, “Naané wupmalemu kadému kaapuk. Mak-wal bérer naktaba guba kutdan gukwami vétik waga male dé ro. Naané ye wani du taakwaké akwi kadému las kéraanoké méné mawulé yo, kapu yaga pulak?”

¹⁴ Naate de wak, wupmalemu (5,000 pulak) du waba radan bege. Wupmalemu taakwa wupmalemu baadi wawo waba de rak.

Jisasna du waga wadaka dé derét wak, “Guné derét wagunu de kembä kembä (50 pulak 50 pulak) raké de yo.”

¹⁵ Naate wadéka de wadén pulak yadaka de akwi du taakwa kembä kembä rak.

¹⁶ Radaka dé Jisas bérer naktaba gukwami vétik waga kéræ nyérét kwaasawuré vête dé

Gorét wak, “Yéknwun mu ménébu tiyaak. Wan yéknwun.” Naate watakne dé bérét gukwami bule dé déku duké kwayék, de du taakwaké munikwedoké.

¹⁷ Munikwedaka de akwi du béré taakwa béré mitékne kak. Kadaka bérét gukwami las radéka de kébi taaba vétik sékét maanba kayék vétik waga de laawkak.

Pita dé wak, “Jisas wan Got wadén ban Krais”

¹⁸ Nak nyaa dé Jisas Got wale kudi bulte dé kapmu dé rak. Radéka de déku du déké yaak. Yaadaka dé derét waatak, “Du taakwa wunéké yaga de wo?”

¹⁹ *Naate waatadéka de wak, “Ménéké las de wo, ‘Wan gu yaakutaknan du Jon.’ Las de wo, ‘Wan déknyényba rate Gotna yéba kudi wakwen du Ilaija.’ Las de wo, ‘Gotna yéba kudi wakwen nak du déknyényba kiyae débu nébéle raapmék.’ Naate de wo.”

²⁰ *Naate wadaka dé derét wak, “Guné yaga pulak? Guné wunéké yaga guné wo?” Naate wadéka dé Pita dérét wak, “Méné naanat kutkalé yaménué Got wadén ban Krais méné.”

Jisas kiyae tépa nébéle raapdéranké dé wakwek

²¹ Pita waga wadéka dé Jisas déku duwat wak, “Mé véknwu. Guné nak duwat kéga wamarék yaké guné yo, ‘Jisas wan naanat kutkalé yaduké Got wadén ban Krais.’ Waga wamarék yaké guné yo.”

²² Naate watakne dé derét wak, “Wuné Akwi Du Taakwana Nyaan wuné ro. Wunat kapéredi

* ^{9:19:} Mk 6:14-16 * ^{9:20:} Jo 6:68-69

mu yado kubu du, Gotna gaba jébaa yakwa nyédé duna némaan du, apa kudiké kudéngkwa du waga de wunat kuk tiyaaké de yo. Tiyaado wunat viyaapérekdo kiyaaké wuné yo. Kiyaawuru nyaa kupuk yédu Got wadu wuné tépa nébélé raapké wuné yo.”

23 *Wani kudi watakne dé derét kéga wakwek, “Guné wuné wale yaate wuna jébaa yaké mawulé yagunéran kéga yaké guné yo. Akwi nyaa guné guna mawulé kulaknyényé guné yo. Kulaknyénye guné wunéké sanévéknwute kéga waké guné yo, ‘Naané déku jébaa kutsaakuké naané yo. Yate naané kaagél kutte miba kiyanaran wan bakna mu. Némaa mu kaapuk.’ Naate wate wuna jébaa kutké guné yo.

24 *Wunéké sanévéknwukwa du taakwa wuna jébaa kutsaakudo wuna maama derét viyaapérekdaran de wuné wale miték rasaakuké de yo apuba apuba. Wunéké sanévéknwumarék yakwa du taakwa deku sépéké male sanévéknwute deku jébaa male yadaran de kiiae yalakgé de yo. Wuné wale rasaakumarék yaké de yo.

25 Du taakwa keni képmaana gwalmu akwi kéraaké sanévéknwute, deku jébaa male yadaran, kiiae yaga pulak de miték rasaakuké de yo? Kaapuk. Miték rasaakumarék yaké de yo.

26 *Du taakwa wuna kudiké kélélik yate wunéké kuk tiyaadaran kukba wuné Akwi Du Taakwana Nyaan gwaamale yae deké kuk kwayéké wuné

* **9:23:** Mt 10:38-39

* **9:24:** Jo 12:25

* **9:26:** Lu 12:9

yo. Wani tulé wuné wuna yaapat apa kéræ déku kudi kure giyaakwa duwat wawo apa kéræ nyaa vékwa pulak rate giyaaké wuné yo.

²⁷ Gunat wuné wakweyo. Guné kéba tékwa du las kiyaamarék yate wekna rate véké guné yo, Got némaan ban rate déku du taakwaké miték védu.” Naate dé déku duwat wak.

Jisasna sépé walaakwe dé nak pulak yak

²⁸ **Kukba nyaa nak taaba sékét nak taababa kayék kupuk pulak yédéka dé Jisas Pita, Jon, Jemsnyét wawo waga kwole de nébat waarek. Jisas Got wale kudi bulké mawulé yate dé nébat waarek.

²⁹ Waare rate Got wale kudi buldéka déku ménidäama walaakwe dé nak pulak yak. Yadéka déku baapmu wut waamat kapére yate dé kayénarék.

³⁰⁻³¹ *Yadéka déknyényba rate Gotna yéba kudi wakwen du Moses bét Ilaija, Gotna gayéba bari giyae bét apa yate nyaa vékwa pulak téte Jisas wale kudi de bulék. Dé Gotna kudi véknwute Jerusalemba rate kiyaadéranké de kudi bulék.

³² Buldaka Pita dé wale yaan du vétik deku méni widé yadéka de widé kwaak. Kuae ligéne raapme de vék Jissasna sépé nyaa pulak védéka wani du vétik dé wale tébétka.

³³ Védaka bét yéké yabétka dé Pita miték kutdengmarék yate dé Jisasnyét wak, “Némaan Ban, naané kéba ranakwa wan yéknwun. Naané ga kupuk kaaké naané yo. Ménéké nak, Moseské nak, Ilaijaké nak.”

* **9:28:** Lu 8:51

* **9:28:** 2 Pi 1:17-18

* **9:30-31:** Lu 13:33

34 Naate wadéka buwi nak giyae dé derét taknatépék. Taknatépédéka de wup yak.

35* Yadaka dé kudi nak wani buwiba gwaade dé wak, “Kén wuna nyaan. Wuné dérét wawurék dé gunéké yék. Guné déku kudi mé véknwu.”

36 Wani kudi wadéka véknwutakne de vék Jisas kapmu tédéka. Véte kudi las kaapuk buldan. Yate wani tulé védan muké akwi duwat kaapuk wakwedan.

Kutakwa kure téen nyaanét dé Jisas kutnébulék

37 Nak nyaané kulaknyéntakne giyaadaka de wupmalemu du béré taakwa béré Jisaské yaak.

38 Yae de wale yaan du nak dé némaanba waak, “Némaan du, wuné ménat wuné waato, méné wuna du nyaanét véménuké. Wuné nyaan naku-rak male. Nak baadi kaapuk.

39 Kutakwa nak dérét kure téte dérét viyaaléka dé némaanba gureknu. Yadéka lé dérét yaalébaanléka dé waama sépmeny déku kudiba yaalo. Déku sépé yaalébaante lé dérét kulaknyéntakne yémuké kélik yo.

40 Yaléka wuné ména duwat waatak, de wado wani kutakwa yaage yéluké. Waatawuréka de waga yaké de yapatik.”

41 Naate wadéka dé Jisas wak, “Yaga pulak? Guné wunéké kaapuk miték sanévéknwugunékwa. Guna mawulé kaapuk miték tékwa. Wuné wupmalemu baapmu guné wale rawuréka guné wunéké kaapuk miték sanévéknwugunékwa. Méné ména nyaanét mé kure yaa.”

* **9:35:** Mt 12:17-18; Lu 3:22

42 Naate wadéka wani nyaan wekna yaadéka lé wani kutakwa dérét viyaate takubalaakuléka dé képmaaba akérék. Akérédéka dé Jisas wani kutakwat waatite dé lérét wak, lé wani nyaanét kulaknyéntakne yaage yéluké. Wadéka yaage yéléka nyaan yéknwun yadéka dé Jisas dérét dé déku yaapaké kwayék.

43 Yadéka de waba tén du taakwa wani jébaa vétakne Gotna apaké sanévéknwu wanévéknwute de akwi kwagénék.

Jisas kiyaadéranké dé tépa kudi wakwek

Wani du taakwa Jisas yadén akwi muké wekna sanévéknwu wanévéknwudaka dé Jisas déku duwat kudi dé wakwek.

44 Kéga dé wak, “Guné guna waan kwekére miték mé véknwu. Kukba de wuné Akwi Du Taak-wana Nyaanét maamaké kwayédo wuné deku taababa raké wuné yo.”

45 Naate wadéka Got wakwedéka de wani kudiké las kaapuk miték kudéngdan. Yate de wani kudiké Jisasnyét waatamuké wup yak.

Némaan banké dé Jisas kudi wakwek

46 *Jisasna du deku kapmu bulte deku némaan banké de waaruk.

47 Waarudaka dé Jisas deku mawulé kudéngte dé nyaanét nak kure yaadéka dé wale dé ték.

48 Tédéka dé derét wak, “Mé véknwu. Guné wunéké sanévéknwute keni nyaanét kutkalé yate guné wunat wawo guné kutkalé yo. Guné wunat kutkalé yate guné wunat wadéka yaawurén banét wawo guné kutkalé yo. Guné wale rate

* **9:46:** Lu 22:24-27, 14:11

déku yéba kevérékmarék yate gunéké jébaa yaran ban Gotna méniba dé némaan ban dé ro.”

Déké kuk kwayémärék yakwa du déku du radak-waké dé wakwek

⁴⁹ Jisas wani kudi wadéka Jon dé dérét wak, “Némaan ban, du nak ména yéba kutakwat wadéka yaage yédaka naané vék. Dé naané wale kaapuk yeyé yeyadékwa. Yadéka naané dérét wak, wani jébaa yamarék yaduké.”

⁵⁰ Naate wadéka dé Jisas dérét wak, “Guné wani jébaa yamarék yaduké dérét waatimarék yaké guné yo. Gunéké kuk kwayémärék yakwa du wan guna du de ro.” Naate dé derét wak.

Sameriana du taakwa las de Jisaské kélék yak

⁵¹* Got Jisasnyét déku gayét kure waarédéran tulé yaaké yadéka dé Jisas déku mawuléba sanévéknwute dé Jerusalemét yéké mawulé yak.

⁵² Yate duwat las wadéka de taale déku kudi kure yék. Ye de Sameriaba tékwa gayéba nak wulaak, déké gwalmu kawu saakéraké.

⁵³ Yadaka de wani gayéba rakwa du taakwa Jisas Jerusalemét yédéranké de kutdéngék. Kutdéngte de déké kélék yate de wak, “Kaapuk. Dé naana gayéba yaalamarék yaké dé yo.” Naate de wak, Sameriana du taakwa Judana du taakwa, deku némaa gayé Jerusalemké wawo kélék yadakwa bege.

⁵⁴ Wadaka Jisasna du vétik Jemés bét Jon véte bét Jisasnyét wak, “Némaan Ban, méné mawulé yaménérän ané watu dé Gotna gayéba yaa giyae

* ^{9:51:} Lu 17:11

dé wani du taakwat yaanké yo. Ané waga watuké méné mawulé yo, kapu yaga pulak?”

⁵⁵ Naate wabétka dé walaakwe dé wak, “Kaa-puk. Waga yamarék yaké béné yo.”

⁵⁶ Naate watakne dé déku du wale de nak gayét yék.

Jisas wale yeyé yeyaké mawulé yan duwat dé wakwek

⁵⁷ Jisas déku du wale yaabuba yédaka dé du nak yae dérét wak, “Wuné méné wale yeyé yeyaké wuné mawulé yo. Yéménérān akwi taalat wuné wawo yéké wuné yo.”

⁵⁸ Naate wadéka dé déku mawuléba dé wak, “Wani du wadén pulak yaké dé yo kapu kaa-puk?” Naate sanévéknwute dé dérét wak, “Miték mé sanévéknwu. Kwatbosa de képmáaba tékwa waaguba de kwao. Api deku kwaatba de kwao. Wuné Akwi Du Taakwana Nyaan kwaawuréran ga nak kaapuk tékwa.”

⁵⁹* Naate watakne dé nak dut wak, “Méné wuné wale yaaké méné yo.” Naate wadéka dé wak, “Némaan Ban, méné kusékétménérān taale wuné ye rawuru wuna yaapa kiyaadu wuné déku gaaba ségwi kérae rémké wuné yo.”

⁶⁰ Naate wadéka dé dérét wak, “Aya. Bulaa wuné wale mé yaa. Wuna kudi véknwumárék yakwa du taakwa de kiyaan du taakwa pulak de ro. Wani du taakwa kiyaan du taakwat rémké de yo. Méné bulaa wuna jébaa yate ye du taakwat kudi wakweké méné yo, Got némaan ban rate deké miték védéranké.”

* **9:59:** Lu 14:26, 33

61 Naate wadéka dé nak du Jisasnyét wak, “Némaan Ban, wuné méné wale yéké wuné yo. Méné kusékétménérān taale wuné wuna gayét ye wuna kémét taaba kutké wuné yo.”

62 *Naate wadéka dé dérét wak, “Du taakwa Gotké jébaa batnyé yate kukba kés jébaa nak jébaaké sanévéknwudaran de Gotna jébaa yaké de yapatiké de yo.” Naate dé Jisas wak.

10

Jisas wupmalemu (72) duwat wadéka de yék

1 *Kukba dé Jisas wupmalemu (72) duwat las wawo wadéka de yaak. Yaadaka dé derét wak, “Guné vétik vétik waga taale yéké guné yo. Wuné kukba yéwuréran akwi gayét guné taale yéké guné yo.”

2 *Naate watakne dé derét wak, “Kadému yaanannan képmaaba wupmalemu kadému ak yate dé tu. Tédéka walkamu du male de jébaa yo. Ak yan kadému wan Gotna kudi véknwuké mawulé yaran du taakwa pulak. Got wan képmaana bapadu pulak. Guné Gorét waataké guné yo, dé wadu wupmalemu jébaa yakwa du las wawo guné wale jébaa yaké de yo.

3 *Bulaa gunat wuné wakweyo, wuna jébaa yagunuké. Kwathbosa sipsipmét yaalébaandakwa pulak, du las gunat yaalébaanké de yo.

4 *Guné yéwaa, wut wawo kure yémarék yaké guné yo. Su kusadamarék yaké guné yo. Guné

* **9:62:** Pl 3:13 * **10:1:** Mk 6:7 * **10:2:** Jo 4:35 * **10:3:** Mt 10:16 * **10:4:** Mt 10:7-14

yaabuba yéte bari yéké guné yo. Nak du taakwa wale kudi bulké bakna témarék yaké guné yo.

5 Guné gat nak wulae taale guné waba rakwa du taakwat kéga waké guné yo, ‘Gunéwa rakwa. Yéknwun mawulé yaké guné yo.’

6 Naate wagunu waba rakwa du taakwa gunéké yéknwun mawulé yadaran Got derét kutkalé yadu de miték raké de yo. Waba rakwa du taakwa gunéké yéknwun mawulé yamarék yate gunéké kuk kwayédaran, Got derét kutkalé yamarék yaké dé yo. Got gunat kutkalé yadu guné miték raké guné yo.

7* Guné taale wulaagunén gaba male raké guné yo. Kés ga nak gat wulaamarék yaké guné yo. Wani gaba rate de kwayéran kadému gu kaké guné yo. Wani kadému gu nyégélké guné yo, de wale yagunéran jébaaké. Wani gaba re kukba yéké guné yo.

8 “Guné gayét nak wulaagunu waba raran du taakwa gunéké yéknwun mawulé yadaran guné kwayédaran kadému kaké guné yo.

9 Yate gayéba kiyakiya ye raran du taakwat kutnëbulké guné yo. Yate derét waké guné yo, ‘Got némaan ban rate du taakwaké miték védéran tulé keni dé yao.’

10-11*“Guné gayét nak wulaagunu wani gayéba rakwa du taakwa gunéké kélélik yadaran guné ye wani gayéna yaabuba téte guné kéga waké guné yo, ‘Naané gunéké naané kuk kwayu. Got wawo gunéké dé kuk kwayu. Kuk kwayédékwaké guné kudénggunuké naané keni gayéba rakwa bawusa

* **10:7:** 1 Ko 9:6-7; 1 Ti 5:18

* **10:10-11:** Ap 13:50-51

naana maanba kwaadéka yatputétaknanaka guné vu. Guné keni muké kutdéngké guné yo. Got némaan ban rate du taakwaké miték védérán tulé keni dé yao. Yaadéka guné déku kembá wulaamuké guné kélik yo.’ Naate guné derét waké guné yo.

¹² *Wani gayéba rakwa du taakwaké wuné gunat wakweyo. Déknyényba Sodomba ran du taakwa de kapéredi mu yak. Kukba Got apakélé kot véknwute némaan ban raran nyaa dé wadu Sodomba ran du taakwa kaagél kutké de yo. Du taakwa naanéké kuk tiyaadaran wani nakurak kapéredi mu Sodomba ran du taakwa yadan kapéredi mat talaknaké dé yo. Wani nyaa Got wadu naanéké kuk tiyaaran du taakwa apakélé kaagél kutké de yo.”

Du taakwa Jisaské kuk kwayédanké dé wakwek

¹³ Wani kudi watakne dé Jisas kéga wakwek: “Kape du taakwa, guné Korasinba rakwa du taakwa. Kape du taakwa, guné Betsaidaba rakwa du taakwa. Wuné guna gayéba rate wuné apa jébaa wuné yak. Yawuréka guné vék. Vété guné Gotké kaapuk miték sanévéknwugunén. Taiaba déknyényba ran du taakwa, Saidonba déknyényba ran du taakwa wawo, Gotké kutdéngmarék ye wani apa jébaa védo mukatik, déknyényba de yadan kapéredi muké kélik yate, wani kapéredi mu kulaknyénykatik de yak. Yadan kapéredi muké kélik yate nak du taakwa deku mawuléké kutdéngdoké de jégwaa baapmu wut kusade bawuba rakanik de yak.

* **10:12:** Jen 19:24-25

14 Kukba Got apakélé kot véknwute némaan ban raran nyaa dé wadu de Taiaba déknyényba ran du taakwa, Saidonba déknyényba ran du taakwa wawo, de kaagél kutké de yo. Guné Korasinba rakwa du taakwa, Betsaidaba rakwa du taakwa wawo, guné wuna jébaa véte guné wunéké kuk tiyaak. Kuk tiyaagunéka wani nakurak kapéredi mu de yan akwi kapéredi mat débu talaknak. Wani nyaa Got wadu guné apakélé kaagél kutké guné yo.

15 Guné Kapaneamba rakwa du taakwa, guné saaki guné wo, ‘Naané Gotna gayét waaréké naané yo.’ Naate wagunéka gunat wuné wo. Got wadu guné kapéredi taalat dawuliké guné yo. Guné Gotna gayét waarémarék yaké guné yo.”

16 *Wani kudi watakne dé déku duwat kéga wak, “Guna kudi véknwuran du taakwa de wuna kudi véknwuké de yo. Gunéké kuk kwayéran du taakwa de wunéké kuk tiyaaké de yo. Wunéké kuk tiyaaran du taakwa de wunat wadéka giyaawurén banké kuk kwayéké dé yo.” Naate wadéka déku kudi wakweké de yék.

Jisasna jébaa yakwa du de tépa gwaamale yaak

17 Kukba wani wupmalemu (72) du Jisasna jébaa ye yéknwun mawulé yate de gwaamale yaak. Yae de dérét wak, “Némaan Ban, naané ména yéba wanaka de akwi kutakwa naana kudi véknwuk. Véknwutakne du taakwat kulknyéntakne de yaage yék.”

* **10:16:** Jo 5:23

18 *Naate wadaka dé derét wak, “Guné waga yagunéka nyét kulabidéka yaa giyaadékwa pulak, Seten awuréba rate giyaadéka wuné vék.

19 *Mé véknwu. Wuné gunéké apa wunébu kwayék. Kwayéwurén guné kaabe kulamagat wawo akigunu de gunat yaalébaanmarék yaké de yo. Kwayéwurén guna apa Setenna apat talaknaké dé yo. Talaknadu dé gunat yaalébaanmarék yaké dé yo.

20 *Akwi kutakwa guna kudi véknwudaka guné wani muké yéknwun mawulé guné yo. Wani muké guné sanévéknwu wanévéknwumarék yaké guné yo. Kéni muké mé sanévéknwu. Guné Gotna kémba yaalagunéka dé guna yé déku nyégaba débu kavik. Wani muké sanévéknwute guné yéknwun mawulé yate dusék yaké guné yo.” Naate dé Jisas derét wak.

Jisas yéknwun mawulé yate dé Gorét wak

21 *Wani tulé dé Gotna Yaamabi Jisasna mawuléba wulae tédéka dé yéknwun mawulé yate dé wak, “Méné wuna yaapa, méné nyét képmaaké némaan ban méné ro. Ména jébaaké las paakuménéka wupmale muké kutdéngkwa du taakwa ména jébaaké kaapuk miték kutdéngdan. Wupmale muké kutdéngmarék yakwa du taakwa, deku mawulé baadina mawulé tékwa pulak tédéka kwatkwa radaka derét ména jébaa ménébu wakwatnyék. Ména mawuléba

* **10:18:** Re 12:8-9 * **10:19:** Sam 91:13 * **10:20:** Re 3:5, 20:12

* **10:21:** Lu 8:9-10

sanévéknwute ménébu waga yak. Waga yaménén wan yéknwun.”

22 *Naate Gorét watakne dé wak, “Wuna yaapa dé wunéké déku jébaa apa wawo débu tiyaak. Wuné déku nyaan rawuréka de du taakwa wunéké kaapuk miték kudéngdan. Dé male dé wunéké kudéngék. Du taakwa déké kaapuk miték kudéngdan. Wuné male wuné déké kudéngék. Déké wakwewurén du taakwa wawo de déké kudéngék.”

23-24 *Wani kudi wadéka déku du male dé wale radaka dé deké walaakwe dé derét wak, “Gunat wunébu wakwek Gotna jébaaké. Gotna yéba déknyényba kudi wakwen du némaan du wawo de yawuréka végunékwa jébaa véké mawulé yate de kaapuk védan. Yate de wakwewuréka véknugunékwa kudi véknwuké mawulé yate de kaapuk véknwudan. Got gunat kutkalé yadéka guné wani jébaa gunébu vék.”

Sameriana du déku maamaké mawulé lékdénké dé wakwek

25 *Wani kudi wadéka dé apa kudiké yakwatnyékwa du nak déku mawuléba dé wak, “Jisas wuna kudi kaatare sal kapéredi kudi waké dé yo?” Naate sanévéknwute dé dérét wak, “Gotna jébaaké naanat yakwatnyékwa du, wuné samu ye kulé mawulé kérae apuba apuba miték rasaakuké wuné yo?”

26 Naate waatadéka dé dérét wak, “Samu kudi guna apa kudiba dé kwao? Gotna nyégaba yaga de kavik?”

* **10:22:** Jo 3:35 * **10:23-24:** 1 Pi 1:10 * **10:25:** Mt 22:34-40

27* Naate wadéka dé wak, “Guné guna Némaan Ban Gotké mawulat kapére yaké guné yo. Yate guné dérét wagunu dé guna sépé, guna apa, guna mawulé, guna wuraanyan, guna yaamabiké dé némaan ban raké dé yo. Guné guna sépéké mawulat kapére yagunékwa pulak, nak du taakwaké mawulat kapére yaké guné yo. Yate derét kutkalé yaké guné yo.”

28* Naate wadéka dé dérét wak, “Wan miték méné wo. Méné waga yaménérān méné kulé mawulé kérāe apuba apuba miték rasaakuké méné yo.”

29 Jisas waga wadéka wani du dé mawulé yak, nak du taakwa déku yéba kevérékdoké. Yate dé Jisasnyét waatak, “Yani du taakwat kutkalé yaké wuné yo?”

30 Jisas déku kudi kaatake dé keni kudi wakwek: “Judana du nak Jerusalem kulaknyéntakne dé Jerikot dawuliké nae yaabuba yék. Yédéka de sél yakwa du dérét yaabuba vék. Véte dérét kulékiye déku gwalmu kéraate de dérét némaanba viyaak. Viyaatakne yédaka dé yaabuba kwae dé kiyaaké yak.

31 Yadéka wani tulé dé Gotna gaba jébaa yakwa nyédé du nak wani yaabuba yék. Ye wani dut vétakne yaabuna nak saknwuba yéte dérét talakkatakne dé yék.

32 Yédéka dé Gotna gaba jébaa yakwa nak du Livaina kémna du nak ye dérét vétakne dé wawo dérét kulaknyéntakne yaabu nak saknwuba dé yék.

* **10:27:** Diu 6:5 * **10:28:** Ro 10:5

33 *Yédéka dé Sameriana du nak wani yaabuba ye dé wani du kwaan saabak. Guné kutdéngék. Judana du de Sameriana duké de kélék yo. Sameriana du saabe Judana du waba kwaadéka véte dé déké mawulé léknék.

34 Mawulé lékte déké ye viyaadanba waasé yakutnyétakne marasin kavitakne dé gik. Gitakne dé wani dut kéræe déku donkiba taknadéka dé rak. Radéka dé yaabuba yéte gaan yadéka yéwaa kwayéte kwaadakwa gat nak kure ye dé waba dérét kutkalé yak.

35 Yate gaan kwae ganba yéte yéwaa las wani gana bapaduké kwayéte dé dérét wak, ‘Méné kéni duké miték véké méné yo. Yate wani dut kutkalé yaké, ména yéwaa las kwayéménéran wuné gwaamale yae ména yéwaa kaataké wuné yo.’ Naate watakne dé yék.

36 “Bulaa yaga méné sanévéknwu? Du kupuk de wani yaabuba yék. Ye kiyadé sél yakwa du viyaadan dut kutkalé yak?”

37 Naate wadéka dé wak, “Déké mawulé léknén du dé dérét kutkalé yak.” Naate wadéka dé dérét wak, “Méné ye méné waga male yaké yo.” Naate dé Jisas wak.

Jisas dé Maria bét Mata wale kudi bulék

38-39 *Jisas déku du wale de yék. Ye gayét nak de wulaak. Wani gayéba taakwa nak léku yé Mata, léku wayékna Maria wale bét rak. Rate lé Mata Jisasnyét wak, dé yae bétku gaba kadému kaduké. Waléka wulæ radéka léku wayékna Maria yae lé

* **10:33:** Jo 4:9 * **10:38-39:** Jo 11:1-2

Némaan Ban Jisasna maan wale rate lé déku kudi véknwuk.

⁴⁰ Véknwuléka lé Mata wupmalemu jébaa yate lé kadému kawu saakérak. Yate Maria bakna raléka véléka léku mawulé kaapuk miték yan. Yadéka lé Mata Jisaské yae lé dérét wak, “Némaan Ban, wuna wayékna bakna raléka wuné kapmu jébaa yate kadému wuné séraknu. Yawurékwaké méné sanévéknwu, kapu kaapuk? Méné lérét waménu lé yaalu ané kadému sérakgé ané yo.”

⁴¹ *Naate waléka dé Némaan Ban lérét wak, “Nyéné, Mata, nyéné wupmalemu gwalmuké nyéné sanévéknwu wanévéknwu.

⁴² Nyéné kéni nakurak yéknwun muké kaapuk sanévéknwunyénékwa. Wuna kudi véknwunyénéran mu wan yéknwun mu. Maria wani yéknwun muké lé mawulé yo. Yalu wuné lé yéluké wamarék yaké wuné yo. Lé wuna kudi véknwuké lé yo.” Naate dé Jisas Matat wak.

11

Gorét waatadaranké dé Jisas kudi wakwek

¹ Nak nyaa Jisas nak taaléba dé Got wale kudi bulte rak. Kudi bulbutitakne radéka dé déku du nak yae dé dérét wak, “Déknyényba gu yaakutaknan du Jon dé déku duwat yakwatnyék, Gorét waatadaranké. Derét yakwatnyédén pulak méné naanat yakwatnyéké méné yo, Gorét waata-naranké. Waga yaménuké naané mawulé yo.”

² Naate wadéka dé dérét wak, “Guné Gorét waataké mawulé yate kéga waké guné yo:

* **10:41:** Jo 6:27

Naana yaapa, naané ména yéba kevérékgé
naané mawulé yo.

Méné némaan ban rate akwi du taakwaké
miték véménuqué naané mawulé yo.

³ Akwi nyaa yapatinakwa kadému
tiyaaménuqué naané ménat waato.

⁴ Du taakwa naanat kapéredi mu
yadaka naané wani muké tépa kaapuk
sanévéknwunakwa.

Yano méné yanan kapéredi mu yatnyéputiye
méné wani muké tépa sanévéknwumarék
yaké méné yo.

Méné naanat kutkalé yaménu naané kapéredi
mu tépa yamarék yaké naané yo. ‘Waga
naané ménat waato.’

Naate dé wak.

⁵⁻⁶ Watakne dé derét kéga wak, “Sal guna du
nak kéga yaké dé yo? Du nak gaan yadéka nyédé
gubés dé déku duké yék. Ye dé gana gwésba téte
dé waak, ‘Wuna du, wunéké kadému las tiyaaké
méné yo. Bulaa wuna du nak dé nak gayét yéké
yate yaabuba yéte dé wuna ga saabak. Saabadéka
wuna kadému las kaapuk rakwa. Méné wunéké
kadému las tiyaaménu wuné kukba kwayémataké
wuné yo.’

⁷ Naate waadéka dé awula gaba ran du wak,
‘Bulaa wani muké wunat waatamarék yaké méné
yo. Gwés wunébu tépé. Wuna baadi wuné
wale widé de kwao. Bulaa wuné raapme ménéké
kadému kwayémataké yaké wuné yo.’ Naate dé
wak.

⁸* Gunat wuné wakweyo. Dé ‘Wuna du’ naate,

* **11:8:** Lu 18:5

dé raapme kadému déké kwayémarék yaké dé yo. Wani du déku gwésba téte waasaakudu dé widé kwaaké mawulé yate, dé raapme wani du mawulé yadékwa kadému déké kwayéké dé yo.

9 *“Gunat wuné wakweyo. Guné Gorét waatasaakugunéran dé gunéké kwayéké dé yo. Kéni aja kudi mé véknwu. Guné sékalte sékalte véké guné yo. Guné gwésba viyaasaakugunéran gwés naapiké dé yo.

10 Du taakwa Gorét waatadaran dé deké akwi kwayéké dé yo. Du taakwa sékalte sékalte de akwi véké de yo. Du taakwa gwésba viyaadaran gwés naapiké dé yo. Guné wani aja kudi véknwute guné Gorét waatasaakuké guné yo. Waatagunu dé guna kudi véknwuké dé yo.

11 “Kéni kudi wawo mé véknwu. Guné yaapa, guna baadi gukwami kwayégunuké wado, guné kaabe kéræe kwayéké guné yo, kapu yaga pulak? Wan kaapuk. Guné deké gukwami kwayéké guné yo.

12 Guna baadi séraa gék kwayégunuké wado guné kulamagu kéræe kwayéké guné yo, kapu yaga pulak? Wan kaapuk. Guné deké séraa gék kwayéké guné yo.

13 Bulaa wani kudiké mé sanévéknwu. Guné kapéredi mawulé yakwa du rate guné guna baadiké yéknwun mu guné kwayu. Awuréba rakwa ban guna yaapa yéknwun mawulé yakwa du rate gunat talakne déku Yaamabi kwayéké dé yo, dérét waatakwa du taakwaké.” Naate dé derét wak.

* **11:9:** Jo 14:13-16

Jisas Bielsebul wale jébaa yadékwaké de wak

14*Kutakwa dut nak kure téléka dé kudi kaapuk buldén. Yadéka Jisas wani kutakwat wadéka lé wani dut kulaknyénytakne lé yaage yék. Yaage yéléka dé tépa kudi bulék. Buldéka de du taakwa wani muké sanévéknwu wanévéknwuk.

15Yadaka de du las wak, “Jisasna mawuléba akwi kutakwana némaan ban déku yé Bielsebul dé wulae tu. Téte apa kwayédéka dé wadéka de kutakwa yaage yu.”

16*Naate wadaka las de déréti wak, “Méné déknyényba vémárék yanan apa jébaa nak yaménu naané véte kudéngké naané yo, Got déku jébaa yaménuké ménat wadénké.”

17Naate wadaka Jisas deku mawulé kudéngte dé deréti wak, “Kéni kudi mé véknwu. Némaa gayéba rakwa du mawulé vétik yate kémba kémba rate waariyadarán de rasaakumarék yaké de yo. Nakurak gaba rakwa du taakwa mawulé vétik yate deku kapmu waariyadarán de wawo rasaakumarék yaké de yo.

18Wani kudiké sanévéknwute akwi kutakwana némaan ban Seten déku du waleké mé sanévéknwu. De mawulé vétik yate deku du taakwa wale waariyadarán de rasaakumarék yaké de yo. Guné wunat wagunén pulak Seten déku du taakwa yaage yédoké wadérón de rasaakumarék yaké de yo. Seten waga jébaa kaapuk yadékwa.

19Guné wunéké keni kudi guné wo. Akwi kutakwana némaan ban Bielsebul wuna mawuléba

* **11:14:** Mt 9:32-34

* **11:16:** Mt 12:38, 16:1

téte wunéké apa tiyaadéka wuné wawuréka de kutakwa yaage yu. Wan yénaa kudi guné wo. Guna du las de wawo wadaka de kutakwa yaage yu. Guna du waga yadaka guné derét kéga kaapuk wagunékwa, ‘Bielsebul guna mawuléba téte apa kwayédéka guné wagunékwa de kutakwa yaage yu.’ Derét waga wamarék yate samuké guné wunat wani kudi guné wo? Wuné de wale nakurak jébaa yawuréka de de kutdéngék. Guné wunéké yénaa kudi guné wo.

20 Mé véknwu. Got wunéké apa dé tiyao. Tiyaadéka wuné kutakwat wawuréka de yaage yu. Got wunéké waga apa tiyaadénké guné véte kutdéngké guné yo. Got némaan ban rate du taakwaké miték védéran tulé débu yaak.

21-22 *“Kéni kudi mé véknwu. Apa yakwa du waariyadékwa mu kure déku gaké téségédéran déku gwalmu akwi miték raké dé yo. Radu apat kapére yakwa du nak yae wani du wale waariye déku vi waariyadékwa nak mu wawo kéræe déku gwalmu wawo kéraaké dé yo. Kéræe dé wani gwalmu nak duké munikweké dé yo. Seten wani apa yakwa du pulak. Wuné apat kapére yakwa du pulak. Wuna apa Setenna apat débu talaknak.

23 “Wuné wale jébaa yamarék yakwa du taakwa de wuna maama de ro. Wuné du taakwat wawuréka de wuna kém̄ba de ro. Wuna du taakwat kutkalé yamarék yakwa du taakwa de wuna du taakwat yaalébaanu.”

Kutakwa yaage ye gwaamale yaalénké dé wak-wek

* **11:21-22:** Kl 2:15

24 Wani kudi watakné dé Jisas derét kéga wakwek, “Kéni kudi mé véknwu. Kutakwa ye lé nak duna mawuléba wulæ te kulaknyénytakne lé yék. Maas viyaamarék yakwa taaléba yeyé yeyate ralérən taaléké lé sékalék. Sékalpatiye lé wak, ‘Wuné déknyényba rawurén gat gwaamale yéké wuné yo.’”

25 Naate watakné gwaamale yae lé vék wani duna mawulé yéknwun ye bakna tédéka.

26 Vétakne ye lé kutakwa nak taaba sékét nak taababa kayék vétiknét kwole yaak. Kwole yaalén kutakwa yadan kapéredi mu taale yaan kutakwa yalén kapéredi mat débu talaknak. Wani kutakwa akwi de wani duna mawuléba wulæ ték. Déknyényba nakurak kutakwa déku mawuléba wulæ téléka dé wani du walkamu kapéredi mu dé yak. Wupmalemu kutakwa déku mawuléba wulæ tédaka dé wupmalemu kapéredi mu yak.”

Got derét kutkalé yadéranké dé Jisas wakwek

27 Jisas wani kudi wakwedéka de dé wale ténu wupmalemu du taakwa wani kudi véknwuk. Véknwute lé taakwa nak némaanba kéga dérét waak, “Déknyényba ménat kérae ménéké munyaa kwayén taakwat Got kutkalé yadu lé yéknwun mawulé yate miték raké lé yo.”

28 *Naate waléka dé Jisas wak, “Wan adél. Wani muké sanévéknwumarék yate kéni muké mé sanévéknwu. Gotna kudi véknwute wadékwa pulak yaran du taakwat Got kutkalé yadu dé yéknwun mawulé yate miték male raké de yo.” Naate dé Jisas wak.

* **11:28:** Lu 8:21; Re 1:3

Jisas Jona yan pulak apa jébaa yadéranké dé wakwek

²⁹ Wupmalemu du béré taakwa béré yaate jawudaka dé derét kéga wakwek, “Kéni tulé rakwa du taakwa kapéredi mu de yasaaku. Wunat de waato, wuné déknyényba vémarék yadan apa jébaa yate Gotna apaké derét wakwatnyewuruké. Gotna yéba kudi wakwen du Jona yadén apa jébaa pulak male yaké wuné yo. Nak apa jébaa deké yamarék yaké wuné yo.

³⁰ Déknyényba Jona Ninivat ye dé yadan kapéredi muké derét kudi wakwek. Jona yadén pulak wuné yo. Wuné Akwi Du Taakwana Nyaan wuné kéni tulé rakwa du taakwat yadan kapéredi muké kudi wakweyo.

³¹ Déknyényba némaa taakwa nak, séknaa képmaaba yae lé némaan ban Solomonna kudi véknwuké lé séknaa yaabuba yék. Dé yéknwun mawulé pukaakwa du radéka wuné kéba téte guné wale kudi bulkwa du wuné yéknwun mawulé pukaakwa du rate Solomonét wunébu talaknak. Kukba Got némaa kot véknwute némaan ban radérán tulé wani némaa taakwa raapme Gotna méniba téte lé gunat waké lé yo, ‘Wuné séknaa saaknaba wuné yaak. Yae Solomonna kudi wuné véknwuk. Jisasna kudi Solomonna kudit débu talaknak. Guné Jisasna kudi kaapuk véknwugunén. Waga yate némaa kapéredi mu guné yak.’ Waga wani taakwa waké lé yo.

³² Déknyényba Ninivaba ran du taakwa de Jona kudi véknwutakne yadan kapéredi mu de kulaknyényék. Jona némaan du radéka wuné kéba téte kudi bulkwa du wuné némaan ban rate

Jonat wunébu talaknak. Kukba Got némaa kot véknwute némaan ban radéran tulé Ninivaba ran du taakwa Gotna méniba téte de gunat waké de yo, ‘Jona naanat Gotna kudi wakwedéka naané véknwute yanan kapéredi mu kulaknyéntakne naané Gotna kudi miték véknwuk. Jisas Jonat talakne gunat Gotna kudi wakwedéka guné yagunén kapéredi mu kulaknyénymarék yatakne guné Gotna kudi kaapuk véknwugunén. Waga yate guné némaa kapéredi mu yak.’ Naate waké de yo gunat.”

Miték male radaranké dé Jisas kudi wakwek

³³ Wani kudi watakne dé derét kéga wakwek, “Kéni aja kudi mé véknwu. Du téwayé sérakne kure yae sapgutaknadan awu gwaléba kaapuk paakutaknadakwa. De jaabéba de akutakno. Akutaknadaka waba rakwa akwi du taakwa de miték vu.

³⁴ Guna méni wan gaba tékwa gwés pulak. Wani gwés naapidaka gaba nyaaka dé yo. Guné yéknwun mu male végunéran guna mawulé miték téké dé yo. Yadu guna sépé miték tédu guné nyaakaba raké guné yo. Guné kapéredi mu male végunéran guna mawulé miték témarék yaké dé yo. Guna mawulé miték témarék yadéran guna sépé miték témarék yadu guné gaankétéba raké guné yo.

³⁵ Guné waga ramuké guné jérawu yaké guné yo.

³⁶ Guna mawulé miték male téderan guné nyaakaba male rate yéknwun mu yate miték male raké guné yo.”

Parisina du apa kudiké kutdéngkwa du wawo de yadan kapéredi muké dé Jisas kudi wakwek

37* Jisas wani kudi wakwebutidéka dé Parisina du nak dérétt wak, dé yae dé wale kadému kaduké. Wadéka dé yae déku gat wulæ dé wale kaké nae dé rak.

38* Radéka dé Parisina du vék. Védéka dé deku apa kudi wadén pulak déku taaba taale yakutnyémárék yadéka dé sanévéknwu wanévéknwuk.

39 Yadéka dé Némaan Ban Jisas dérétt wak, "Guné Parisina du, guné awu yakutnyéte kapasaknwu male guné yakutnyu. Yaalésäknwu kaapuk yakutnyégunékwa. Yagunéka yaalé kapéredi dé yo. Guné guna sépéké sanévéknwute wupmalemu gwalmu nak du taakwat bakna nyégéle wupmalemu kapéredi mu las wawo yagunéka guna mawulé kapéredi dé yo, wani awuna yaalésäknwu kapéredi yadékwa pulak.

40 Guné waagété yakwa du guné. Got guna sépé kuttakne guna mawulé wawo dé kuttaknak. Waga yadénké guné kaapuk miték sanévéknwugunékwa.

41 Guné yéknwun mawulé yate gwalmu yamarék du taakwaké gwalmu kwayéké guné yo. Kwayégunu guna mawulé miték téké dé yo Gotna méniba.

42 "Guné Parisina du, kapéredi mu gunéké yaaké dé yo. Guné akwi gwalmu muniye tabé nak taaba sékét nak taababa kayék wan véti wan véti takne guné nakurak tabé Gotké kwayu. Waga kwayéte guné akwi kutjo wawo muniye tabé nak

* **11:37:** Lu 14:1 * **11:38:** Mt 15:1-2

taaba sékét nak taababa kayék wan véti wan véti takne guné nakurak tabé Gotké guné kwayu. Kutjo wan némaa mu kaapuk. Wan makwal mu. Guné wani makwal muké sanévéknwute guné kéni némaa muké kaapuk sanévéknwugunékwa. Guné nak du taakwat kutkalé yaké guné yo. Guné Gotké mawulat kapére yaké guné yo. Guné guna gwalmu muniye tabé nak taaba sékét nak taababa kayék wan véti wan véti takne nakurak tabé Gotké kwayégunékwa wan yéknwun. Wani mu kulaknyénymarék yaké guné yo. Wani makwal mu yate wakwewurén némaa mu wawo yagunu mukatik miték yakatik guné yak.

43 *“Guné Parisina du, gunéké kapéredi mu yaaké dé yo. Guné Gotna kudi bulnakwa gat wulæ némaan duna taaléba raké guné mawulé yo. Guné du taakwa jawudakwa taaléba yeýé yeýagunu nak du taakwa gunat véte kéga wadoké guné mawulé yo: ‘Wan naana némaan du dewa yaakwa.’ Naate wadoké guné mawulé yo.

44 “Gunéké kapéredi mu yaaké dé yo. Guné déknyényba kiyaadaka rémdan waagu pulak. Kukba ran du wani waagu tékwa képmaa takuba yeýé yeýate rémdan waaguké kutdéngmarék yadakwa pulak, nak du taakwa guna kapéredi mawuléké kaapuk kutdéngdan. Yate de guné wale tu.”

45 Jisas wani kudi wakwedéka dé apa kudiké kutdéngkwa du nak dé déré wak, “Némaan du, méné waga wate naanat wawo méné waatiyu.”

* **11:43:** Lu 20:46

46 Naate wadéka dé kéga wakwek, “Guné apa kudiké kutdéngkwa du, gunéké wawo kapéredi mu yaaké dé yo. Du nak wupmalemu apakélé mu yaatadéka nak du yae las wawo akutaknedékwa pulak, guné apa jébaa las wawo du taakwaké guné kwayu. Kwayéte derét guné kéga wakweyo, ‘Guné kényi apa kudi akwi véknwute wadékwa pulak yaké guné yo.’ Naate wagunéka de wani kudi véknwute wadékwa pulak yaké apakélé jébaa de yo. Yadaka guné deké mawulé lékmárék yate derét kutkalé kaapuk yagunékwa.

47 “Gunéké kapéredi mu yaaké dé yo. Déknyényba guna képmawaara de Gotna yéba kudi wakwen duwat viyaapéreknék. Yadaka guné rémdan taaléba yéknwun mu takno.

48 Guna képmawaara viyaapérekne rémdan duna taaléba waga yéknwun mu takne guné wo, ‘Naana képmawaara yadan muké naané kusékérú.’

49 Naate wagunékwaké yéknwun mawulé pukaakwa ban Got dé wak, ‘Wuné wuna yéba kudi wakwekwa du wuna kudi kure yékwa duwat wawo wawuru de Isrelina du taakwaké yéké de yo. Yédo lasnyét yaalébaante lasnyét viyaapérekgé de yo.’

50-51 *Naate wadéka waga yadaka guné kutdéngék. Déknyényba guna képmawaara Gotna yéba kudi wakwen duwat de viyaapéreknék. Taale Ken déku wayékna Ebelét dé viyaapéreknék. Got kényi képmáa kuttakne walkamu radéka Ken dé Ebelét viyaapéreknék. Viyaapérekdéka

* **11:50-51:** Jen 4:8

de guna képmawaara viyaapérekgére ye ye
kukba de Sekaraiat viyaapéreknek. Dé Gotna
gana nyédéba tédeká de dérét viyaapéreknek.
Viyaapérekdanké bulaa guné keni tulé rakwa du
gunat wuné wakwego. Got yadan kapéredi muké
sanévéknwute guné deku képmawaara waga
kapéredi mu yagunénké wawo sanévéknwute
gunat némaanba yakataké dé yo.

52 “Guné apa kudiké kutdéngkwa du, gunéké
kapéredi mu yaaké dé yo. Guné Gotké yédakwa
yaabuké walkamu guné kutdéngék. Kutdéngte
guné wani yaabuba yémuké guné kélék yak. Yate
guné wani yaabuba yéké mawulé yakwa du
taakwat waatigunéka de wani yaabuba kaapuk
yédan.” Naate dé Jisas wak.

53-54 *Watakne yédéka de apa kudiké
kutdéngkwa du Parisina du wawo deku
mawuléba de wak, “Sal dé naana kudi kaatate
kapéredi kudi las waké dé yo? Wadu naané dérét
kotimké naané yo.” Naate wate dérét waatite de
wupmalemu kudi dé wale bulék.

12

Yénaayadakwaké de jérawuyadoké dé wakwek

1 *Wupmalemu du béré taakwa béré yae jawe
tédaqtaalé dé sékéréknék. Yadéka las de las duna
maanba akik. Akidaka dé Jisas déku duwat taale
keni kudi wak, “Jérawu yaké guné yo. Parisina
duna yis kutmarék yaké guné yo. Wani kudi

* **11:53-54:** Lu 6:11, 19:47, 20:20 * **12:1:** Mt 16:12

wakwete wuné yénaa yadakwa kudiké wuné wakweyo.

² Paakudan mu kukba wupmalemu du taakwa de véké de yo. Akélak wakwedan kudi kukba wupmalemu du taakwa véknwuké de yo.

³ Guné gaan rate bulgunén kudi du taakwa nyaa véknwuké de yo. Guné gaba rate akélak bulgunén kudi kukba kaapaba wakwedo akwi du taakwa kutdéngké de yo.

Gotké wup yadaranké dé Jisas kudi wakwek

⁴ “Wuna du, gunat kéga wakweké wunék. Guné képmaaba rakwa duké wup yamarék yaké guné yo. De gunat viyaapérekne kukba gunat yaalébaanké yapatiké de yo.

⁵ *Guné awuréba rakwa ban Gotké wup yaké guné yo. Képmaaba rakwa du gunat viyaapérekdo Got gunat yaa yaansaakukwa taalat yatjadaké dé apa yo. Yadékwaké sanévéknwute guné déké wup yaké guné yo.

⁶ *“Guné kutdéngék. Du taakwa makwal yéwaa vétik kwayéte de api naktaba kérão. Wani api wan makwal mu male. Got wani apiké dé sanévéknwu.

⁷ Got gunéké wawo dé sanévéknwu. Akwi muké dé kutdéngék. Guna maaknaba tékwa nébé akwi naaknwe wani muké wawo dé kutdéngék. Kutdéngte dé gunéké miték vu. Védékwaké sanévéknwute guné wup yamarék yaké guné yo. Api wan makwal mu. Du taakwa wan némaa mu.

* **12:5:** Je 4:12 * **12:6:** Lu 12:24

Got makwal apiké waga miték véte gunéké miték male véké dé yo.” Naate dé Jisas derét wak.

Deké “Wuna du” naadéranké dé Jisas wakwek

8 Watakne dé derét wak, “Gunat wuné wakweyo. Du las wupmalemu du taakwana méniba téte nak nak kéga wadaran, ‘Wuné Jisasna du.’ Naate wadaran kukba wuné Akwi Du Taakwana Nyaan Gotna gayéba rate déku kudi kure giyaakwa duna méniba téte wuné derét waké wuné yo, ‘Kéni du wan wuna du.’ Naate waké wuné yo.

9 *Du las wupmalemu duna méniba téte nak nak kéga wadaran, ‘Wuné Jisasna du kaapuk.’ Naate wadaran wuné Gotna gayéba rate déku kudi kure giyaakwa duna méniba téte wuné derét waké wuné yo, ‘Wani du wan wuna du kaapuk.’ Naate waké wuné yo derét.

10 *“Wuné Akwi Du Taakwana Nyaan wuné ro. Du taakwa wunat wasélékte wunéké kapéredi kudi wakwetakne, wani kapéredi kudiké kélík ye kulaknyénydaran, Got wani kapéredi mu yatnyéputiké dé yo. De wasélékte Gotna Yaamabiké kapéredi kudi wakwedaran Got wani kapéredi mu yatnyéputimárék yaké dé yo.

11 *“Du las gunat Gotna kudi buldakwa gat kure yéte, némaan duké wawo kure yédo, guné deku méniba téte, guné wup yamarék yate, guna mawuléba kéga wamarék yaké guné yo, ‘Naané samu kudi wakweké naané yo? Deku kudi yaga pulak kaataké naané yo?’

* **12:9:** Lu 9:26 * **12:10:** Mt 12:24-31 * **12:11:** Lu 21:12-15

12 Waga wamarék yaké guné yo, wani tulé Gotna Yaamabi wakwegunéran kudi gunat wak-wedéran bege.” Naate dé derét wak.

Yéwaamama duké dé Jisas aja kudi wakwek

13 Jisas wale wupmalemu du taakwa de ték. De wale tén du nak dé Jisasnyét wak, “Némaan du, méné wuna némaadut waménu dé ana yaapaná gwalmu muniye dé wunéké las tiyaaké yo. Waga wuné mawulé yo.”

14 Naate wadéka dé Jisas wak, “Kiyadé wak wuné wani jébaa bénéké yawuruké?”

15 *Naate watakne dé derét wak, “Guné jérawu yaké guné yo. Guné nak duna gwalmuké génmarék yaké guné yo. Wupmale gwalmu duna mawulé kutkalé yaké dé yapatiyu. Du taakwa kulé mawulé kérae miték rasaakuké, de wupmale gwalmuké sanévéknwumarék yaké de yo.”

16 *Naate watakne dé derét aja kudi nak kéga wakwek, “Yéwaamama du nak déku képmaaba dé wupmalemu kadému yéknwun ye dé ték.

17 Tédéka dé yéwaamama du déku mawuléba dé wak, ‘Wuna kaadi ga wupmalemu kaapuk kwaakwa. Bulaa samu yaké wuné yo?’

18 Naate sanévéknwute dé wak, ‘Bulaa kéga yaké wuné yo. Wuné kaadi ga akwi pérae apakélé ga kaaké wuné yo. Kaatakne akwi kadému nak gwalmu wawo wuné waba taknaké wuné yo.

19 *Takne wuné wuna wuraanyanét waké wuné yo: Méné, ména wupmalemu yéknwun gwalmu wupmalemu kwaaré raké dé yo.

* **12:15:** 1 Ti 6:9-10 * **12:16:** 1 Ti 6:17 * **12:19:** Je 4:13-15

Radéranké sanévéknwute méné bulaa yaap raké méné yo. Méné kadému gu kate dusék yate raké méné yo. Naate wate wuné miték male raké wuné yo.’

20 Naate wadéka dé Got dérét wak, ‘Méné waagété du. Bulaa gaan kwae kiyaaké méné yo. Kiyaaménu taknaménén gwalmu kiyadé kéraaké yo?’ Waga dé Got dérét wak.

21 *Bulaa gunat wuné wakweyo. Kéni képmaaba rate wupmalemu gwalmu kéraakwa du taakwa de wani du pulak de ro. Rate Gotna méniba de gweba du taakwa de ro.”

Bakna muké sanévéknwudakwaké dé Jisas wak-wek

22 Wani kudi watakne dé Jisas déku duwat wak, “Wani muké sanévéknwute wuné gunat wo. Guné wup yate kadému gu baapmu wutké wawo sanévéknwu wanévéknwumarék yaké guné yo.

23 Kadému, gu, baapmu wut wan bakna mu. Némaa mu kaapuk. Guné wani muké sanévéknwu wanévéknwumarék yaké guné yo. Got wadék guné ro. Guna sépé guna mawulé guna wuraanyan yadék guné ro. Wan némaa mu.

24 *Guné apit mé vé. De kadému kaapuk yaanandakwa. De kadému kaapuk kéraadakwa. De kadému kaadi gaba kaapuk taknadakwa. Yadaka Got dé deké kadému kwayu. Api wan makwal mu. Guné du guné némaa mu. Got waga apiké kadému kwayédu guné kutdéngké guné yo. Gunéké wawo kadému kwayéké dé yo.

* **12:21:** Mt 6:19-21 * **12:24:** Sam 147:9; Lu 12:7

25 Mé véknwu. Guna du nak kwaaré las wawo raké sanévéknwu wanévéknwudérán dé watakné kwaaré las wawo raké apa yaké dé yo, kapu kaapuk? Wan kaapuk. Déku kapmu watakné kwaaré las wawo raké yapatiké dé yo.

26 Guné wani makwal mu yaké yapatite samuké guné nak muké guné sanévéknwu wanévéknwu? Guné waga yamarék yaké guné yo.

27 “Guné maaweké mé sanévéknwu. Naané wani maawe kaapuk yaanannakwa. De bakna de yaalo. De jébaa kaapuk yadakwa. De baapmu wut kaapuk kétaapadakwa. Yadaka Got dé deké miték vu. Deké dé yéknwun nyaap dé kwayu. Déknyényba wupmalemu gwalmu yan némaan ban nak déku yé Solomon yéknwun baapmu wut dé kusok. Yate wani maawe pulak kusokwa yéknwun mu kaapuk kusodén. Maawe kusokwa yéknwun mu Solomon kuson yéknwun mat débu talaknak.

28 Got wani maaweké dé miték vu. Wani maawe walkamu male téké de yo. Bulaa de tu. Séré kiyaaké de yo. Kiyaado du taakwa wani maawe péle yaa tuké de yo. Wani maawe wan makwal mu male. Guné du guné némaa mu. Guné Gotké kaapuk miték sanévéknwugunékwa. Yate guné wup yate guné wo, ‘Naanéké miték véké dé yo kapu kaapuk?’ Naate wate bulaa guné mé sanévéknwu. Got maawe waga kusodu vête guné kutdéngké guné yo. Gunéké baapmu wut kwayéké dé yo.

29 Waga kutdéngte guné wup yamarék yate kagunéran kadému, kagunéran guké, sanévéknwu wanévéknwumarék yaké guné yo.

30 Waga yamarék yaké guné yo, awuréba rakwa ban guna yaapa guné wani muké yapatigunékwaké kudéngdén bege. Kwatkwa du taakwa de wani muké de sanévéknwu wanévéknwu. Guné de yakwa pulak wani muké sanévéknwu wanévéknwumarék yaké guné yo.

31 Yate guné Gotna kém̄ba yaale déku jébaa yaké mawulat kapére yaké guné yo. Waga yagunéran dé gunéké wani mu kwayéké dé yo.” Naate dé derét wak.

Gotna gayéba miték rasaakudaranké dé Jisas wakwek

32* Watakne dé déku duwat wak, “Guné, wuna du, guné walkamu du guné ro. Guna yaapa Got dé yéknwun mawulé yo, guné déku kém̄ba ragunu dé némaan ban rate gunéké miték védéranké. Yadékwaké guné wup yamarék yaké guné yo.

33 Guné guna gwalmu kwayéte yéwaa nyégéle gwalmu yamarék du taakkaké kwayéké guné yo. Kéni képmaaba wut jégwaa yadéka sél yakwa du gwalmu sél yadaka biyaak gwalmu de kérépaknu. Waga yado guna gwalmu akwi kaapuk yaké dé yo. Guné Gotna jébaa kutte yéknwun jébaa yagunéran kukba Got gunat kaatake gunat kutkalé yadu guné dé wale miték rasaakuké guné yo apuba apuba.

34 Kéni képmaaba gwalmu jawutaknakwa du taakwa de kéni képmaana muké de mawulat kapére yo. Gotna gayéba raké sanévéknwukwa du taakwa de dé wale miték rasaakuké de mawulat kapére yo.” Naate dé wak.

* **12:32:** Jo 10:11, 27-28

*Némaan ban gwaamale yaadéranké raségékwa
duké dé wakwek*

35-36 *“Mé véknwu. Wuné gwaamale yaawuréran tuléké miték raségéké guné yo. Kéni aja kudi mé véknwu. Jébaa yakwa duna némaan ban dé taakwa yaran du wale kadému kaké dé yék. Yédéka de déku jébaa yakwa du déké sanévéknwute baapmu wut gitakne yaa sérakne déké de miték raségék, dé gwaamale yae gwésba viyaadu de déké gwés bari naapikweké. Guné, wani du pulak, wuné guna némaan banké miték raségéké guné yo.

37 Deku némaan ban gwaamale yaaduké, déku jébaa yakwa du miték raségédaran de yéknwun mawulé yate miték raké de yo. Deku némaan ban déké miték raségédaranké kutdéngdu déku mawulé deké yéknwun yaké dé yo. Yadu dé wadu de raké de yo. Rado déku kapmu jébaa yakwa duna jébaa yate dé deké kadému kwayéké dé yo, de miték kadoké.

38 Dé nyédé gaan gwaamale yae de déké miték raségédo védu de yéknwun mawulé yaké de yo.

39 “Guné kéni kudiké mé sanévéknwu. Gana bapadu sél yakwa du yaaran tuléké kutdéngdu mukatik de déku gat wulaamarék yadoké dé wani tulé miték raségékatik dé yak.

40 Guné, dé yadérán pulak, guné wawo miték raségéké guné yo. Guné kaapuk kutdénggunén. Wuné Akwi Du Taakwana Nyaan, yani tulé gwaamale yaaké wuné yo? Guné wunéké miték

* **12:35-36:** Mt 25:1-13; Mk 13:32-37

raségéké guné yo, kudéngmarék yagunéran tulé gwaamale yaawuréran bege.”

Yéknwun jébaa yakwa duké, kapéredi jébaa yakwa duké dé wakwek

⁴¹ Jisas wani kudi wadéka dé Pita wak, “Némaan Ban, naanéké male sanévéknwute méné wani kudi wakwek, kapu akwi du taakwat méné wakwek?”

⁴² *Naate wadéka dé Némaan Ban Jisas wak, “Jébaa yakwa duké miték téségékwa du yéknwun mawulé yate kéga yaké dé yo. Déku némaan ban dérét kéga waké dé yo, ‘Méné wuna jébaa yakwa duké téségéte deké kadému kwayéké méné yo.’ Naate watakne yédu dé waga yaké dé yo.

⁴³ Yadu kukba déku némaan ban gwaamale yae véte waké dé yo, ‘Méné jébaa miték ménébu yak. Wan yéknwun.’ Naate wadu dé yéknwun mawulé yate miték raké dé yo.

⁴⁴ Déku némaan ban yadén yéknwun jébaa véte waké dé yo, ‘Méné gwaamale yaawuréran nyaaké kudéngmarék yate, méné yéknwun jébaa ménébu yak. Wan yéknwun. Bulaa méné wuna akwi gwalmuké miték véké méné yo.’ Naate waké dé yo, yéknwun jébaa yan dut.

⁴⁵ Kapéredi mawulé yate kapéredi jébaa yakwa du déku mawuléba kéga waké dé yo, ‘Wuna némaan ban nak gayét ye dé bari gwaamale yaamarék yaké dé yo.’ Naate watakne dé jébaa yakwa du taakwat viyae wupmalemu kadému kate, waagété gu kate, waagété yaké dé yo.

* **12:42:** Mt 25:19-21

46 Yate déku némaan banké sanévéknwumarék yadu wani tulé déku némaan ban gwaamale yaaké dé yo. Kudéngmarék yadéran tulé gwaa-male yaaké dé yo. Yae yadén kapéredi mu véte dé wadu dérét viyaado kiyaké dé yo. Kiyae dé kapéredi mu yan nak du taakwa wale kapéredi taaléba raké dé yo.

47 *“Déku némaan ban mawulé yadékwa jébaaké kutdéngén du, dé wani jébaa yamarék yadéran déku némaan ban wadu de dérét némaanba viyaaké de yo.

48 Déku némaan ban mawulé yadékwa jébaaké kutdéngmarék yan du, dé wani jébaa yamarék yadéran déku némaan ban wadu de dérét kwekéré viyaaké de yo. Got du taakwaké las wupmale jébaa kwayédéka de déké wupmale jébaa yakwedoké dé mawulé yo. Got du taakwaké las wupmalemu jébaa kwayédéka de déké wupmalemu jébaa yakwedoké dé mawulé yo.” Naate dé Jisas derét wak.

Jisas dé yaak du taakwa kém̄ba kém̄ba radoké

49 Watakne dé derét wak, “Wuné yae kéni képmaaba yaa pulak sérakgé wuné yo. Wani jébaa yaké wuné yaak. Wani jébaa bari yabutiké wuné mawulé yo.

50 *Taale apakélé kaagél kutké wuné yo. Bari kutké wuné mawulé yo. Kure wuné miték raké wuné yo.

51 Yaga guné wo? Akwi képmaaba rakwa akwi du taakwa waariyamarék yate miték radoké

* **12:47:** Je 4:17 * **12:50:** Lu 9:22, 2:34

wuné yaak, kapu kaapuk? Wan kaapuk. Yaawurénké du taakwa las wuna kudi miték véknwudo deku kém rékaréka yate de wale waariyaké de yo. Yaawurénké du taakwa las wuna kudiké mawulé yado las wuna kudiké kélík yate kémba kémba raké de yo.

52 Yate kény tulé kukba wawo nak gaba rakwa du taakwa kés mawulé nak mawulé yate kém vétikba raké de yo. Du kupuk nak kém pulak rado du vétik nak kém pulak raké bét yo. Taakwa vétik nak kém pulak rabéru taakwa kupuk nak kém pulak raké de yo.

53 Yaapa deku baadi wale waariyaké de yo. Néwaa deku takwanyangu wale waariyaké de yo. Yawutakwa deku méyaasgu wale waariyaké de yo.” Naate dé Jisas wak, de déku kudiké mawulé yadaranké.

Yaaran muké kutdéngdoké dé Jisas kudi wak-wek

54 Wani kudi watakne dé wale téen du taakwat dé wak, “Guné apakélé wimut kutdéka véte kutdéngte guné wo, ‘Bulaa maas viyaaké dé yo.’ Naate wagunéka dé maas viyao.

55 Guné gaan wupmale kun kwaarat véte kutdéngte guné wo, ‘Séré apakélé nyaa véké dé yo.’ Waga wagunéka dé apakélé nyaa vu.

56 Guné yénaa yakwa du taakwa guné. Guné nyétba kwaakwa mu képmaaba yaalakwa mu véte guné kutdéngék. Maas viyaaké dé yo. Nyaa véké dé yo. Waga kutdéngte samuké guné yawurékwa apa jébaa véte guné wunéké kaapuk miték kutdénggunén?

Derét waatikwa du wale kudi buldaranké dé wakwek

⁵⁷ “Samuké guné yéknwun muké kaapuk kutdénggunén? Guné kapmu miték sanévéknwe yéknwun muké wakweké guné yo.

⁵⁸ Du las gunat kotké yadaran guné de wale yaabuba yéte de wale kudi bulte de wale kudi giké guné yo. Nakurak mawulé yaké guné yo. Guné de wale wani kudi gimarék yagunéran sal de gunat kot véknwukwa némaan banké kure yédo dé wadu de gunat raamény gaba taknaké de yo? Taknado guné waba rasaakuké guné yo.

⁵⁹ Kot véknwukwa némaan ban wadén akwi yéwaa gunat waatin duké kwayégunu, wani tulé male raamény ga kulaknyéntakne yaale miték yéké guné yo. Adél wuné gunat wakweyo.” Naate dé Jisas wak.

13

Yadan kapéredi mu kulaknyéndaranké dé wakwek

¹ Wani tulé du las Jisaské yae de dérét wak, “Némaan du Yerot wadéka déku du Galilina képmaat yae de Galilina duwat las viyaapéreknék. Wani du Gotké kwaami viyae tuwe kwayédaka wani tulé Yerotna du de derét viyaapéreknék.”

² Naate wadaka Jisas dé derét wak, “Galilina du waga kiyaadanké yaga guné sanévéknwu? Wani du wupmalemu kapéredi mu yadaka yadan kapéredi mu nak du yan kapéredi mat débu talakanak, kapu kaapuk?

³ Wan kaapuk. Gunat wuné wo. Guné yagunén kapéredi mu kulaknyénymarék yagunérán de kiyaadan pulak guné wawo kiyaaké guné yo.

⁴ Guné kutdéngék. Déknyényba Siloamba kwaan sémény ga wupmale (18) du ténba akére dé derét takupéreknék. Bulaa yaga guné sanévéknwu? Waga takupérekdén du yadan kapéredi mu dé Jerusalemba rakwa nak du yan kapéredi mat débu talaknak, kapu yaga pulak?

⁵ Wan kaapuk. Gunat wuné wakweyo. Guné yagunén kapéredi mu kulaknyénymarék yagunérán de kiyaadan pulak guné wawo kiyaaké guné yo.”

Sék akumarék yan miké dé Jisas kudi wakwek

⁶ Wani kudi watakne dé Jisas keni aja kudi derét wakwek, “Kwaabi pulak mi nak dé duna wain yaawiba ték. Tédéka wupmalemu apu wani du dé yaak, sék las géléké. Yae dé vépatik.

⁷ Vépatite dé wain yaawiba jébaa yakwa dut wak, ‘Kwaaré kupuk sék akukwa tulé wuné keni miba sék las géléké wunébu yaak. Yae wuné vépatik. Méné wani mi véléké méné yo. Yéknwun képmaaba bakna témarék yaké dé yo.’

⁸ Naate wadéka dé wak, ‘Némaan du, waga yamarék yaké ané yo. Kéni kwaaré wawo dé mé tu. Tédu wuné wani mi baapaba képmaa vae, képmaa yéknwun yaduké bulmakawuna di taknaké wuné yo.

⁹ Taknawuru sal aniké kwaaré sék akuké dé yo? Waga akudéran wan yéknwun. Akumarék yadu méné véléké méné yo.’ Naate dé wak.” Waga dé Jisas derét wakwek.

Yaap ra nyaa dé Jisas taakwat nak kutnébulék

10 *Yaap ra nyaa nak dé Jisas Gotna kudi buldakwa gaba rate du taakwat Gotna jébaaké dé yakwatnyék.

11 Yakwatnyédéka lé kutakwa kure tén taakwa lé nak waba rak. Wani kutakwa lérét kure téléká léku sépékwaapa apa yamarék yadéka léku butgul dé anygwa yak. Yadéka lé kedéng téké lé yapatik. Wupmalemu (18) kwaaré lé waga rak.

12 Raléka Jisas lérét véte waadéka yaaléka dé lérét wak, “Nyéna, bulaa nyénébu yéknwun yak.”

13 Naate wate déku taaba wani taakwat kutdéka lé bari kedéng ték. Téte lé Gotna yéba kevéréknék.

14 Jisas yaap ra nyaa lérét waga kutnébuldénké dé Gotna kudi buldakwa gana némaan ban rékaréka yak. Yate dé waba tén du taakwat wak, “Naané jébaa yanaran nyaa nak taaba sékét nak taababa kayék nakurak. Guna sépékwaapa kapére yadu dé gunat kutnébulduké mawulé yangunéran guné jébaa yanakwa nyaa yaaké guné yo. Guné yaap ra nyaa waga yamarék yaké guné yo.” Naate dé wak.

15 Wani du waga wadéka dé Jisas wak, “Guné wan yénaa yakwa du guné. Akwi nyaa guné ye bulmakawu donki tékwa gat wulæ baagwi lépmwénye guné derét kure gwaadu, gu kadoké. Yaap ra nyaa wawo guné wani jébaa yo.

16 Naana képmawaara Ebrayam wan léku képmawaara wawo. Seten wadéka lé déku taababa raléka wupmalemu (18) kwaaré léku butgul anygwa dé yak. Yadénké yaap ra nyaa

* **13:10:** Lu 6:1-6, 14:1-6

wuné lérét kutkalé yate lérét Setenna taababa kéraawurékwa wan yéknwun.”

17 Naate wadéka de déku maama nyékéri yate de akélq̄k rak. Radaka waba tén nak du taakwa yadén akwi yéknwun jébaaké de yéknwun mawulé yate dusék takwasék yak.

Mastet sékgé dé Jisas kudi wakwek

18 Du taakwa waga yadaka dé Jisas derét wak, “Got némaan ban rate du taakwaké miték védéranké yaga wakwewuru guné kudéngké guné yo? Yaga yate déku makwal kém apakélé kém raké dé yo? Wani muké gunat wakweké wunék.

19 Wani kém wan misék nak pulak. Wani misékn̄a yé mastet. Mastet sék wan nak misék pulak kaapuk. Wani misék wan makwali sék. Du nak wani misék kéræ dé kadému yaanandékwa képmaaba pukaak. Pukaadéka wure apakélé ye dé wani képmaaba tékwa mit débu talaknak. Apakélé mi tédéka de api yae de wani mi gaaléba kwaat sétakne rak.”

Yiské dé Jisas kudi wakwek

20 Wani kudi watakne dé kéga wakwek, “Got némaan ban rate du taakwaké miték véké dé yo. Wani du taakwa kulé mawulé yate kulé du taakwa yaalaké de yo.”

21 Wani du taakwa wan yis pulak. Taakwa nak yis kéræ lé pélawa wale sélorék. Sélotléka dé wani pélawa nak pulak mu dé yaalak. Nak pulak mu yaalan pulak, Gotna du taakwa kulé du taakwa yaalaké de yo.” Naate dé Jisas derét wak.

Makwal gwéské dé Jisas kudi wakwek

22 Watakne wani gayé kulaknyéntakne Jerusalemét yéké dé mawulé yak. Yate wani yaabuba yéte dé wupmalemu gayét yék. Ye dé wupmalemu du taakwat Gotna jébaaké dé yakwatnyék.

23-24 Yadéka dé du nak dérét wak, “Némaan Ban, wupmalemu du taakwa Gotna kémba wulaaké de yo, kapu walkamu du taakwa male déku kémba wulaaké de yo?” Naate waatadéka dé waba téen du taakwat dé wakwek, “Du taakwa apuba apuba miték rasaakudaran gayéna gwés wan apakélé gwés kaapuk. Wan makwal gwés. Gunat wuné wakwego. Guné wani gwésba wulaaké guné apa jébaa yate apat kapére yaké guné yo. Wupmalemu du taakwa wani gwésba wulaaké mawulé yate de yapatiké de yo.

25 *Wani gayéna némaan ban raapme wani gwés tépéché dé yo. Tépédu guné yae kaapaba téte gwésba viyaate kéga waké guné yo, ‘Némaan Ban, naanéché mé gwés naapitiyaa.’ Waga wagunu gunat kéga waké dé yo, ‘Guné yani gayéba guné yaak? Wuné gunat las kaapuk kudéngwurén.’

26 Waga wadu guné kéga waké guné yo, ‘Naané méné wale kadému gu naané kak. Méné naana gayéna yaabuba téte méné naanat kudi wakwek.’

27 Waga wagunu dé gunat kéga waké dé yo, ‘Gunat wuné wakwego. Wuné guné yaagunén gayé wuné las kaapuk kudéngwurén. Guné kapéredi mu yakwa du taakwa guné. Guné akwi wunat kulaknyéntakne yéké guné yo.’

28 *Naate wadu kaapaba téte géraaké guné yo.

* **13:25:** Lu 6:46 * **13:28:** Mt 8:11-12

Guné véké guné yo naana képmawaara Ebrayam, Aisak, Jekop, Gotna yéba déknyényba kudi wakwen akwi du wawo Gotna gayéba rado. Vété guné wani gayéba raké mawulé yate kaapaba téte némaanba géraaké guné yo.

29 Yagunu de nyaa yaalakwa taaléba yaaran du taakwa, nyaa dawulikwa taaléba yaaran du taakwa, akwi taaléba yaaran du taakwa yae Gotna gayét wulæ rate kadému kaké de yo.

30 Gunat wuné wakweyo. Bulaa bakna rakwa du taakwa de las kukba némaan du taakwa raké de yo. Bulaa rakwa némaan du taakwa de las kukba bakna du taakwa raké de yo.” Naate dé Jisas derét wak.

Jisas Jerusalemba ran du taakwaké dé némaa mawulé léknék

31 Wani tulé de Parisina du las yae de Jisas nyét wak, “Galilina némaan ban Yerot ménat viyaapéreké dé mawulé yo. Waga yadékwaké méné keni gayé kulaknyéntakne méné nak gayét yéké méné yo.”

32 Naate wadaka dé derét wak, “Guné ye wani yénaa yakwa dut kéga waké guné yo, ‘Mé véknwu. Jisas kéga dé wo: Bulaa, séré kutakwat wawuru de yaage yéké de yo. Kiyakiya yakwa du taakwa, sépkwaapa kapére yan du taakwat wawo, wuné kutnëbulké wuné yo. Nyaa kupuk yédu wuna jébaa yabutiké wuné yo.

33 Bulaa, séré, maa, wuné Jerusalemét yédakwa yaabuba yéké wuné yo. Déknyényba Gotna yéba kudi wakwen duwat Jerusalemba de viyaapéreknek. Wuné wawo Gotna yéba kudi

wakwekwa du rawurékwaké wunat Jerusalemba viyaapéreké de yo.’ Guné wuna kudi waga Yerotnét waké guné yo.”

³⁴ Naate watakne dé wak, “Guné Jerusalemba rakwa du taakwa, guné Gotna yéba kudi wakwen duwat guné viyaapéreknék. Got wadéka déku kudi kure yén du gunéké de yék. Yédaka guné derét matut viyaagunéka de kiyaak. Gunéké wuné mawulé léknu. Séraa kéraalén nyaanké sarépgwe rate deké miték vélékwa pulak, wuné wupmalemu apu gunat kutkalé yate gunéké miték véché wuné mawulé yak. Mawulé yawuréka guné kélék guné yak.

³⁵ Yagunénké kukba du yae guna gayé yaalébaanké de yo. Yaalébaando guné waba ramarék yaké guné yo. Guna gayé bakna taalé téké dé yo. Wuné kutdéngék. Guné wunat bari vémárék yaké guné yo. Kukba guné wunéké waké guné yo, ‘Got wadéka dé wani du yaak. Naané déku yéba kevérékgé naané yo.’ Naate wagunu wuné yaawuru guné wunat véché guné yo. Adél wuné gunat wakwego.” Naate dé Jisas wak.

14

Maan taaba waarén dut dé Jisas kutnébulék

¹ Yaap ra nyaa nak dé Jisas Parisina du nak déku gaba kaké dé yék. Wani du wan némaan du. Yédéka déku gaba ran du deku mawuléba de wak, “Sal Jisas jébaa yaké dé yo yaap ra nyaa? Jébaa yadérán wan kapéredi mu.” Naate wate de déréché véché.

² Védaka maan taaba waaren du nak dé Jisasna méniba ték.

³ *Tédéka Jisas wani dut véte dé apa kudiké kutdengkwa du Parisina duwat wawo dé waatak, “Naana apa kudi yaga dé wo? Yaap ra nyaa naané sépekwaapa kapére yan du taakwat kutnëbulké naané yo, kapu kaapuk?”

⁴ Naate waatadéka de kudi las kaapuk buldan. Yadaka dé Jisas wani dut kutnëbultakne wadéka dé yék.

⁵ Yédéka dé derét wak, “Guné wawo yaap ra nyaa guné jébaa yo. Guna nyaan yaap ra nyaa gu tékwa waaguba akére dawulidérän guné dérét bari kutkweké guné yo, kapu yaga pulak? Guna bulmakawu yaap ra nyaa gu tékwa waaguba akére dawulidérän yaap ra nyaa guné dérét bari kutkweké guné yo, kapu yaga pulak? Ao, yaap ra nyaa guné kutkweké guné yo.”

⁶ Naate wadéka de déku kudi kaataké de yapatik.

Deku yéba kevérékmarék yadaranké dé Jisas wakwek

⁷*Jisas dé vék wani kadému kaké yaan du yaate némaan duna taaléba radaka.

⁸⁻⁹ Véte dé derét wak, “Du nak taakwa yate kadému sérakne kaké yate gunat waadu guné ye miték sanévéknwuké guné yo. Sanévéknwute guné némaan duna taaléba ramarék yaké guné yo. Guné némaan duna taaléba ragunérän sal némaan du las yaado gunat waan du yae gunat kéga waké dé yo? ‘Guné wani yéknwun taalé keni

* **14:3:** Lu 13:10-16 * **14:7:** Mt 23:2-3, 6

duké kwayéké guné yo.’ Dé waga wadu guné nyékéri yate némaan duna taalé kulaknyénytakne du taakwana kukba raké guné yo.

10 Guné de wale kadému kaké ye miték sanévéknwute du taakwana kukba raké guné yo. Waga yagunu gunat waan du yae gunat waké dé yo, ‘Wuna du, guné yae némaan duna taaléba raké guné yo.’ Naate wadu guné ye némaan duna taaléba ragunu wani gaba rakwa du de guna yéba kevérékgé de yo.

11 *Kéni muké sanévéknwute wuné wani muké wo. Deku yéba kevérékgwa du taakwaké kukba Got wadu de bakna du taakwa raké de yo. Deku yéba kevérékmarék yakwa du taakwaké kukba Got wadu de némaan du taakwa raké de yo.”

De yae de wale kadému kadoké waadaranké dé wakwek

12 *Wani kudi watakné dé dé wale kadému kaduké waan dut wak, “Méné kadému sérakne kaké yate ména du taakwa, ména némaadugu wayéknaje, ména kém, ména gayéba rate wupmalemu yéwaa yan duwat waga waamarék yaké méné yo, de yaadoké. Méné waga pulak duwat waaménérān kukba de sérakte ménat waado yaaménu de ménéké kadému kwayékataké de yo.

13 Méné waga yamarék yaké méné yo. Méné kadému sérakne kaké yate méné gwalmu yamarék du, sépékwaaapa kapére yan du, maan kapére yan du, méni kiyaan duwat waaké méné yo, de yaadoké.

* **14:11:** Lu 18:9-14

* **14:12:** Lu 6:32-35

14 Wani du de ménéké kadému kwayékataké dé yapatiyu. Méné deké waga kwayéménéranké kukba Got ménat kutkalé yaké dé yo. Got wadu yéknwun mu yatakne kiyaan du taakwa tépa nébéle raapdaran tulé dé ménat kutkalé yadu méné miték raké méné yo.” Naate dé Jisas dérét wak.

Apakélé kadému kadaranké dé aja kudi wakwek

15* De wale rate kadému kan du nak wani kudi véknwutakne dé Jisasnyét wak, “Gotna gayéba rate kadému karan du de yéknwun mawulé yaké de yo.”

16 Naate wadéka dé Jisas wak, “Du nak apakélé kadému sérakgé dé yak. Yate wupmalemu duwat dé wakwek, de yae wani kadému kadoké.

17 Wakwedéka kadému kadaaran tulé yaadéka déku jébaa yakwa dut dé wak, dé déknyényba wakwedén duké ye keni kudi waduké, ‘Akwi gwalmu kawu saakérataknakan dé ro. Guné mé yaa.’

18 “Dé deké ye wadéka de akwi du yémuké de kélék yak. Yate du nak dé dérét wak, ‘Wuné képmāa nakatak wunébu kéraak. Kéraataknne bulaa véké wuné yo. Wuné yaamarék yaké wuné yo.’

19 Naate wadéka dé nak wak, ‘Wuné bulmakawu taaba vétik wunébu kéraak. Kéraataknne wuné ye derét yaknwuké wunék. De wuna jébaa miték yaké de yo, kapu yaga pulak? Wuné yaamarék yaké wuné yo.’

* **14:15:** Re 19:9

20 *Naate wadéka dé nak wak, ‘Wuné bulaa male taakwa nak wunébu kéraak. Kéraawurén bege, wuné yaamarék yaké wuné yo.’

21 “De waga wadaka dé jébaa yakwa du tépa gwaamale ye dé déku némaan dut wani muké wakwek. Wakwedéka dé wani du rékaréka yak. Yate dé déku jébaa yakwa dut wak, ‘Méné keni gayéba kwaakwa akwi yaabuba yéte méné gwalmu yamarék du, sépékwaapa kapére yan du, méni kiyaan du, maan kapére yan duwat méné wuna gat kwole kure yaaké yo.’ Naate wadéka dé jébaa yakwa du ye wadén pulak dé yak.

22 Ye gwaamale yae dé déku némaan dut wak, ‘Némaan du, wuné ména kudi véknwute waménén pulak wunébu yak. Yawurék taalé las bakna dé tu.’

23 Naate wadéka dé dérét wak, ‘Méné akwi yaabuba yéte nébuba wawo yéte méné bakna du taakwat kwole kure yaaké yo. Kwole kure yaaménu wuna ga sékéréduké wuné mawulé yo.

24 Bulaa gunat wuné wakweyo. Déknyényba waawurén akwi du wuna kadému kamarék yaké de yo. De wuna kadému kamuké bulaa kélélik wuné yo.’ Naate dé némaan du wak.”

Miték sanévéknwe déku jébaaba wulaadoké dé wakwek

25-26 *Wupmalemu du béré taakwa béré Jisas wale yédaka dé walaakwe dé derét wak, “Guné wuna jébaaba yaalaké mawulé yate guné wunéké némaa yéknwun mawulé yaké guné yo. Guné guna néwepa, guna du, guna taakwa, guna baadi,

* **14:20:** 1 Ko 7:33 * **14:25-26:** Lu 18:28-30

guna némaadugu wayéknaje nyangeguké némaa yéknwun mawulé yate wunéké walkamu male yéknwun mawulé yagunérán guné wuna jébaaba yaalamarék yaké guné yo. Guné guna sépéké némaa yéknwun mawulé yate wunéké walkamu male yéknwun mawulé yagunérán wuna jébaaba yaalamarék yaké guné yo. Wunéké yagunérán yéknwun mawulé nak du taakwaké yagunékwa yéknwun mawulat talaknadérán guné wuna jébaaba yaale wuna du taakwa raké guné yo.

²⁷* Guné kéga wagunérán, ‘Jisasna jébaa kut-saakuké naané yo. Yate kaagél kutte miba kiyaanaran wan bakna mu. Némaa mu kaapuk.’ Waga wagunérán guné waga yate guné wuna du taakwa raké guné yo. Guné waga wamarék yate waga yamarék yagunérán guné wuna du taakwa ramarék yaké guné yo.

²⁸ “Wuna jébaaba yaalaké yate taale mé miték sanévéknwu. Kéni kudi mé véknwu. Guna du nak sémény ga nak kaaké mawulé yadérán taale dé rate miték sanévéknwuké dé yo, wani gana yéwaaké. Sal dé kure radékwa yéwaat wani ga kaabutiké dé yo, kapu kaapuk?

²⁹ Taale waga miték sanévéknwumarék ye dé kwaat yaanédu yéwaa kaapuk yadu ga kaabutimarék yadérán akwi du véte wani dut wasélékte waagiké de yo.

³⁰ Waagite de waké de yo, ‘Wani ga batnyé kaadéka yéwaa kaapuk yadéka bulaa kaabutiké dé yapatiyu.’

³¹ “Kéni kudi wawo mé véknwu. Némaan

* ^{14:27:} Lu 9:23

ban nak dé véknwuk. Nak némaan ban déku waariyakwa du wale de yaak, de wale waariyaké. Véknwute de wale waariyaké mawulé yate taale samu yaké dé yo? Taale rate dé kéga waké dé yo, ‘Wuna waariyakwa du wan walkamu. Déku waariyakwa du wan wupmalemu. Yaga pulak naané derét viyaaké naané yo? Sal de naanat viyaapéreké de yo?’

³² Naate sanévéknwe dé waké dé yo, ‘Naané de wale waariyaké naané yapatiyu.’ Naate wate miték sanévéknwe dé duwat las wadu de ye yaaran némaan ban wale kudi bulké de yo, de kudi giye ye waariyamarék yadoké. Wani némaan ban séknaaq taaléba wekna tédu dé duwat wadu de deké yae kudi bulké de yo, de kudi giye ye waariyamarék yadoké.”

³³ *Naate watakne Jisas dé derét wak, “Wani du yadén pulak guné yaké guné yo. Guné wuna jébaaba yaale wuna du taakwa raké mawulé yagunéran taale miték mé sanévéknwu. Guné guna gwalmuké kuk kwayégunéran wani muké tépa mawulat kapére yamarék yaké guné yo.

Lisék yamarék yakwa solké dé aja kudi wakwek

³⁴ “Mé véknwu. Taakwa de sol takno, kadému lisék yaduké. Sol wan yéknwun mu. Sol lisék yamarék yadéran yaga pulak yado lisék tépa yaké dé yo? Kaapuk. Lisék tépa yamarék yaké dé yo.

³⁵ Yadu kadémuba taknamarék yaké de yo. Lisék yamarék yakwa sol yéknwun képmaaba taknadaran kadému miték yaalamarék yaké dé yo. De wani sol bakna yatjadaké de yo. Guné bakna

* **14:33:** Mt 5:27-28

yatjadadaran sol pulak ramuké guné wani kudi miték kudéngké mawulé yate miték véknwuké guné yo.” Naate dé Jisas derét wak.

15

Yalaknén sipsipké dé Jisas aja kudi wakwek

¹*Nak nyaa takis nyégélkwa du, nak kapéredi mu yakwa du taakwa wawo de Jisas ténét yék, déku kudi véknwuké.

² Yédaka de Parisina du apa kudiké kudéngkwa du wawo wani muké kélék yate de wak, “Wani du kapéredi mu yakwa du taakwa wale téte dé de wale kadému ko.”

³ Naate wadaka dé derét keni aja kudi wakwek:

⁴ “Sal guna du nak kéga yaké dé yo? Du nak wupmalemu (100) sipsip dé yak. Yadéka dé nak yalaknék. Yadéka nak sipsip yéknwun taaléba téte kadaka dé derét kulaknyéntakne ye yalaknén nakurak sipsipké dé sékalék. Sékale sékale dé vék.

⁵ Vétakne kérae déku tangaléba akutakne dusék yate dé yaate yék.

⁶ *Ye gayé saabe dé du taakwat waadéka yae de jawuk. Jawudaka dé derét wak, ‘Guné wuné wale yéknwun mawulé yate dusék takwasék yaké guné yo, wuna sipsip nak yalakdék sékale vétakne kéraawurén bege.’ Naate dé derét wak.”

⁷ Waga watakne dé Jisas wak, “Gunat wuné wakweyo. Waga yadén pulak Gotna kudi kure giyaakwa du dusék yaké de yo. Yéknwun mu yate Gotna méniba miték rakwa wupmalemu du taakwaké de Gotna kudi kure giyaakwa du yéknwun

* **15:1:** Lu 5:29-30 * **15:6:** Lu 19:10

mawulé yate dusék yaké de yo. Kapéredi mu yan du yadén kapéredi mu kulaknyénydérān de Gotna kudi kure giyaakwa du yéknwun mawulé yate duséknét kapére yaké de yo.” Naate dé derét wakwek, du las kapéredi mu yakwa du taakwa wale tédénké dérét waatidan bege.

Yéwaa yalakdénké dé Jisas aja kudi wakwek

⁸ Wani kudi watakne dé Jisas derét aja kudi nak wawo kéga wakwek: “Sal guna taakwa nak kéga yaké lé yo? Taakwa nak yéwaa taaba vétik kure raléka nak yalakdéka lé téwayé sérokne takne ga taapiye lé sékale sékale lé wani yéwaa vék.

⁹ Vétakne kérae lé wani gayéba ran du taakwat waaléka yae de jawuk. Jawudaka lé derét wak, ‘Guné wuné wale dusék takwasék yaké guné yo, wuna yéwaa nak yalakdék sékale vétakne tépa kéraawurén bege.’ Naate lé derét wak.”

¹⁰ Waga watakne dé Jisas derét wak, “Gunnat wuné wakweyo. Waga yalén pulak Gotna kudi kure giyaakwa du dusék yaké de yo. Kapéredi mu yakwa du yadén kapéredi mu kulaknyenydérān, de Gotna kudi kure giyaakwa du yéknwun mawulé yate dusék yaké de yo.”

Du déku yaapat kulaknyenydénké dé aja kudi wakwek

¹¹ Watakne dé Jisas nak aja kudi kéga wakwek: “Du nak dé nyaan vétik yak.

¹² Kukba kéraadén nyaan dé déku yaapat wak, ‘Ména, kukba kiyaaménu wuné ména gwalmu las kéraaké wuné yo. Kéraawuréranké ménat wuné wo. Bulaa méné ména yéwaa gwalmu anéké

munitiyaaké méné yo. Muniye wunéké tiyaaké waménén mu bulaa tiyaaké méné yo.' Naate wadéka dé déku yéwaa gwalmu muniye dé bétiké kwayék.

¹³ Kwayédéka dé kukba kéraadén nyaan walkamu re déku gwalmu akwi nak duké kwayétakne dé yéwaa nyégélék. Nyégéle kure dé séknaa gayét yék. Ye wani gayéba rate dé déku yéwaa kéraasolak, yadén kapéredi muké.

¹⁴ Yadéka déku yéwaa akwi kaapuk yadéka kukba dé wani képmaaba apakélé kaadé yak. Yadéka déku kadému dé kaapuk yak.

¹⁵ Yadéka ye dé wani képmaaba ran duké nak jébaa yak. Yadéka wadéka ye dé déku baalé yaawkwak.

¹⁶ Akwi du de déké kadému kaapuk kwayédan. Yadaka kaadé wale rate dé baalé kadakwa kadému kaké dé mawulé yak.

¹⁷ "Waga yatakne dé déku mawuléba miték sanévéknwuk. Sanévéknwute dé wak, 'Wuna yaapaké jébaa yakwa wupmalemu du de wupmalemu kadému de ko. Kadaka biyaa yadéka kadému las bakna dé ro. Radéka wuné kéba rawuréka wunat kaadat dé kapére yo.

¹⁸ Bulaa wuné raapme wuna yaapaké gwaamale yéké wuné yo. Ye dérét waké wuné yo: Wuné Gorét kapéredi mu wunébu yak. Ménat wawo kapéredi mu wunébu yak.

¹⁹ Yawurénké sanévéknwute méné wunéké wuna nyaan naamarék yaké méné yo. Yéknwun mu yakwa du rawuru mukatik méné wunéké waga naaménu. Méné wunéké wuna jébaa yakwa du naaké méné yo, kapéredi mu yawurén bege.

Naaménu wuné ména jébaa yakwa du wale ména jébaa yaké wuné yo. Naate wuné wuna yaapat waké wuné yo.'

20 Naate watakne déku yaapaké gwaamale yéké mawulé yate dé yaabuba yék.

"Wani du ye séknaaba tédéka dé déku yaapa dérét vék. Védéka déku mawulé dé léknék déké. Lékdéka dé pétépété ye déku nyaanét rawute dé taama vék (daama réngék).

21 Yadéka dé déku nyaan dérét wak, 'Wuna yaapa, wuné Gorét ménat wawo kapéredi mu wunébu yak. Yawurénké sanévéknwute méné wunéké wuna nyaan naamarék yaké méné yo. Yéknwun mu yakwa du rawuru mukatik méné wunéké waga naaménu.'

22 Naate wadéka dé déku yaapa jébaa yakwa duwat waadéka yaadaka dé derét wak, 'Wuna nyaan débu gwaamale yaak. Wuné déké yéknwun mawulé wuné yo. Guné yéknwun baapmu wut bari kérae kure yae guné dérét gikweké yo. Yate guné awu déku taababa kusolakwetakne su déku maanba kusadakweké yo.

23 Yatakne guné wulén bulmakawu nyaan nak kure yae guné viyaaké guné yo. Viyae tuwe naané kate dusék yaké naané yo.

24 Wuna mawuléba wuné déké wuné wak: Débu kiyaak. Naate wawuréka bulaa débu gwaamale yaak. Déknyényba wuné wak: Débu yalaknék. Waga watakne bulaa dérét naané vu. Véte gwaamale yaadénké naané kate dusék yaké naané yo.' Naate wadéka de déké dusék yate kadému kawu saakérak.

25 “Wani duna maknanyan yaawiba dé ték. Te kukba gwaamale yae ga saabaké yate dé véknwuk kaang viyaate kétidaka.

26 Véknwute dé jébaa yakwa dut nak waadéka yaadéka dé dérétt waatak, ‘De samu de yo?’

27 Naate waatadéka dé jébaa yakwa du wak, ‘Ména wayékna tépa gwaamale yaadék ména yaapa déké yéknwun mawulé yate wadék de wulén bulmakawu nyaan nak viyaak. Viyae kate de dusék yo.’

28 Naate wadéka dé maknanyan rékaréka yate dé wulaamuké kélík yak. Yadéka déku yaapa gwaade dé dérétt wak, gat wulaaduké.

29 Wadéka dé yaapat wak, ‘Mé véknwu. Wupmalemu kwaaré wuné bakna jébaa yakwa du pulak wuné ména jébaa wunébu yak. Yate ména kudi miték wunébu véknwuk. Ména kudiké kaapuk kuk kwayéwurén. Yawurénké ménéne wunéké yéknwun mu kaapuk tiyaaménén. Ménéne meme nyaan nak kaapuk tiyaaménén, wuné wuna du taakwa wale kate dusék takwasék yanoké.

30 Waga pulak makwal mu wunéké tiyaamarék yate ména nak nyaan gwaamale yaadék ménéne déké yéknwun mawulé yate wulén bulmakawu nyaan ménébu viyaak. Dé ména gwalmu yéwaa yaabuba tékwa taakwaké kwayétakne akwi yéwaa dé kéraasolak. Waga yadénké ménéne déké yéknwun mawulé yate wulén bulmakawu nyaan ménébu viyaak, de kate dusék takwasék yadoké.’

31 Naate wadéka dé yaapa dérétt wak, ‘Wuna nyaan, akwi nyaa ané véteti ané ro. Wuna akwi

gwalmu wan ména gwalmu male.

³² Ména wayékna dé ye wupmalemu kwaaré nak taaléba dé rak. Radéka wuné wuna mawuléba wuné wak: Débu yalaknék, kapu débu kiyaak? Naate sanévéknwuréka dé gwaamale yaadék bulaa naané dérét vu. Wani muké sanévéknwute naané yéknwun mawulé yate dusék takwasék yanakwa wan yéknwun'. Naate dé yaapa déku maknanyanét wak." Waga dé Jisas wak. Wani aja kudi kupuk dé derét wak, du las kapéredi mu yakwa du taakwa wale tédenké dérét waatidan bege.

16

Gwalmuké téségéte miték sanévéknwun duké dé wakwek

¹ Kukba Jisas déku duwat keni aja kudi dé wakwek: "Du nak dé wupmalemu yéwaa yan duna gwalmuké dé téségék. Yadéka de du las némaan duké yae de déku gwalmuké téségékwa duké de wak, 'Ména gwalmuké téségékwa du dé yéknwun jébaa kaapuk yadékwa. Yate dé ména yéwaa kés du nak duké kwayéménékwaké.'

² Naate wadaka dé déku gwalmuké téségékwa duwat waadéka yaadéka dé dérét wak, 'Ménéké véknwurén kudi yaga pulak? De de wo, méné yéknwun jébaa yamarék yate wuna yéwaa kés du nak duké kwayéménékwaké. Wani kudi wan adél kapu kaapuk? Méné wuna gwalmu, wuna yéwaa akwi naaknwe nyégaba kavitakne wani nyéga wunéké mé kure yaa. Kure yae méné wuna jébaa tépa yamarék yaké méné yo.'

³ Naate wadéka dé gwalmuké téségékwa du déku mawuléba dé wak, ‘Wuna némaan ban dé wuné déku gwalmuké tépa téségémuké dé kélik yo. Wuné samu yaké wuné yo? Wuné kabi vaaké wuné apa kaapuk yawurékwa. Wuné nak duwat yéwaaké yaawimuké nyékéri wuné yo.

⁴ Bulaa wuné kudéngék. Wuné kéga ye wuna némaan ban déku jébaa kulaknyéntakne yewuruké wadu, de wuna du rate wado wuné deku gat wulae de wale raké wuné yo.'

⁵ Naate watakne dé déku némaan banét yéwaa nyégélén duwat waadéka de nak nak de yaak. Yaadaka dé taale yaan dut wak, ‘Méné wuna némaan banké gwalmu yagap nyégéle méné kwayékataké méné yo?’

⁶ Naate wadéka dé wak, ‘Wupmalemu (100) gu tékwa apakélé awu.’ Naate wadéka dé gwalmuké téségékwa du déréti wak, ‘Wani gwalmu akwi kwayékatamarék yaké méné yo. Kwayékataménérān yéwaa kavidén nyéga kéba dé ro. Méné rate bari nak kudi wani nyégaba mé kavi. Méné walkamu (50) male kaviké méné yo.’

⁷ Naate watakne dé nak dut wak, ‘Méné wuna némaan banké gwalmu yagap nyégéle kwayékataké méné yo?’ Naate wadéka dé wak, ‘Wupmalemu (100) bek wit.’ Naate wadéka dé wak, ‘Wani gwalmu akwi kwayékatamarék yaké méné yo. Kwayékataménérán yéwaa kavidén nyéga kéba dé ro. Méné nak kudi wani nyégaba mé kavi. Méné walkamu (80) male kaviké méné yo.

⁸ Naate wadéka yadéka kukba wani némaan

ban dé kudi véknwuk, déku gwalmuké téségékwa du bét dérét kukba kutkalé yabéruké waga yénaa yadéka. Véknwute dé wak, ‘Aki. Wani kapéredi mu yakwa du dé déku sépat kutkalé yaké nae dé miték sanévéknwuk.’ Naate dé déké wak.”

Wani kudi watakne Jisas dé déku duwat kéga wakwek, “Naané kudténgék. Kéni képmaana muké mawulé yakwa du de deku sépéché sanévéknwu. Sanévéknwute de nak du taakwat kutkalé yo, de kaatare derét kutkalé yadoké. Waga yate de miték sanévéknwu. Wani muké deku yéknwun mawulé Gotna du taakwa deku yéknwun mawulat débu talaknak.

9 *Gunat wuné wakweyo. Guné yéknwun jébaa yaké guné yo guna yéwaa wale, keni képmaana nak mu wale wawo. Guné wani mu wale jébaa yate du taakwat kutkalé yagunu de guna du taakwa raké de yo. Rado kukba guné kiyae Gotna gayéba wulæ miték raké guné yo.

10 *Makwal jébaa miték yakwa du taakwa de némaa jébaa wawo miték yaké de yo. Makwal jébaa sépélak yakwa du taakwa de némaa jébaa wawo sépélak yaké de yo.

11 Guné keni képmaana yéwaaké jébaa sépélak yagunéran yaga pulak guné Gotna muké jébaa miték yaké guné yo? Kaapuk. Gotna muké jébaa miték yaké guné yapatiké guné yo.

12 Guné nak duna muké jébaa sépélak yagunéran yaga pulak Got gunéké rasaakukwa mu kwayéké dé yo? Kaapuk. Kwayémärék yaké dé yo.

13 *Du nak némaan du vétikgé jébaa yaké

* **16:9:** Lu 12:33

* **16:10:** Mt 25:21

* **16:13:** Mt 6:24

dé yapatiyu. Waga jébaa yadéran dé nak némaan duké yéknwun mawulé yate nakgé kélík yaké dé yo. Guné wani du pulak guné ro. Guné némaan ban Gotké jébaa yate déké male sanévéknwugunéran guné déké apuba apuba yéknwun mawulé yaké guné yo. Yate guné yéwaa kéraaké sanévéknwumarék yaké guné yo. Guné yéwaa kéraaké male apuba apuba sanévéknwugunéran guné némaan ban Gotké kélík yaké guné yo.” Naate dé Jisas derét wak.

Moses wakwen apa kudiké Gotna kémké wawo dé wakwek

¹⁴*Parisina du wani kudi véknwute de Jisas-nyét waséléknék, yéwaaké mawulat kapére yadan bege.

¹⁵*Yadaka dé derét wak, “Guné duna méniba guné saaki yéknwun mu guné yo, de gunat véte kéga wadoké, ‘Guné yéknwun mu yakwa du guné.’ Naate wadoké waga yagunéka dé Got guna mawulé dé kutdénéngék. Guna mawulé miték témarék yadékwaké kutdénéngte dé gunéké dé kuk kwayu.

¹⁶“Déknyényba Moses keni képmaaba radén tulé yakéreye yakéreye gu yaakutaknan du Jon ran tulé wawo akwi du taakwa de Moses wakwen apa kudi véknwute Gotna yéba kudi wakwen duna kudi wawo véknwute wadan pulak de yak. Bulaa wuné du taakwat wunébu wakwek, Got némaan ban rate du taakwaké miték védéranké. Wak-wewuréka wupmalemu du taakwa déku kembá yaalaké nae de apa jébaa de yo.

* **16:14:** Mt 23:27-28 * **16:15:** Lu 18:9-14

17 *Moses wakwen apa kudi kaapuk yamarék yaké dé yo. Kukba nyét képmāa kaapuk yadu wani kudi kaapuk yamarék yaké dé yo.

Deku taakwayédoké du wamarékyadaranké dé wakwek

18 *“Du deku taakwa derét kulaknyéntakne yédoké watakne nak taakwa yadaran de kukba yadan taakwa wale kapéredi mu de yo. Du deku taakwa derét kulaknyéntakne yédoké wado nak du wani taakwa yadaran de wani taakwa wale kapéredi mu de yo.”

Gwalmumama du bét Lasaras

19 Wani kudi watakne dé Jisas derét kéga wakwek, “Déknyényba gwalmumama du dé nak rak. Déku wayéknaje naktaba de rak. Akwi nyaa dé yéknwun baapmu wut male kusadak. Yate akwi nyaa dé wupmalemu yéknwun kadému kak.

20-21 Gwalmu yamarék du wawo dé rak. Déku yé Lasaras. Wupmalemu nyaa déku du de dérét yaate yék gwalmumama duna gat. Yaate ye gana gwés wale taknadaka dé kwaak. Déku sépé waasat kapére ye tédéka wupmalemu apu de waasa yaate de déku waaséba kénybiyaknék. Dé gwalmumama duna gwés wale kwaate dé gwalmumama du kadému kadéka akére képmāaba rakwa régén kadému kaké dé mawulé yak.

22 “Kukba dé wani gwalmu yamarék du Lasaras dé kiyaak. Kiyaadéka de Gotna kudi kure giyaakwa du dérét kure ye de Ebrayam wale

* **16:17:** Mt 5:18 * **16:18:** 1 Ko 7:10-11

taknak. Yadaka dé gwalmumama du wawo kiyaadéka de rémék.

23 Rémtaknadaka dé ye yaa yaansaakukwa taaléba rate dé kaagél kurék. Kutte kwaasawure dé vék Ebrayam Lasaras wale awuré séknaaba rabétka.

24 Véte dé némaanba waak, ‘Wuna képmawaara Ebrayam, keni taaléba yaa wuna sépéba yaandéka wuné apa kaagél kuru. Kutwurékwaké méné wunéké mawulé lékte méné Lasarasnyét waménu dé gu las kure yae dé wuna téknayélengba taknaké yo.’ Naate dé wak.

25 “Wadéka dé Ebrayam wak, ‘Ména, méné mé sanévéknwu. Déknyényba méné képmaaba rate wupmalemu yéknwun gwalmu méné taknak. Taknaménéka Lasaras waga kaapuk taknadén. Kapéredi mu male dé déké yaak. Bulaa dé yéknwun taaléba miték radéka méné kapéredi taaléba rate kaagél méné kuru.

26 Kéni muké wawo mé sanévéknwu. Ané rakwa méné rakwa nyédéba Got apakélé kabi dé nak taknak. Taknadék kéba rakwa du méné rakwat yéké de yapatiyu. Waba rakwa du wawo kénét yaaké de yapatiyu.’

27-28 “Wani kudi véknwute dé wupmalemu gwalmu déknyényba yan du wak, ‘Waga yaran wunéké sanévéknwumarék. Wuna wayéknqaje naktaba de ro wuna yaapan gaba. Méné, wuna képmawaara, ménat wuné waato. Méné Lasarasnyét waménu dé deké yéké dé yo. Ye dé derét rawurékwá kapéredi taaléké wakweké dé yo. De wawo keni taalat yae apa kaagél kutmuké dé derét wakweké dé yo.’

29 Naate wadéka dé Ebrayam wak, ‘Kaapuk. Moses wakwen apa kudi, Gotna yéba wakwen duna kudi wawo dé Gotna nyégaba kwao. Wani kudi véte de mé véknwu.’

30 “Wani kudi wadéka dé Ebrayamét wak, ‘Wuna képmawaara, wan kaapuk. De deku kudi véknwumarék yaké de yo. Kiyaan du nak nébéle raapme deké yédéran de véknwuké de yo. Véknwute yadan kapéredi mu kulaknyényké de yo.’

31 Naate wadéka dé Ebrayam wak, ‘De Moses wakwen apa kudi Gotna yéba déknyényba wakwen duna kudi wawo véknwumarék yadaran de kiiae nébéle raapmén banna kudi wawo véknwumarék yaké de yo.’ Naate dé Ebrayam wak.” Waga dé Jisas derét wak.

17

Yadakwa kapéredi muké dé Jisas kudi wakwek

1-2 Jisas dé déku duwat wak, “Wuné kudéngék. Kukba du taakwa las Gotna kudi kulaknyénye kapéredi mu yaké de yo. Yénaa yakwa du las wakwedo Gotna kudi véknwukwa du taakwa deku kudi véknwute Gotké kuk kwayédaran apakélé kapéredi mu waga wakwen duké yaaké dé yo. Waga wakweké yaran duwat de taale deku kwaaléba apakélé matu gitakne derét yatjadado de géléguba dawuliye gu ke kiyaado mukatik wan kapéredi mu. De wakwedo Gotna kudi véknwukwa du taakwa deku kudi véknwute Gotké kuk kwayédaran Got waga wakweran duwat

yadan kapéredi mu némaanba yakataké dé yo.
Wan apakélé kapéredi mu.

³*Guné wani duké jéraru yaké guné yo.

“Du nak kapéredi mu yadéran guné dérét
waatiké guné yo. Waatigunu dé yadén kapéredi
mu kulaknyénydéran guné wani muké tépa
sanévéknwumarék yaké guné yo.

⁴Dé nakurak nyaa wupmalemu apu gunat
kapéredi mu ye gunéké yae kéga wadéran,
‘Gunat yawurén kapéredi muké kélík ye bulaa
wuné wani mu kulaknyényké wuné yo.’ Naate
wadéran akwi apu guné waké guné yo, ‘Yaak.
Yaménén kapéredi muké tépa sanévéknwumarék
yaké naané yo.’ Naate waké guné yo.”

Gotké miték sanévéknwudaranké dé Jisas wakwek

⁵*Jisasna du de dérét wak, “Némaan Ban,
méné naanat kutkalé yaménu naané Gotké miték
sanévéknwute ména jébaaké miték kudéngké
naané yo.”

⁶*Naate wadaka dé Némaan Ban Jisas dé
wak, “Guné Gotké walkamu yéknwun mawulé
yagunéran guné apa jébaa yaké guné yo. Kéba
tékwá mi mé vé. Guné Gotké walkamu yéknwun
mawulé yagunu, guna yéknwun mawulé makwali
sék pulak makwali male tédu, kéri mi raapme ye
kusba dawuliduké Gorét waatagunéran, kéri mi
raapme ye kusba dawuliké dé yo.”

Jébaa yadaranké dé Jisas kudi wakwek

* **17:3:** Mt 18:15 * **17:5:** Mk 9:24 * **17:6:** Mt 17:20

⁷ Wani kudi watakne dé Jisas derét wak, “Guna du nak déku jébaa yakwa du képmaa dé vao, kapu sipsipké dé tésegú? Dé garabu jébaa yabutitakne déku némaan duna gat yédu sal déku némaan du déréti kéraa waké dé yo? ‘Méné bari mé yae ra kadému katu.’”

⁸ Waga wamarék yate kéraa waké dé yo, ‘Méné wuna kadému mé kawu saakéra. Yatakne méné wuna kadému wunéké tiyaaké yo. Tiyaaménu wuné taale kawuru méné méné kukba kaké yo.’ Naate némaan du waké dé yo, déku jébaa yakwa dut.

⁹ Wadu déku jébaa yakwa du waga yadu, wani némaan du wani muké déku jébaa yakwa duna yéba kevérékmarék yaké dé yo, dé déku jébaa male yadén bege.

¹⁰ Guné wani jébaa yakwa du pulak Gotna jébaa yaké guné yo. Gotna jébaa yate guné waké guné yo, ‘Naané bakna jébaa yakwa du naané ro. Got tiyaadén jébaa naané yo. Yanan jébaaké guné naana yéba kevérékmarék yaké guné yo.’ Waga waké guné yo.” Naate dé Jisas derét wak.

Jisas lepéro yan du taaba vétiknét dé kutnébulék

¹¹ Jisas Jerusalemét yédakwa yaabuba dé yék. Yédéka Sameriana képmaa nak saknwuba tédéka Galilina képmaa nak saknwuba dé ték.

¹² Jisas yaabuba ye gayé nak saabadéka de lepéro yan du taaba vétik waga de séknaaba téte déréti de yaabuba vék.

¹³ Véte de némaanba waak, “Némaan du, Jisas, naanéké mé mawulé lékménu.”

14* Naate waadaka dé derét véte dé wak, “Guné ye guné Gotna gaba jébaa yakwa nyédé duwat guna sépé wakwatnyéké guné yo.” Naate wadéka de déku kudi véknwute yédaka dé deku sépé tépa yéknwun yak.

15 Yadéka dé wani du nak déku sépé yéknwun yadéka véte dé tépa yaak. Yae némaanba waate dé Gotna yéba kevéréknék.

16* Kevérékne Jisasna maan wale kwati yaane waadé daate, dé Jisaské yéknwun mawulé yate dé déku yéba kevéréknék. Wani du wan Sameriaba yaan ban.

17 Yadéka Jisas dé wak, “Du taaba vétik deku sépé yéknwun dé yak. Du nak taaba sékét nak taababa kayék wan véti wan véti de yaba de?

18 Samuké dé nakurak du male, nak geba yaan du dé déku kapmu gwaamale yaak, Gotna yéba kevérékgé?”

19 Naate watakne dé wani dut wak, “Méné wunéké miték sanévéknwute, wuné ménat kutnëbulké apa yawurékwaké waménék bulaa méné tépa yéknwun ménébu yak. Méné mé raapme méné yéké yo.” Naate dé Jisas wani dut wak.

Got némaan ban rate du taakwaké miték védéranké dé wakwek

20* Parisina du las de Jisasnyét waatak, Got némaan ban rate du taakwaké miték védérän tulé yaaranké. Waatadaka dé derét wak, “Got némaan ban rate du taakwaké miték védérän tulé yaadu guné vémärék yaké guné yo.

* **17:14:** Lu 5:14 * **17:16:** Jo 4:9 * **17:20:** Jo 3:3, 18:36

21 Yagunu du las kéga wamarék yaké de yo, ‘Mé vé. Got deku némaan ban rate, kéba dé ro.’ Naate wamarék yado nak du kéga wamarék yaké de yo, ‘Mé vé. Got deku némaan ban rate, wani taaléba dé ro.’ Naate wamarék yaké de yo, Got némaan ban rate guna mawuléba radékwa bege.”

22 *Wani kudi watakne dé Jisas déku duwat kéga wakwek, “Kukba guné Akwi Du Taakwana Nyaan wunat véké mawulé yaké guné yo. Yate guné wunat vémorék yaké guné yo.

23 Wani tulé du las gunat kéga waké de yo, ‘Wani dut mé vé. Akwi Du Taakwana Nyaan kéba dé ro.’ Naate wado las waké de yo, ‘Kaa-puk. Waba dé ro.’ Naate wado guné deku kudi véknwumarék yaké guné yo. De yénaa de yo.

24 Wuné Akwi Du Taakwana Nyaan gwaamale giyaawuru akwi du taakwa véké de yo. Nyét kulabidéka akwi du taakwa védakwa pulak, guné akwi wuné giyaawuru véké guné yo. Waga végunéranké sanévéknwute, guné deku yénaa kudi véknwumarék yaké guné yo.

25 Taale bulaa rakwa du taakwa wunat kapéredi mu yate, wunéké kuk tiyaaké de yo.

26 “Déknyényba Noa ran tulé du taakwa yadan pulak, Akwi Du Taakwana Nyaan wuné gwaa-male yaawuréran tulé du taakwa waga male yaké de yo.

27 Noa ran tulé du taakwa de Gotké sanévéknwumarék yate, keni képmaana muké male de sanévéknwuk. Sanévéknwute kadému kadan, gu kadan, taakwa yadan, waga yadaka dé

* **17:22:** Lu 21:7-8

Noa apakélé sip yatakne dé wani sipba wulaak. Wulaadéka apakélé kwayé kwaléka de akwi gu ke kiyaasadak.

28 Déknyényba Ebrayamna wayéknə déku nyaan Lot ran tulé Sodomba ran du taakwa waga male yate de rak. De Gotké sanévéknwumarék yate keni képmaana muké male de sanévéknwuk. Sanévéknwute, kadému kadan, gu kadan, gwalmu kéraadan, gwalmu kwayédan, kadému yaandan, ga kaadan, waga de yak.

29 Yadaka dé Lot Sodom kulaknyénytakne yédéka dé apakélé yaa matu wale maas viyaakwa pulak akéré dé akwi du taakwat yaalébaanék.

30 Wani du taakwa yadan pulak, wuné Akwi Du Taakwana Nyaan giyaawuréran tulé du taakwa waga male yaké de yo. De wunéké sanévéknwumarék yate, deku muké male sanévéknwudo wuné giyaaké wuné yo. Giyaawuru de véké de yo.

31 *“Wani tulé kaapaba rakwa du taakwa bari yaage yéké de yo. Deku gwalmu kéraaké deku gat tépa wulaamarék yaké de yo. Bakna yaage yéké de yo. Yaawiba tékwa du taakwa gayét gwaamale ye baapmu wut las wawo kéraamarék yaké de yo. Bari yaage yéké de yo.

32 Guné Lotna taakwaké sanévéknwuké guné yo. Déknyenyba lé léku gayét véké walaakwe lé kiyaak. Guné walaakumarék yate, bakna yaage yéké guné yo.

33 Du taakwa wuna jébaa yado wuna maama derét viyaapérekdaran de miték rasaakuké de yo

* **17:31:** Mk 13:15-16

apuba apuba. Du taakwa wuna jébaa yamarék yate, deku sépéché male sanévéknwute, deku jébaa male yadaran de kiyaé yalakgé de yo. Miték rasaakumarék yaké de yo.

34 Gunat wuné wakweyo. Gwaamale yaawurérən tulé du vétik nakurak jaabéba kwaabéru Gotna kudi kure giyaakwa du naknét kéraate naknét kulaknyényké de yo.

35 Wani tulé taakwa vétik kadému kawu saakérabéru Gotna kudi kure giyaakwa du naknét kéraate naknét kulaknyényké de yo.

36 [Wani tulé du vétik yaawiba jébaa yabéru Gotna kudi kure giyaakwa du naknét kéraate naknét kulaknyényké de yo.]

37 Wani kudi wadéka véknwute déku du de wák, “Némaan Ban, wani mu yaba yaké dé yo?” Naate wadaka dé Jisas derét wak, “Kwarékadi yaate jawudaka véte guné kiyaan kwaami nak radékwaké kutdéngék. Wani muké kutdénggunékwa pulak, guné wakwewurén mu véte, kutdéngké guné yo, wuné yaawuréranké.” Waga dé Jisas derét wak.

18

Taakwa kot véknwukwa némaan banét waatalénké dé wakwek

1*Jisas kéni aja kudi dé déku duwat wakwek. De Gorét waatamuké wulkiyaa yamarék yadoké dé derét kéga wakwek. De Gorét waataasaakudo dé deku kudi véknwudéranké dé derét kéni aja kudi wakwek.

* **18:1:** Kl 4:2

2 Kéga dé wak: “Némaa gayéba dé kot véknwukwa némaan ban nak rak. Wani du dé Gotké wup yamarék yate, dé du taakwaké wawo kaapuk sanévéknwudén.

3 Dukiyaataakwa nak lé wani gayéba rak. Rate akwi nyaa lé kot véknwukwa némaan banké yéte, lé saaki saaki kéga dérét wakwesaakuk, ‘Wuna maama wunat kapéredi mu débu yak. Yadénké méné wunat kutkalé yaké méné yo, kapu yaga pulak?’

4 *Naate waléka wani du dé wak, ‘Kaapuk.’ Watakne taale lérét kutkalé yamuké kélík dé yak. Yadéka lé wupmalemu apu yéte dérét waataléka kukba dé déku mawuléba wak, ‘Wuné Gotké wup yamarék yate, du taakwaké wawo kaapuk sanévéknwurékwa.

5 Yate wuné wani taakwa akwi nyaa wunéké yaate saaki saaki wunat waatasakumuké wuné wulkiyaa yo. Lé waga yate wuna mawulé yaalébaanmuké, wuné léku kudi véknwute lérét kutkalé yaké wuné yo.’ Waga dé kot véknwukwa némaan ban wak.”

6-7 *Némaan Ban Jisas wani kudi watakne dé derét wak, “Guné kot véknwukwa némaan banké mé sanévéknwu. Dé kapéredi mu yakwa du rate dé wani taakwana kudi véknwuk. Wani muké sanévéknwute, kutdéngké guné yo. Got yéknwun mu male yakwa ban rate, dé déku du taakwana kudi véknwuké dé yo. De akwi nyaa akwi gaan dé derét kutkalé yaduké waataate, dérét waatasakudaran, dé deku kudi véknwuké dé yo.

* **18:4:** Lu 11:5-9

* **18:6-7:** Re 6:9-11

8 Véknwute derét bari kutkalé yaké dé yo. Waga kudénggunuké wuné gunat wakweyo. Guné mé sanévéknwu. Kukba wuné Akwi Du Taakwana Nyaan gwaamale giyae Gotké miték sanévéknwukwa du taakwat véké wuné yo, kapu kaapuk?"

Parisina du bét takis nyégélén duké dé wakwek

9 *Jisas dé kudéngék. Du taakwa las deku mawuléba de wak, "Naané Gotna méniba yéknwun du taakwa naané ro. Nak du taakwa déku méniba gweba du taakwa de ro." Naate wate de kaapuk miték sanévéknwudan.

10 Waga kudéngte dé derét keni aja kudi wakwek: "Du vétik Got wale kudi bulké nae bét Gotna kudi buldakwa némaa gat waarek. Wani du nak wan Parisina du. Nak wan takis nyégélén du.

11 *Parisina du waare dé kapmu téte dé Gorét kéga wak, 'Méné Got, wuné yéknwun du rawurékwaké, wuné ména yéba kevéréknu. Wuné nak du taakwa yakwa pulak yamarék yate, wuné ménat waato. De nak duna gwal-muké mawulat kapére yadakwa, yénaa kudi wak-wedakwa, du nak duna taakwa wale kapéredi mu yadakwa waga yate de kapéredi mu yo. Wuné kéba tékwa takis nyégélkwa du kapéredi mu yakwa pulak, kaapuk yawurékwa.

12 Wuné akwi wík wuné nyaa vétik kadému kamárék wuné ro. Rate wuné kéraawurékwa akwi mu muniye tabé nak taaba sékét nak taababa kayék wan véri wan véri takne nakurak tabé wuné ménéké kwayu.'

* **18:9:** Lu 16:15 * **18:11:** Mt 23:23, 28

¹³ Naate wadéka dé takis nyégélén du séknaaba dé ték. Téte yadén kapéredi muké nyékéri yate, dé nyérét kaapuk kwaasawuré védén. Yate waadé daate dé Gorét kéga wak, ‘Méné Got wuné kapéredi mu yakwa du. Méné wunéké mé mawulé lékménu.’ Naate dé wak.”

¹⁴ Wani kudi watakne dé Jisas derét wak, “Gunnat wuné wakweyo. Takis nyégélén du yadén kapéredi mu Got dé yatnyéputik. Yatnyéputidéka dé Gotna méniba yéknwun du rate dé miték yék déku gat. Parisina du dé Gotna méniba yéknwun du kaapuk radén. Deku yéba kevérékgwa du taakwaké kukba Got wadu de bakna du taakwa raké de yo. Deku yéba kevérékmarék yakwa du taakwaké kukba Got wadu de némaan du taakwa raké de yo.” Naate dé Jisas derét wak.

Jisas dé makwal baadir kutkalé yak

¹⁵ Du taakwa de makwal baadir Jisaské kure yék, dé derét taaba kutte deké Gorét waataduké. Kure yédaka de Jisasna du véte de derét waatik.

¹⁶ Waatidaka dé Jisas wani baadir waak, déké yaadoké. Waatakne dé déku duwat wak, “Makwal baadi wunéké de mé yao. Yaado guné derét waatimarék yaké guné yo. Gotna kémba rakwa du taakwa wan wani makwal baadi pulak.

¹⁷ Got némaan ban rate déku du taakwaké miték véké dé yo. Dé waga yadéranké makwal baadi de yéknwun mawulé yo. Makwal baadi yakwa pulak, du taakwa dé déku miték védéranké yéknwun mawulé yadaran de déku kémba yaalaké de yo. Makwal baadi yadakwa pulak yéknwun mawulé

yamarék yakwa du taakwa de déku kémba yaalamarék yaké de yo.” Naate dé Jisas derét wak.

Wupmalemu gwalmu yan du dé Jisas wale kudi bulék

¹⁸ Wupmalemu gwalmu yan némaan du nak dé Jisasnyét wak, “Méné yéknwun du rate méné Gotna jébaaké naanat yawkatnyu. Méné mé wakwe. Samu mu ye wuné kulé mawulé kérae apuba apuba miték rasaakuké wuné yo?”

¹⁹ Naate wadéka dé Jisas wak, “Samuké méné wunat ‘Yéknwun du’ wo? Got kapmu dé yéknwun ban dé ro.

²⁰ *Got wakwedéka Moses wakwen apa kudi méné kutdéngék. Kutdéngte méné véknwuké yo. ‘Méné nak duna taakwa wale kapéredi mu yamarék yaké méné yo. Du taakwat viyaapérekmarék yaké méné yo. Sél yamarék yaké méné yo. Nak duké yéwaa kudi wakwemarék yaké méné yo. Méné ména néwepat kutkalé yaké méné yo.’ Moses wani kudi wakwedéka méné kutdéngék.”

²¹ Naate wadéka dé wak, “Wuné baadi rawurén tulé wuné wani apa kudi wuné véknwuk. Kéni tulé wawo wuné véknwu.”

²² *Naate wadéka dé wak, “Méné nak mu wawo yaké méné yo. Méné taknaménén akwi gwalmu nak duké kwayétakne yéwaa nyégéle méné yéwaa yamarék du taakwaké kwayéké méné yo. Kwayéménu kukba Got ménat kutkalé yadu méné Gotna gayét ye waba miték male rasaakuké méné yo. Méné yéwaa yamarék

* **18:20:** Eks 20:12-16 * **18:22:** Lu 12:33

du taakwaké yéwaa kwayétakne gwaamale yae
wuna jébaaba yaalaké méné yo.”

²³ Waga wadéka wani kudi véknwudéka déku
mawulé kapére dé yak, dé wupmalemu yéwaa ye
nak duké kwayémuké kélík yadén bege.

²⁴ Jisas wani dut véte dé déku duwat wak,
“Wupmalemu gwalmu yan du taakwa kwekéré
ye de Gotna kékba yaalamarék yaké de yo. De
apa ye Gotna kékba yaalaké de yo.

²⁵ Kéni kudi wawo mé véknwu. Apakélé
bulmakawu nak baapmu wut kétaapadakwa
raaményna yaabuba wulaaké mawulé yadérán
apa yaké dé yo. Wupmalemu gwalmu yan du
taakwa Gotna kékba yaalaké mawulé yate apat
kapére yaké de yo.”

²⁶ Naate wadéka de wani kudi véknwutakne
de wak, “Wupmalemu gwalmu yan du taakwa
Gotna kékba wulaaké nae apat kapére yadarán
yaga pulak gwalmu yamarék yakwa du taakwa
Gotna kékba wulæ miték rasaakuké de yo apuba
apuba? Wan kaapuk. Gotna kékba wulaaké de
yapatiké de yo.”

²⁷ Naate wadaka dé wak, “Du taakwa deku
kapmu apa yate, Gotna kékba yaale miték
rasaakuké de yapatiyu. Got kapmu wani muké
dé apa yo. Got akwi mu yaké dé apa yo.”

²⁸ Wani kudi wadéka dé Pita wak, “Mé véknwu.
Naané naana ga naana gwalmu wawo ku-
laknyénytakne naané ména jébaa yate méné wale
ye yeyé yevo.”

²⁹⁻³⁰ Naate wadéka dé Jisas wak, “Wan adél.
Mé véknwu. Wunéké miték sanévéknwukwa
du taakwa Gotna jébaa yaké nae deku ga, du,

taakwa, némaadugu wayéknaje, néwaa yaapa, baadir kulaknyénydaran Got bulaa derét kutkalé yadu de miték rasaakuké de yo apuba apuba. Adél wuné gunat wakweyo.” Naate dé derét wak.

Jisas kiyaé tépa nébéle raapdéranké dé tépa wakwek

³¹ Jisas déku du taaba vétik sékérék maanba kayék vétik de wale kudi bulte dé derét wak, “Mé véknwu. Bulaa Jerusalemét naané waaru. Waaréno Gotna yéba kudi wakwen du Akwi Du Taakwana Nyaan wunéké Gotna nyégaba kavidan kudi adél yaké dé yo.

³² Jerusalemba de wunat nak gena duké kwayédo wuné deku taababa raké wuné yo. Rawuru de wunat wasélékte kapéredi mu yate sépmeny sévaaviké de yo.

³³ Yate wunat raamény baagwit viyaatakne wunat viyaapérekgé de yo. Yado kiyaawuru nyaakupuk yédu wuné tépa nébéle raapké wuné yo.”

³⁴ Waga wadéka déku du wani kudiké kaapuk miték kudéngdan. Got wani mu paakudéka de Jisas wakwedén kudiké kaapuk miték kudéngdan.

Jisas méni kiyaan dut dé kutnédébulék

³⁵ Jisas déku du wale de Jeriko saabaké yak. Yadaka méni kiyaan du nak dé yaabuba rate dé du taakwat yéwaaké yaawik.

³⁶ Yaawite dé véknwuk wupmalemu du taakwa yédaka. Véknwute dé duwat las waatak, “Wan samu de yo?”

37 *Naate waatadéka de dérét wak, “Nasaret ban Jisas dé yao.”

38 *Naate wadaka dé waak, “Ménawa, Devitna képmawaara Jisas, mé véknwu. Méné Devit pulak némaan ban rate wunéké mé mawulé lékménu.”

39 Naate wadéka de taale yén du dérét waatite de wak, “Akélak mé ra.” Naate wadaka dé kaapuk akélak radén. Tépa waate dé wak, “Méné, Devitna képmawaara, wunéké mé mawulé lékménu.”

40-41 Naate wadéka dé Jisas téte dé derét wak, “Dérét mé kure yaa wunéké.” Naate wadéka dé ye Jisas tén saabadéka dé dérét waatak, “Wuné ménat samu yawuruké méné mawulé yo?” Naate wadéka dé wak, “Némaan Ban, wuné véké wuné mawulé yo.”

42 Naate wadéka dé dérét wak, “Ménat kutnébulwuréran apaké miték sanévéknwuménék bulaa ména méni yéknwun dé yo. Bulaa méni mé vé.”

43 Waga wadéka dé déku méni bari tépa yéknwun yadéka dé vék. Véte dé Jisas wale yéte dé wawo Gotna yéba kevéréknék. Yadéka wani mu vén du taakwa de wawo Gotna yéba de kevéréknék.

19

Sakias dé Jisaské miték sanévéknwuk

1 Jisas dé Jerikot wulaak. Wulæ dé nak get yéké nae dé yaabuba yék.

* **18:37:** Mt 2:23 * **18:38:** Mt 1:1

² Takis nyégélén du nak déku yé Sakias dé wani gayéba rak. Dé takis nyégélén duna némaan ban rate dé wupmalemu yéwaa taknak.

³ Dé Jisasnyét véké dé mawulé yak. Yadéka wupmalemu du taakwa tédaka dé Jisasnyét véké dé yapatik, dé wap du bege.

⁴ Ypatiye dé taale pétépété ye dé miba nak waarek, Jisasnyét véké. Jisas wani yaabuba yaadéranké kudéngte dé miba nak waarek.

⁵ Waare radéka Jisas yae wani taalé saabe dérét kwaasawuré véte dé dérét wak, “Sakias, bulaa méné wale ména gaba raké wuné yo. Méné bari méné giyaaké yo.”

⁶ Waga wadéka dé bari giyaate dé dusék yak. Yate dé Jisasnyét déku gat kure yék.

⁷ Yédéka de akwi du taakwa véte de wak, “Jisas dé kapéredi mu yakwa du wale raké dé déku gat yu. Wan sépélak dé yo.”

⁸ Sakias dé Némaan Ban Jisasnyét wak, “Némaan Ban, mé véknwu. Bulaa wuné wuna gwalmu nyédéba muniké wuné yo. Muniye nak tabé gwalmu yamarék duké kwayéké wuné yo. Kwayéte kéga wawo yaké wuné yo. Wuné déknyényba duwat las yénaa ye deku gwalmu nyégélwuréran wuné deké tépa kwayéte tabé kupuk wawo kwayéké wuné yo.”

⁹⁻¹⁰ *Naate wadéka dé Jisas wak, “Kéni du dé wawo Ebrayamna képmawaara dé ro. Rate déknyényba Gotké miték sanévéknwumarék yate débu yalaknék. Bulaa guné déku kudi véknwute guné kudéngék. Bulaa Got dérét déku gaba

* **19:9-10:** Ap 16:31; 1 Ti 1:15

rakwa du taakwat wawo Setenna taababa débu kéraak. Kéraadénké de déku taababa miték rasaakuké de yo. Yalaknén du taakwaké sékale véte derét Setenna taababa kéræe derét kutkalé yaké wuné Akwi Du Taakwana Nyaan kéni képmaat giyaak.” Naate dé derét wak.

Jébaa yan du yéwaa nyégéldanké dé aja kudi wakwek

¹¹ Jisas Jerusalem saabaké dé yak. Yadéka du taakwa de deku mawuléba wak, “Got némaan ban rate naanéké miték védéran tulé bari yaaké dé yo.” Naate wadaka dé Jisas derét aja kudi kéga wakwek.

¹²⁻¹³ “Némaan du nak séknaa get yéké yate, taale déku jébaa yakwa du taaba vétiknét waadéka yédaka dé deké nak nak dé yéwaa las kwayék (20 kina, 20 kina pulak). Kwayéte dé derét wak, ‘Kéni yéwaa kure jébaa yagunu wuné tépa gwaamale yae kéraaké wuné yo.’ Naate watakné dé séknaa get yék, waba rakwa némaan ban dérétt wadu dé déku gayéba rakwa du taakwaké némaan ban raduké. Ye wani kudi véknwe bari bari gwaamale yaaké dé sanévéknwuk.

¹⁴ Dé yédéka de déku gayéba ran du taakwa déké kélék yate, de duwat las wadaka de déku kukba yék. Ye de séknaa geba ran némaan banét wak, ‘Naané wani du naanéké némaan ban ramuké kélék naané yo.’

¹⁵ “Kukba wani némaan ban dé wani dut wak, dé déku gayéba rakwa du taakwaké némaan ban raduké. Wadéka véknutakne re dé tépa gwaamale yaak. Yae dé wak, ‘Déknyényba yéwaa

kwayéwurén duwat mé waa yaado. Kwayéwurén yéwaa kure jébaa ye yéwaa yagap de nyégélék?’

16 Naate wadéka du nak taale yae dé dérét wak, ‘Némaan ban, wuné méná yéwaa kure jébaa ye wuné wupmalemu yéwaa nyégélék (200).’

17 *Naate wadéka dé némaan du dérét wak, ‘Méné yéknwun jébaa yakwa du méné. Yéknwun jébaa ménébu yak. Méné makwal muké ménébu miték vék. Véménénké wuné wawuru méné gayéké taaba vétik némaan ban raké méné yo.’

18 Naate wadéka dé nak du wawo yae dé wak, ‘Némaan ban, wuné méná yéwaa kure jébaa ye wuné wupmalemu yéwaa las wawo nyégélék (100).’

19 Naate wadéka dé némaan du wak, ‘Wan yéknwun. Bulaa wuné wawuru méné gayéké naktaba némaan ban raké méné yo.’

20-21 Naate wadéka nak du yae dé wak, ‘Némaan ban, wuné ménéké wuné kutdengék. Méné du taakwaké mawulé kaapuk lékménékwa. Méné gwalmu las wawo bakna kéraaké mawulé yate, méné nak du taakwat kutkalé kaapuk yaménékwa. Wuné ménéké wup yate wuné tiyaaménén yéwaa baapmu wutba kusépmé wuné taknak. Ména yéwaa kéba dé ro. Bulaa ménéké tépa wuné kwayu.’

22 Naate wadéka dé némaan du wak, ‘Méné kapéredi jébaa yakwa du. Wakweménén kudi véknwute wuné yaménén kapéredi mu ménat yakataké wuné yo. Wuné apa yate nak du taakwaké mawulé lékmarék yate gwalmu las wawo bakna kéraaké mawulé yate, wuné nak du taak-

* **19:17:** Lu 16:10-11

wat kaapuk kutkalé yawurékwa. Wan adél méné wak. Waga yawurékwaké ménébu kutdéngék.

²³ Kutdéngte samuké wuna yéwaa méné yéwaa taknadakwa gaba taknamarék yak? Méné waba taknaménu mukatik wuné gwaamale yae wani yéwaa kérae yéwaa las wawo kéraakatik wuné yak.'

²⁴ Naate watakne dé waba téen duwat wak, 'Guné déké kwayéwurén yéwaa dérét nyégéle guné wupmalemu yéwaa yan duké kwayéké yo.' Wani jébaa yakwa du dé kwayéwurén yéwaa kure yéknwun jébaa dé yak.

²⁵ Naate wadéka de dérét wak, 'Némaan ban, samu méné yo? Dé wupmalemu yéwaa débu yak.'

²⁶ Naate wadaka dé derét wak, 'Yéknwun jébaa ye wupmalemu gwalmu kéraan du taakwa kukba gwalmu las wawo kéraaké de yo. Yéknwun jébaa yamarék yate walkamu gwalmu yan du taakwa kukba bakna raké de yo.'

²⁷ Wuna maama wuné deku némaan ban ramuké kélék yadanké guné derét kure yae wuna méniba viyaapéreké guné yo.' Naate dé némaan du wak."

Jisas némaan ban rate dé Jerusalemét wulaak

²⁸ Jisas wani kudi watakne dé taale ye dé déku du wale Jerusalemét waardakwa yaabuba waarek.

²⁹⁻³⁰ Waare Betpasi tédéka Betani wawo tédéka dé vék. Wani gayé vétik Oliv nébuba bét tu. Jerusalem tékwaba bét tu. Vétakne saabaké yate dé déku du vétiknét wak, "Béné wani gayét wulae béné véké yo donki nyaanét nak. Miba

lékitaknadak dé tu. Déknyényba du déku butgulba kaapuk radén. Béné dérét lépmwénye béné kure yaaké yo.

³¹ Yabénu du nak bénat kéga waatadéran, ‘Samu yaké béné wani donki nyaan lépmwényu?’ Naate wadéran béné kéga waké béné yo, ‘Némaan Ban dé wani donkiké mawulé yo.’ Waga waké béné yo dérét.”

³² Wani kudi véknutakne bét ye bét vék donki miba lékitaknadaka tédéka.

³³ Vétakne wani donkina baagwi lépmwénybétka de wani donkina yaapa yae de bérét wak, “Samu yaké béné wani donki nyaan lépmwényu?”

³⁴ Naate wadaka bét wak, “Némaan Ban dé wani donkiké mawulé yo.”

³⁵ Naate wabétka kusékétdaka bét donki nyaan kure yék Jisaské. Ye bét bétku baapmu wut las donkina butgulba akutaknak, Jisas waba raduké.

³⁶ Wani donkiba rate yédéka de du taakwa deku baapmu wurét yaabu kusok.

³⁷ Kusodaka dé ye Oliv nébu kulaknyénytakne dawuliye Jerusalem saabaké yadéka déké miték sanévéknukwa wupmalemu du taakwa de déké yéknwun mawulé yate dusék takwasék yak. Yate déknyényba vémaraké yadan apa jébaa védanké sanévéknute de némaanba waate de Gotna yéba kevéréknék. Yate de wak:

³⁸*Naana némaan ban naanéké dé yao.

Némaan Ban Got wadék dé yao. Wan yéknwun.

* **19:38:** Sam 118:26

Got dérét kutkalé yaké dé yo.

Gotna gayéba rakwa du yéknwun mawulé
yate miték raké de yo.

Naané yéknwun mawulé yate awuréba rakwa
ban Gotna yéba kevérékgé naané yo.

39 *Parisina du las wani du taakwa wale tête
véknwute de Jisasnyét wak, “Némaan du, méné
du taakwat waatiké méné yo, de waga némaanba
waamarék yadoké.”

40 Naate wadaka dé derét wak, “Gunat wuné
wakweyo. De kudi bulmarék yadaran matu deku
kapmu wuna yéba kevérékgé de yo.” Naate dé
derét wak.

Jisas Jerusalemba rakwa du taakkaké dé géraak

41 *Jisas ye Jerusalem saabaké yate gayét véte
waba rakwa du taakkaké mawulé lékte dé
géraak.

42 Géraate dé wak, “Bulaa guné Got wale naku-
rak mawulé yate raké kutdénggunu mukatik wan
yéknwun. Bulaa wani mu paakudék guné kaapuk
miték kutdénggunén.

43-44 Guné Got gunat kutkalé yate Setenna
taababa gunat kéraadékwa tuléké kaapuk miték
kutdénggunén. Yagunékwaké kukba guna maama
yaé guna gayé tényéwe téké de yo. Téte de
képmáa vae yégunéran yaabuba taknatépéké de
yo. Yate de gayét wulæ gunat, guna baadir
wawo viyaapéreké de yo. Viyaapérekte akwi
ga yaalébaanké de yo. Yaalébaando ga kaagunén

* **19:39:** Mt 21:14-16 * **19:41:** Lu 13:34-35

akwi matu akére kapmu kapmu raké de yo.”
Naate dé wak.

Gotna kudi buldakwa némaa gaba dé duwat kélésalak

⁴⁵⁻⁴⁶ Jisas ye Jerusalemét wulae dé Gotna kudi buldakwa némaa gat wulaak. Wulæ dé vék du las gwalmu kwayéte yéwaa nyégéldaka. Véte dé derét kélésalate dé wak, “Kéni kudi Gotna nyégaba dé kwao: Got dé wak, ‘Du taakwa wuna gat yaale wuné wale kudi bulké de yo.’ Naate dé Got wak. Wani kudiké guné kaapuk sanévéknwugunékwa. Guné kéni gaba Got wale kaapuk bulgunékwa. Guné gwalmu kwayéte yéwaa nyégélgunéka kéni ga wan sél yakwa du paakwe rakwa ga pulak.” Naate dé derét wak.

Gotna kudi buldakwa némaa gaba dé kudi wak-wek

⁴⁷ Akwi nyaa Gotna kudi buldakwa némaa gaba dé du taakwat Gotna jébaaké yakwatnyék. Yadéka de Gotna gaba jébaa yakwa nyédé duna némaan du, apa kudiké kutdéngkwa du, némaan du las wawo de wak, “Yaga pulak dérét viyaapéreké naané yo?”

⁴⁸ *Waga wate dérét viyaapéreké de yapatik, akwi du taakwa déké yéknwun mawulé yate déku kudi véknwuké mawulé yadan bege.

20

Jisasnyét de waatak, “Kiyadé wak méné wani jébaa yo?”

* **19:48:** Mt 21:46

¹ Nyaa nak dé Jisas Gotna kudi buldakwa némaa gaba téte du taakwat Gotna jébaaké yakwatnyéte Gotna kudi wakwedéka Gotna gaba jébaa yakwa nyédé duna némaan du, apa kudiké kutdéngkwa du, Isrelna kubu du, waga de déké yaak.

² Yae de dérét wak, “Samu apa kérae méné wani jébaa yo? Kiyadé wak méné wani jébaa yo?”

³ Naate wadaka dé derét wak, “Wuné wawo gunat nak kudi waataké wunék. Guné wunat mé wakwe.”

⁴ Kiyadé Jonét wak dé du taakwat gu yaakutakanak? Got dé waga wak, kapu képmaaba rakwa du dé nak waga wak?”

⁵ Naate waatadéka de deku kapmu bulte de wak, “Naané kéga wanaran, ‘Got dé waga wak.’ Naate wanaran dé naanat kéga waké dé yo, ‘Samuké guné déku kudi kaapuk véknwugunén?’

⁶ Naané kéga wanaran, ‘Képmaaba rakwa du dé nak wak.’ Naate wanaran akwi du véknwute naanat rékaréka yate naanat matut viyaaké de yo, Jonké ‘Gotna yéba kudi wakwen du nak’ naadakwa bege.”

⁷ Waga bultakne de yénaa yate Jisasnyét wak, “Naané las kaapuk kudéngnan. Wani muké wakwemarék yaké naané yo.”

⁸ Waga wadaka dé derét wak, “Wuné wawo wakwemarék yaké wuné yo, wunat wadék yae kéni jébaa yawurékwa banké.”

Jisas aja kudi dé wakwek wain yaawiké téségén duké

⁹ Wani kudi watakne dé du taakwat kéni aja kudi wakwek: “Du nak dé wain yaawi nak yak.

Ye dé wain mi tawuk. Ye dé wani yaawiké téségéte yaawiba jébaa yate yéwaa nyégélké mawulé yan duké kwayék. Kwayétakne dé nak képmaat yék. Ye dé wupmalemu kwaaré waba rak.

¹⁰ Radéka misék gélédaran tulé yaaké yadéka dé wale rate déku jébaa yakwa dut nak dé wak, dé yaawiké téségékwa duké yéduké. Dé misék las kwayédo kure yaaduké dé mawulé yak. Yate wadéka déku jébaa yakwa du yédéka de yaawiké téségékwa du déku kudi kaapuk véknwudan. Yate de wani dut viyaate wadaka dé bakna gwaamale yaak.

¹¹ Yaadéka déku jébaa yakwa nak dut wadéka, yédéka, dérét wawo viyaate kapéredi mu yate wadaka dé bakna gwaamale yaak.

¹² Yaadéka déku jébaa yakwa nak dut wawo wadéka, yédéka, dérét némaanba viyaate de dérét kaapat yatjagwadék.

¹³ Yadaka gwaamale yaadéka yaawina bapadu dé wak, ‘Wuné samu yaké wuné yo? Wuné mawulat kapére yawurékwa wuna nyaanét wawuru dé yéké dé yo. Dé ye wadu sal de déku kudi véknwuké de yo?’

¹⁴ Naate watakne dé déku du nyaanét wadéka, yédéka, de yaawiké téségékwa du véte deku kapmu bulte kéga de wak, ‘Yaawina bapadu kiyaadu wani nyaan déku yaapaná gwalmu akwi kéraaké dé yo. Naané dérét viyaapérektakne keni yaawi kéraaké naané yo.’

¹⁵ Waga watakne de dérét kure yaawi kulaknyéntakne kaapat kure gwaade de dérét

vyaapéreknék.” Naate watakné dé Jisas derét wak, “Guné yaga guné sanévéknwu? De waga yadanké wani yaawina bapadu derét samu yaké dé yo?

16 Dé yae wani wain yaawiké téségékwa duwat vyaapéreké dé yo. Viyaapérekne nak duké wani yaawi kwayéké dé yo, de yaawiké téségédoké.”

Waba téen du taakwa wani kudi véknwute de wak, “Kaapuk. De waga yamarék yaké de yo.”

17*Naate wadaka dé derét véte dé wak, “Gotna nyégaba keni kudi dé kwao:

Ga kaakwa du yéknwun matuké sékalte naku-rak matuké kélék yadaka dé bakna rak.

Radéka Got wani matut véte dé wak, ‘Wan yéknwun matu. Wani matu radu ga miték kwaaké dé yo.’ Naate watakné wani matu kéræ taknadéka dé ga miték kwaak.

18*Wani kudiké gunat wuné waato. Kiyadéké dé wo? Wani matu takuba akéreran du deku sépkwaapa kapére yaké dé yo. Wani matu duna sépéba akérédéran wani duwat takupéreké dé yo.” Naate dé Jisas wak. Wani matuké waga wakwete dé déké dé wakwek.

Takis kwayédakwaké dé Jisas kudi wakwek

19*Wani kudi wadéka de apa kudiké kutdéngrkwa du Gotna gaba jébaa yakwa nyédé duna némaan du wawo de kutdéngrkwa, Jisas deké dé wani kudi wakwek. Kutdéngrkwa dérét bari kulékiye kure yéké de mawulé yak. Yate du

* **20:17:** Sam 118:22 * **20:18:** Ais 8:14-15 * **20:19:** Lu 19:47-48

taakwa kélélik yate derét waatimuké wup yate de dérétkuapuk kulékidan.

20 Yate de dérétkuapuk tuléké de raségék. Yate deku mawuléba de wak, “Yénaa yakwa du dé wale kudi bulte kés mu nak muké dérétkuapuk sal dé kaatake kapéredi kudi las waké dé yo? Wadu naané dérétkuapuk Kotimké naané yo. Kotimtakne naané dérétkuapuk Romna duké kwayéké naané yo.” Naate wate de duké las yéwaa kwayéké, de yénaa yate dé wale kudi buldoké.

21 Wani yénaa yakwa du yae de Jisasnyét wak, “Némaan du, méné dérétkuapuk Gotna jébaaké méné yakwatnyu. Méné adél kudi male wakwete dérétkuapuk Gotna kudiké miték méné yakwatnyu. Méné nakurak kudi male méné wakwego némaan du taakwa, bakna du taakwat wawo. Waga naané kutdéngék.

22 Méné waga yate bulaa méné naanat mé wakwe. Naana apa kudi yaga dé wo? Naané takis Romna némaan banké kwayéké naané yo, kapu kaapuk?”

23 Naate wadaka dé Jisas kutdéngék. De deku mawuléba kégá de wak, “Bulaa dé kapéredi kudi wadu naané dérétkuapuk Kotimké naané yo.”

24 Naate wadaka Jisas kutdéngte dé dérétkuapuk, “Guné takis kwayégúnékwa yéwaa nak wunat mé wakwatnyé vewuru.” Naate wadéka de wani yéwaa nak kure yék déké. Kure yédaka dé dérétkuapuk, “Wani yéwaa kwaakwa nyaap wan kiyadéna nyaap? Kiyadéna yé de wani yéwaa kavik?” Naate waatadéka de wak, “Wan Romna némaan bannan.”

25 Naate wadaka dé dérétkuapuk, “Wan adél.

Romna némaan banna mu guné déké kwayéké guné yo. Gotna mu guné Gotké kwayéké guné yo.”

26 Naate wadéka de déku kudiké sajnévéknwu wanévéknwuk. De du taakwana méniba tête kapéredi kudiké dérét kotimké mawulé yate de waga yaké de yapatik, dé kapéredi kudi wak-wemarék yadén bege. Yapatite de kudi kaapuk buldan.

Du kiyaé nébéle raapdaranké de Jisasnyét waatak

27-28* Sadyusina du deku mawuléba de kéga wo, “Kiyaan du taakwa tépa nébéle raapmarék yaké de yo.” Naate de wo. De las Jisaské ye de dérét kéga wak, “Némaan du, méné du taakwat Gotna jébaaké méné yakwatnyu. Méné keni muké naanat mé wakwe. Déknyényba Moses kéga dé kavik: Du nak taakwa ye nyaan kéraamarék ye kiyaadérän déku wayékna wani taakwa yaké dé yo. Yadu nyaan kéraalu wani nyaanké waké dé yo, ‘Wuna némaaduna nyaan.’ Naate waké dé yo. Waga dé Moses kavik.

29 Bulaa mé véknwu. Déknyenyba némaadugu wayéknaje nak taaba sékét nak taababa kayék vétik de rak. Némaadu taakwa ye baadi kéraamarék ye dé kiyaak.

30 Kiyaadéka déku wayékna wani taakwa ye baadi kéraamarék ye dé kiyaak.

31 Kiyaadéka nak wayékna wani taakwa ye baadi kéraamarék ye dé kiyaak. Kiyaadéka akwi wayéknaje waga male ye de akwi baadi kéraamarék ye de kiyaak.

* **20:27-28:** Diu 25:5

³² Yadaka kukba lé wani taakwa wawo kiyaak.

³³ Bulaa naanat mé wakwe. Kiyaan du taakwa tépa nébéle raapdaran tuléké méné wakweyo. Wani tulé wani taakwa kiyadéna taakwa raké lé yo? Déknyényba wani némaadugu wayéknaje akwi de lérét yak.” Naate de Sadyusina du Jisasnyét waatak.

³⁴ Jisas deku kudi véknwute dé derét wak, “Bulaa rakwa du taakwa de kéga yo. Du de taakwa yo. Taakwa de du ro.

³⁵ Kukba Got wadén du taakwa kiyaé nébéle raapme du de taakwa yamarék yado taakwa de du ramarék yaké de yo.

³⁶ Got wadu de déku baadi raké de yo. De Gotna kudi kure giyaakwa du pulak raké de yo. Got wale rate tépa kiyaamarék yaké de yo.

³⁷*Kiyaan du taakwa tépa nébéle raapdaranké naané kutdéngék, Moses wani muké kudi wak-wedén bege. Makwal mi yaa yaanénké wak-wete keni kudi Gotna nyégaba kavidéka gunébu véknwuk: Némaan Ban Got wan Ebrayamna némaan ban. Wan Aisakna némaan ban. Wan Jekopna némaan ban. Dé deku némaan ban dé ro.

³⁸ Moses wani kudi déknyényba kiyaan duké kavidéka naané kutdéngék. Got kiyaan du taakwana némaan ban kaapuk radékwa. Got kulé rakwa du taakwana némaan ban dé ro. Got wadén du taakwa wan kiyaan du taakwa kaapuk. Got wadén du taakwa wan kiyaé nébéle raapme rakwa du taakwa. Waga naané kutdéngék.”

³⁹ Waga wadéka de apa kudiké kutdéngkwa du

* **20:37:** Eks 3:6

las de déré t wak, “Némaan du, méné yéknwun kudi méné wo.”

⁴⁰ Naate watakne de kudi las wawo kaapuk buldan, déré t tépa waatamuké wup yadan bege.

Jisas dé derét waatak Got wadén banké

⁴¹ Wani tulé Jisas dé derét wak, “Apa kudiké kutdéngkwa du de wo, ‘Got wadén ban Krais wan Devitna képmawaara.’ Samuké de waga wo?

⁴²⁻⁴³ *Déknyényba Devit Kraiské kudi las dé kavik Gotna nyégaba. Devit kavin kudiké naané wo, Sam. Wani kudiba keni kudi dé kwao: Némaan Ban Got wuna Némaan Banét dé wak,

‘Méné némaan ban rate wuna yéknwun tuwa taababa raké méné yo.

Raménu wuné wawuru ména maama ména taababa raké de yo.

Rado méné némaan ban rate deké véké méné yo.

Naate dé Got wak.

Gunat wuné wakweyo. Devit wani kudi wakwete dé Kraiské, ‘Wuna Némaan Ban,’ dé naak. Samuké nae dé Devit Kraiské waga wak?

⁴⁴ Devit Got wadén ban Kraiské ‘Wuna Némaan Ban’ naadéka yaga pulak dé Krais Devitna képmawaara ro? Krais Devitna képmawaara rate, Devitna némaan ban wawo dé ro, kapu yaga pulak?” Naate dé déré t waatak.

Apa kudi kutdéngkwa duké dé Jisas kudi wakwek

⁴⁵ Akwi du taakwa wekna rate de Jisasna kudi véknwuk. Véknwudaka dé déku duwat dé kudi wakwek.

* **20:42-43:** Sam 110:1

46 Wawkete dé wak, “Guné apa kudiké kutdéngkwa duké jérawu yaké guné yo. De sémény baapmu wut kusadatakne du taakwa jawudakwa taaléba yeýé yeýaké de mawulé yo. Yeýé yeýate nak du taakwa derét véte kéga wadoké de mawulé yo: ‘Wan naana némaan du dewa yaakwa.’ Naate wadoké de mawulé yo. De Gotna kudi bulnakwa gat wulæ de némaan duna taaléba raké de mawulé yo. De nak du wale kadému kate de yéknwun taaléké sékalte, du taakwana méniba raké de mawulé yo.

47 De dukiyaataakwana gwalmu akwi de kérao. De yénaa yate apakélé kudi Gorét wakweyo, nak du derét véte deku yéba kevérékdoké. Yadak-waké Got wadu apakélé kapéredi mu deké yaaké dé yo.” Naate dé Jisas wak.

21

Gwalmu yamarék dukiyaataakwa lé yéwaa tak-nak

1 Jisas Gotna kudi buldakwa némaa gaba téte dé vék wupmalemu gwalmu yan du taakwa Gotké yéwaa kwayédaka.

2 Védéka gwalmu yamarék dukiyaataakwa nak yae makwal yéwaa vétik Gotké kwayéléka dé vék.

3-4 Véte dé wak, “Wupmalemu gwalmu yan du taakwa de Gotké yéwaa las de kwayék. Kwayédaka deku yéwaa las wawo dé ro deku gaba. Wani taakwa makwal yéwaa vétik kwayéte lé kure ralén yéwaa akwi lé kwayék. Kwayétakne lé kadému kéraaléran yéwaa kaapuk. Gotké

kwayélékwa yéknwun paaté kwayédakwa paatat débu talaknak. Adél wuné gunat wakweyo.”

Gotna kudi buldakwa némaa ga yaalébaandaranké dé wakwek

⁵⁻⁶ *Jisasna du las de Gotna kudi buldakwa némaa gaké bulte de wak, “Kén yéknwun ga. Yéknwun matut de yak. Du taakwa Gotké kwayédan yéknwun gwalmat miték de kusok.” Naate wadaka dé Jisas derét wak, “Bulaa végunékwa gwalmu kukba nak du yae yaalébaanké de yo. Yaalébaante akwi matu kérae yatjadado matu nak matuba kwaamarék yaké dé yo.”

Wupmalemu kapéredi mu yaadéranké dé Jisas wakwek

⁷ Wani kudi wadéka de dérétt waatak, “Némaan du, yani nyaa wani ga yaalébaanké de yo? Samu mu taale yaadu naané véte wani mu yaamale yadéranké kudéngké naané yo?”

⁸ Naate wadaka dé Jisas wak, “Guné jéraru yaké guné yo. Yate yénaa yakwa duna kudi véknwumarék yaké guné yo. Wani kudi wuné wo, wupmalemu du yae de gunat yénaa yaké mawulé yadaran bege. Yénaa yate wuna yéba wakwete de nak nak kéga waké de yo, ‘Got wadén ban Krais bulaa gwaamale yaaké dé yo. Wuné Krais wuné.’ Naate wado guné deku kudi véknwumarék yaké guné yo.

⁹ Wupmalemu du waariyaké de yo. Waariyado nak du waariyadakwaké kudi bulké de yo. Yado

* **21:5-6:** Lu 19:43-44

véknwute guné wup yamarék yaké guné yo. Taale waga yaké de yo. Séséukba yaaran tulé kukba yaaké dé yo.” Naate dé wak.

¹⁰ Watakne dé derét wak, “Nakurak képmaaba rakwa du taakwa de nak képmaaba rakwa du taakwa wale waariyaké de yo. Nak némaan banna kém nak némaan banna kém wale waariyaké de yo.

¹¹ Wupmalemu apu apakélé anyék kutké lé yo. Wupmalemu képmaaba apakélé kaadé yadu apakélé kiyakiya wawo yaké dé yo. Nyétba wup yadakwa kés pulak nak pulak mu yaadu guné véché guné yo.

¹²*“Wani mu wekna yaamarék yadu taale du las, guné wuna du ragunékwaké de wuna jébaaké kélik yate, gunat kulékiye kapéredi mu yaké de yo. Yate de Gotna kudi buldakwa gaba gunat kotimké de yo. De gunat raamény gaba taknaké de yo. Gunat kure yédo guné deku némaan duna méniba téché guné yo.

¹³ De waga yado wani tulé guné derét wuna kudi wakweké guné yo.

¹⁴ Wakwegunéranké guné taale guna mawuléba kéga wamarék yaké guné yo, ‘Naané deku kudi yaga pulak kaataké naané yo?’

¹⁵ Naate wamarék yaké guné yo, wani tulé wuné gunéké yéknwun mawulé, wakwegunérán kudi wawo gunéké kwayéwurérán bege. Wuné waga kwayéwuru wakwegunérán kudi guna maama wakweran kudit talaknaké dé yo. Talakanadu de guna kudi kaataké yapatiké de yo.

* **21:12:** Lu 12:11-12

16 Guna néwepa, guna némaadugu wayéknaje, guna kémna nak du, guna du taakwa waga de gunat maamaké kwayéké de yo. Kwayédo gunat las viyaapérekgé de yo.

17 Guné wuna du ragunékwaké akwi du taakwa gunéké kélík yaké de yo.

18-19 Guné guna mawuléba apa yate wuna jébaa kutsaakugunérən guné wuné wale apuba apuba miték rasaakuké guné yo. Yalakmarék yaké guné yo.”

Jerusalem yaalébaandaranké dé Jisas kudi wakwek

20 *Wani kudi watakne dé Jisas derét kéga wakwek, “Kukba waariyakwa du Jerusalemét tényéwe tédo véte kutdéngré guné yo. Jerusalemét yaalébaandaran tulé keni dé yao.

21 Kutdéngré guné Judiaba rakwa du taakwa guna gayé kulaknyénytakne nébat bari yaage yéké guné yo. Guné Jerusalemba rakwa du taakwa wani gayé kulaknyentyakne bari yaage yéké guné yo. Guné yaawiba tékwa du taakwa wani gayét wulaamarék yaké guné yo.

22 Waga wuné wo, wani tulé wan Got Jerusalemba rakwa du taakwa yadan kapéredi mu derét yakatadérən tulé bege. Déknyényba du las wani muké de kudi las kavik Gotna nyégaba. Wakwewurékwa tulé wani kudi adél yaké dé yo.

23 Wani kapéredi tulé nyaan tékwa taakwa, baadiké munyaa kwayékwa taakwa wawo bari yaage yéké yapatiké de yo. Deké wuné mawulé

* **21:20:** Lu 19:41-44

léknu. Wani tulé Got rékaréka yate wadu wupmalemu kapéredi mu Judana du taakwaké yaaké dé yo.

²⁴ Yaadu maama yae de Judana du taakwat las waariyadakwa kulaat viyaado de kiyaaké de yo. Lasnyét de kulékiye kure ye nak geba taknaké de yo. Ye wani maama nak geba yae de Jerusalemét yaalébaanké de yo. Yaalébaantakne de Jerusalemba némaan du raké de yo. Re Got wadén tulé tépa yéké de yo.

Akwi Du Taakwana Nyaan yaadéranké dé Jisas wakwek

²⁵*“Nyaa, baapmu, nyétba tékwa kun kés pulak nak pulak mu yadu du taakwa véké de yo. Kus némaanba raapte wilu wupmalemu képmaaba rakwa du taakwa véte wup yate géraaké de yo.

²⁶ Yado nyétba tékwa akwi mu ségenté yeyé yeyaké de yo. Yado wupmalemu du taakwa génté wupmét kapére yate sanévéknwu wanévéknwute waké de yo, ‘Yéwe. Samu kapéredi mu dé naanéké yaaké dé yo?’

²⁷*Naate watakne de Akwi Du Taakwana Nyaan wunat véké de yo. Wuné apat kapére yate nyaa vékwa pulak yate buwiba rate giyaawuru véké de yo.

²⁸ Gunat wuné wakweyo. Wani mu batnyé yaadu guné kutdéngké guné yo. Walkamu re wuné gunat kérae Gotna gayét kure yéké wuné yo. Waga kutdéngte guné yéknwun mawulé yate raapme kwaasawuré véké guné yo.” Naate dé Jisas derét wak.

* ^{21:25:} Re 6:12-14 * ^{21:27:} Mt 16:27

Miték sanévéknwudoké dé Jisas kudi wakwek

29 Watakne dé derét kéga wak, “Miké miték mé sanévéknwu.

30 Mi las gaga périye kwény lépidéka véte guné kutdéngék. Kadému naaré yakwa tulé bulaa dé yao.

31 Wani mit véte tuléké kutdénggunékwa pulak, guné wakwewurén mu véte kutdéngké guné yo. Got némaqan ban rate du taakwaké miték védéran tulé keni dé yao. Waga kutdéngké guné yo.

32 Gunat wuné wakweyo. Bulaa rakwa du taakwa las kiyaamarék yate wekna rate wakwewurén akwi mu véké de yo.

33 Nyét képmāa wawo kaapuk yaké dé yo. Wuna kudi kaapuk yamarék yaké dé yo. Rasaakuké dé yo. Adél wuné gunat wakweyo.

Jisasna du déké miték raségédaranké dé derét wakwek

34 *“Guné jérāwu yaké guné yo. Du las wupmalemu kadému kadakwa, waagété gu kate waagété yadakwa, keni képmāana muké male sanévéknwudakwa, waga yate de kaapuk miték sanévéknwudakwa. Guné de yakwa pulak yamarék yaké guné yo. Guné de yakwa pulak yagunérān guné wunéké sanévéknwumarék yagunérān tulé gwaamale yaaké wuné yo.

35 Gwaamale yaawurérān tulé keni képmāaba rakwa akwi du taakwaké bari yaaké dé yo.

36 Guné akwi nyaa wunéké raségéké guné yo. Raségéte guné Gorét apuba apuba waataké guné yo, dé gunéké apa kwayéduké. Waatagunu

* **21:34:** Ro 13:10-14

apa kwayéké dé yo, yaaran kapéredi mu gu-nat yaalébaanmarék yadu guné wuné Akwi Du Taakwana Nyaan wuna méniba miték tégunuké.” Naate dé Jisas derét wak.

³⁷ Akwi nyaa Jisas Gotna kudi buldakwa némaa gaba téte dé Gotna jébaaké du taakwat yakwat-nyék. Yadéka gaan yadéka yéte dé Oliv nébuba kwaak.

³⁸ Yadéka akwi ganbaba akwi du taakwa de Gotna kudi buldakwa némaa gat yék, déku kudi véknwuké.

22

Judas Jisasnyét némaan duké kwayéké nae dé wak

¹ *Yis kutmarék yadakwa bérét kadaran nyaa dé yaaké yak. Wani nyaa de Juda apakélé kadému sérakne kaké de yo. Wani kadémuké de wo Pasova.

² Wani tulé de Gotna gaba jébaa yakwa nyédé duna némaan du, apa kudiké kudéngkwa du wawo waga de Jisasnyét viyaapérekgé mawulé yak. Yate de du taakwa kélík yate waariyamuké wup yate de wak, “Naané Jisasnyét yaga pulak viyaaké naané yo?”

³ *Wani tulé dé Seten Judasna mawuléba wulaak. Déku nak yé Iskariot. Dé wan Jisasna du nak.

⁴ Wulaadéka dé Judas ye dé nyédé duna némaan du, Gotna kudi buldakwa némaa gaké téségékwa

* **22:1:** Eks 12:21-27 * **22:3:** Jo 13:2

duna némaan du wawo de wale dé kudi bulék,
Jisasnyét deké kwayédéranké.

⁵ Buldéka de dusék yate de déké yéwaa las
kwayéké kudi gik.

⁶ Gidaka dé Judas kusékéttakne ye dé Jisasnyét
deké akélak kwayédéran tuléké dé raségék. Wup-
malemu du taakwa Jisas wale ramarék yadaran
tuléké dé raségék.

*Jisasna du vétik bét Pasova waadakwa kadému
kawu saakérak*

⁷ Yis kutmarék yadakwa béret kadakwa nyaa
dé yaak. Wani nyaa de sipsip nyaanét viyao,
Pasova waadakwa tuléna kadémuké.

⁸ Viyaapérekdkwaké sanévéknute Jisas dé
Pita bét Jonét wak, “Béné ye Pasova waanakwa
tuléna kadému kawu saakérabénu naané kaké
naané yo.”

⁹ Naate wadéka bét dérét wak, “Ané yaba kawu
saakératuké méné mawulé yo?”

¹⁰ Naate waatabétka dé wak, “Mé véknwu. Béné
ye Jerusalemét wulae gu tékwa awu yaataran dut
nak véké béné yo. Vété béné déku kukba ye
wulaadéran gat wulaaké béné yo.

¹¹ Wulae béné wani gana bapadut kéga waké
béné yo, ‘Gotna kudiké naanat yakwatnyékwa
ban dé ménat kéga dé wo, Wuné wuna du wale
Pasova waanakwa tuléna kadému kanaran ga
yaba dé tu? Naate dé wo.’

¹² Waga wabénu dé awuréba tékwa némaa ga
wakwatnyéké dé yo. Wani gaba kadému kanaran
jaabé, ranaran mu wawo dé tu. Béné wani gaba
kadému kawu saakéraké béné yo.”

¹³ Naate wadéka bét ye bét Jisas wakwen pulak bét vék. Vétakne bét Pasova waanakwa tuléna kadému kawu saakérak.

Jisas dé déku duké bérét gu wawo dé kwayék

¹⁴ Jisas déku nak du wale yae de akwi de kadému kaké de rak.

¹⁵ Rate dé Jisas derét wak, “Kukba wuné apa kaagél kutké wuné yo. Taale wuné keni kadému, Pasova waanakwa tuléna kadému, guné wale kaké wuné mawulat kapére wunébu yak.

¹⁶ Gunat wuné wakweyo. Wuné keni képmaaba rate guné wale keni kadému tépa kamarék yaké wuné yo. Kukba Got du taakwaké némaan ban raran tulé yaadu wuné tépa kaké wuné yo.”

¹⁷ Naate watakne dé wain gu tén agéráp nak kéræe dé Gorét wak, “Yéknwun gu ménébu tiyaak. Wan yéknwun.” Naate watakne dé déku duwat wak, “Guné kéræe nak nak kaké guné yo.

¹⁸ Gunat wuné wakweyo. Wuné keni képmaaba rate wani gu tépa kamarék yaké wuné yo. Kukba Got du taakwaké némaan ban raran tulé yaadu wuné wani gu tépa kaké wuné yo.”

¹⁹ Naate watakne dé bérét kéræe dé Gorét wak, “Yéknwun mu ménébu tiyaak. Wan yéknwun.” Naate watakne bérét bule dé déku duké kwayéte wak, “Kén wuna sépé. [Gunat kutkalé yaké wuné wuna sépé kwayu. Guné wunéké sanévéknwute waga yasaakuké guné yo.]”

²⁰ Naate watakne de akwi kadému kabutitakne dé Jisas wain gu tén agéráp kéræe waga male yate dé wak, “Kéni wain gu wan wuna wény. De wunat viyaapérekdo wuna wény akudu guné véte

kutdéngké guné yo, Got du taakwat kutkalé yaké wakwedén kulé kudi adél yadéranké.]”

21 *Wani kudi watakne dé Jisas derét wak, “Mé véknwu. Wunat maamaké kwayéran du bulaa dé wuné wale rate kadému ko.

22 *Déknyényba de Gotna nyégaba kudi kavik, maama wunat viyaadaranké. Kavidan pulak de Akwi Du Taakwana Nyaan wunat viyaado wuné kiyaaké wuné yo. Kiyaawuru apakélé kapéredi mu dé wunat maamaké kwayéran duké yaaké dé yo.”

23 Naate wadéka deku kapmu bulte de waatak, “Kiyadé waga yaké yo?”

Némaan banké de Jisasna du waaruk

24 Jisasna du de kudi bulte waaruk. Waarute de wak, “Naané wale rakwa du kiyadé wan naana némaan ban?”

25 *Naate wadaka dé derét wak, “Nak geba rakwa du taakwana némaan du de apa yate deku du taakwaké de vu. Védaka deku du taakwa de deké wo, ‘Wan naanat kutkalé yakwa du.’

26 *Naate wadaka guné wani némaan du pulak yamarék yaké guné yo. Guna du nak némaan ban radéran dé du taakwana kukba yaaran du pulak rate, déku yéba kevérékmorék yaké dé yo. Dé némaan ban rate, dé jébaa yamarék yate bakna rakwa ban pulak ramarék yate, guna jébaa yakwa du raké dé yo.

* **22:21:** Sam 41:9; Jo 13:21-22 * **22:22:** Ap 2:23 * **22:25:** Mt 20:25-28 * **22:26:** 1 Pi 5:1-5

27* Nak geba rakwa du yaga pulak de yo? Deku némaan ban yaga pulak du dé? Rate kadému kakwa ban, kapu déké kadému kure yaawkwete jébaa yakwa ban? Wan rate kadému kakwa ban dé kapmu dé némaan ban ro. Wuné guné wale rate wuné waga kaapuk yawurékwa. Wuné guné wale rate guna jébaa yakwa du wuné ro.

28*“Guné wuné wale gunébu rasaakuk. Kapéredi mu wunéké yaadéka guné wunat kaapuk kulaknyénygunén.

29-30 Wuna yaapa débu apa tiyaak, wuné némaan ban rate du taakwaké miték vewuruké; Tiyaadén apa kéræe wuné gunéké apa kwayéké wuné yo, guné wuné wale rate wuné wale kadému gu kate, Isrelna kém taaba vétik sékét maanba kayék vétikgé némaan du rate végunuké.” Naate dé Jisas déku duwat wak.

Jisas dé wak Pita déké kuk kwayédéranké

31 Jisas dé Saimon Pitat wak, “Saimon, méné mé véknwu. Seten dé gunéké apa yadu guné yaage ye kapmu kapmu rate yalakgunuké dé mawulé yo. De kadému munidakwa pulak dé gunat muniké dé mawulé yo. Seten gunat yaalébaanké dé mawulé yo. Yate Gorét dé waatak, dé waga yadéranké.

32*Wuné Gorét wunébu waatak. Méné, Saimon, ménéké Gorét wunébu waatak, méné wunéké miték sanévéknwuménu ménə mawulé miték tésaakuduké. Tédu méné wunéké kuk tiyae

* **22:27:** Jo 13:12-15 * **22:28:** 2 Ti 2:12; Mt 19:28 * **22:32:** Jo 17:9, 15, 21:15-17

kukba gwaamale yae méné wuna duna mawulat kutkalé yaménu deku mawulé wawo miték tésaakuké dé yo.”

³³ Naate wadéka dé Pita dérét wak, “Némaan Ban, wuné méné wale yéké wuné mawulé yo. Wuné méné wale yéte raamény gaba kwaawuréran wan yéknwun. Wuné méné wale yéte kiyaawuréran wan yéknwun.”

³⁴ Naate wadéka dé Jisas dérét wak, “Pita, wuné kutdéngék. Bulaa gaan séraa waamarék yadu méné apu kupuk kéga waké méné yo, ‘Wuné Jisasnyét las kaapuk kutdéngwurén.’ Waga waménu séraa waaké dé yo.” Naate dé Jisas Pitat wak.

Yéwaa, wut, waariyadakwa kulaa kure yédoké dé wakwek

³⁵* Jisas dé déku duwat kéga wak, “Déknyényba gunat wawuréka yéte guné yéwaa, wut, su kaapuk kure yégunén. Wani tulé gwalmuké nak guné yapatik kapu kaapuk?” Naate wadéka de wak, “Kaapuk.”

³⁶ Naate wadaka dé derét kéga wak, “Bulaa wuné gunat kéga wo. Guné yéwaa kure tégunéran guné yéwaa kure yéké guné yo. Guné wut kure tégunéran guné wut kure yéké guné yo. Waariyagunékwa kulaa yamarék yagunéran guné guna baapmu wut nak kwayétakne yéwaa nyégéle guné waariyagunékwa kulaa kéraaké yo.

³⁷* Wani kudi wuné wo, Gotna nyégaba kwaakwa keni kudi adél yaké yadékwa bege. Wani kudi kéga dé kwao: Déké de wak, ‘Wan

* **22:35:** Lu 9:3 * **22:37:** Ais 53:12; Lu 23:32-33

kapéredi mu yakwa ban. Dérét viyaaké naané yo.' Wani kudi kavite de wunéké de kavik."

³⁸ Naate wadéka de wak, "Némaan ban, méné mé vé. Naané waariyanakwa kulaa vétik naané kure ro." Naate wadaka dé kutdéngék. De déké yaaran kapéredi muké kaapuk miték kutdéngdan. Waga kutdéngte deku kudi kaatate dé wak, "Wan yaak."

Getsemaniba dé Jisas Gorét waatak

³⁹ Wani kudi watakne Jisas gwaade dé Oliv nébat yék, wupmalemu apu déknyényba yadén pulak. Déku du wawo de dé wale yék.

⁴⁰ Ye wani taalé saabe dé derét wak, "Guné Gorét waataké guné yo, dé gunat kutkalé yadu kapéredi mu gunat yaalébaanmörék yaduké."

⁴¹⁻⁴² Naate wadéka de radaka dé matu kwekkére yatjatidaka akérékwa pulak dé walkamu yék. Ye dé kwati yaane Gorét kégo waatak, "Wuna yaapa, méné akwi muké méné apa yo. Yaaran muké waké mawulé yaménéran méné waménu wunéké yaaran kapéredi mu wunéké yaamarék yaké dé yo. Waga ménat wuné waato. Méné mawulé yawurékwa pulak yamarék yaké méné yo. Méné mawulé yaménékwa pulak yaké méné yo."

⁴³ [Naate wadéka dé Gotna kudi kure giyaakwa du nak Gotna gayéba giyae dé déku mawulat kutkalé yak.

⁴⁴ Jisasna wuraanyan kapére yate géndéka dé Gorét tépa waatasakuk. Waatasakudéka dé waagéré wény pulak akwe dé képmaaba akérék.]

⁴⁵ Jisas Gorét waatatakne dé raapme te déku duké yék. Ye dé vék de widé kwaadaka. De némaa

mawulé lékdaka deku mawulé kapére yadéka deku méniba widé yadéka de kwaak.

46 Kwaadaka véte derét waaséligénte dé derét wak, “Guné samuké guné widé kwao? Widé kwaamarék yaké guné yo. Guné raapme Gorét waataké guné yo, kapéredi mu gunat yaalébaanmarék yaduké.”

Judas dé Jisasnyét maamaké kwayé

47 Jisas wani kudi wekna wadéka de wupmalemu du yaak. Jisasna du nak Judas yaabu taalédéka de wani du yaak. Judas Jisasna taama véché (daama réngké) nae dé Jisas téen saabak.

48 Saabadéka dé Jisas dérét wak, “Judas, wan méné Akwi Du Taakwana Nyaan wunat taama véte (daama réngte) méné maamaké kwayu, kapu yaga pulak?”

49 Jisasna du dé wale téte de kutdéngék, deké yaan du Jisasnyét kulékiye kure yédaranké. Waga kutdéngte de Jisasnyét wak, “Némaan Ban, naané derét waariyanakwa kulaat viyaaké naané yo, kapu yaga pulak yanoké méné mawulé yo?”

50 Naate watakne deku du nak dé nyédé duna némaan banké jébaa yakwa dut viyaate déku yéknwun tuwa saknwuba téen waan takutépaktéka dé akérék.

51 Yadéka Jisas véte dé wak, “Yaak. Waga yamarék yaké guné yo.” Naate watakne dé wani duna waanba kutdéka dé tépa yéknwun yak.

52 Nyédé duna némaan du, Gotna kudi bulldakwa némaa gaké téségékwa duna némaan du, Isrelna kubu du, waga de yaak, Jisasnyét kulékiye kure yéké. Yae Jisas waga yadéka vétakne

tédaka dé Jisas derét wak, “Guné wunat kulékiké yaate samuké guné waariyagunékwa kulaa baagé wawo kure yao? Guné sél yakwa dut viyaaké guné wani mu kure yao, kapu yaga pulak?

⁵³ *Wupmalemu nyaa wuné Gotna kudi buldakwa némaa gaba guné wale wuné rak. Rawuréka guné wunat kaapuk kulékigunén. Bulaa guné guna jébaa yaké guné yo. Bulaa gaankétéké rakwa némaan ban Seten apa yaké dé yo.”

Pita dé wak, “Wuné Jisasnyét las kaapuk kutdéngwurén”

⁵⁴ Jisas wani kudi wadéka de dérét kulékiye kure yék. Kure ye de nyédé duna némaan ban déku gat kure wulaak. Wulaadaka dé Pita deku kukba ye dé séknaaba ték.

⁵⁵ Tédéka de Jisasnyét kure yén du las raatmu gisagwadédan taalat wulæ kaapaba rate de yaa séraknék. Séraktakne radaka dé Pita de wale yaaba rak.

⁵⁶ Radéka lé jébaa yakwa taakwa nak dérét vék. Véte déku ménidaamat vésék naate lé wak, “Kéni du wawo Jisas wale dé ték.”

⁵⁷ Naate waléka dé Pita wak, “Nyéna, wuné dérét las kaapuk kutdéngwurén.”

⁵⁸ Naate wadéka walkamu re kukba dé du nak dérét véte dé wak, “Méné wawo Jisasna du méné.” Naate wadéka dé wak, “Ména, wuné kaapuk.”

⁵⁹ Naate wadéka walkamu re kukba dé du nak wawo dérét véte dé némaanba wak, “Kéni du

* **22:53:** Lu 19:47-48

wawo dé Galiliba yaan du dé. Dé wawo dé Jisas wale ték. Wan adélna.”

⁶⁰ Naate wadéka dé Pita wak, “Ména, wuné bulménékwa kudiké las kaapuk kudéngwurén.” Waga wekna wadéka dé séraa nak bari waak.

⁶¹ *Waadéka dé Némaan Ban Jisas séknaa pulakba téte walaakwe dé Pitat vék. Védéka dé Jisas dérét taknaba wakwen kudiké dé sanévéknwuk. Taknaba Jisas dé dérét wak, “Wuné kudéngék. Bulaa gaan séraa waamarék yadu méné apu kupuk waké méné yo, ‘Wuné Jisasnyét las kaapuk kudéngwurén.’ Waga waménu séraa waaké dé yo.”

⁶² Wani kudiké sanévéknwute Pita gwaade némaa mawulé lékte dé géraak, dé Jisaské kuk kwayédén bege.

Jisasnyét waagite wasélékte de dérét viyaak

⁶³ Jisasnyét kurén du dérét waagite wasélékte de dérét viyaak.

⁶⁴ Viyaate déku méniba baapmu wurét gitakne de dérét wak, “Méné Gotna yéba kudi wak-wekwa du rate méné akwi muké méné kudéngék. Kudéngte, naanat mé wakwe. Kiyadé ménat viyaak?”

⁶⁵ Naate wate de wupmalemu kapéredi kudi las wawo dérét wak.

Jisas Isrelna némaan duna méniba dé ték

⁶⁶ Nyaa yaaladéka de Isrelna kubu du, nyédé duna némaan du, apa kudiké kudéngkwa du waga yae de jawuk. Jawe radaka de Jisaské

* **22:61:** Lu 22:34

téségékwa du dérét kure yaak deké. Kure yaadaka dé deku méniba ték.

67 *Tédéka de dérét wak, “Méné naanat mé wakwe. Méné Got wadén ban Krais, kapu kaapuk?” Naate wadaka dé derét wak, “Wuné gunat wakwewurérán guné miték véknwumuké kélík yaké guné yo.

68 Wuné gunat kudi waatawurérán guné wuna kudi kaatamuké kélík yaké guné yo.

69 *Kukba wuné Akwi Du Taakwana Nyaan némaan ban rate, apat kapére yakwa ban Gotna yéknwun tuwa taababa raké wuné yo.”

70 Naate wadéka de akwi wak, “Yaga méné wo? Méné Gotna nyaan méné ro, kapu kaapuk?” Naate wadaka dé wak, “Ao. Guné kapmu guné waga wak.”

71 Waga wadéka de wak, “Déku kapmu dé kapéredi kudi wakwedéka naanébu véknwuk. Véknwutakne naané yadén muké kudi las wawo véknwumarék yaké naané yo.” Naate de Isrelna némaan du wak Jisaské.

23

Jisas Pailatna méniba dé ték

1 Wani némaan du de akwi raapme de Jisasnyét Romna némaan du déku yé Pailatké kure yék.

2 *Kure ye de Jisaské dérét kéga wak, “Kéni du dé kapéredi muké naana du taakwat yakwatnyék. Naanat débu wak, ‘Guné Romna némaan banké takis kwayémarék yaké guné yo.’ Naate wate dé

* **22:67:** Jo 10:24-26 * **22:69:** Ap 7:56 * **23:2:** Lu 20:20-26

wak, ‘Wuné némaan ban wuné ro. Wuné Got wadén ban Krais wuné.’ Naate wadéka dérétt ménéké naanébu kure yaak.”

³ Naate wadaka dé Pailat Jisasnyét waatak, “Méné Judana némaan ban, kapu yaga pulak?” Naate wadéka dé Jisas wak, “Ao. Méné kapmu méné waga wak,”

⁴ Naate wadéka dé Pailat nyédé duna némaan du, de wale tén wupmalemu du béré taakwa bérat wawo dé wak, “Kéni du kapéredi mu las kaapuk yadén. Waga wuné kutdéngék.”

⁵ Waga wadéka de némaanba waate de wak, “Déku kudi Judiaba rakwa akwi du taakwat wak-wedéka de miték ramarék yate waariyaké de mawulé yo. Taale Galiliba kudi wakwetakne bulaa kénét yae dé naanat waga wakweyo.”

Jisas Yerotna méniba dé ték

⁶ Pailat wani kudi véknutakne dé derét waatak, “Kéni du kén Galilina du, kapu yaga pulak?”

⁷ Naate wadéka de kusékérék. Kusékétdaka Pailat dé kutdéngék. Déknyényba Romna némaan ban wadéka dé Yerot némaan ban dé rak Galilina taaléba. Jisas Galilina du radéka Yerot Jisaské dé némaan ban rak. Wani tulé Yerot wawo Jerusalemba dé rak. Waga kutdénge Pailat wadéka de Jisasnyét kure yék Yerotké.

⁸ *Déknyényba Yerot Jisaské kudi véknutakne dérétt véké dé mawulé yak. Wupmalemu baapmu re Jisasnyét vémarrék yadéka wani tulé dérétt déké kure yaadaka dé Yerot véte dé dusék yak. Jisas

* **23:8:** Lu 9:9

déknyényba vémarék yadén apa jébaa nak déku méniba yaduké mawulé yate dé dusék yak.

⁹ Yate dé Jisasnyét wupmalemu muké waatak. Waatadéka Jisas déku kudi las kaapuk kaatadén.

¹⁰ Yadéka de nyédé duna némaan du, apa kudiké kutdéngkwa du waho waba téte de némaanba Jisasnyét waatite Yerotnét kapéredi kudi wakwek Jisaské.

¹¹ Wakwedaka Jisas Yerotna kudi kaatamarék yadéka dé Yerot déku du wale de Jisasnyét waagite waséléknék. Déké “Gweba du” naate dé Yerot dérét waagite waséléknék. Yate dé wak, “Du taakwana némaan ban dé yéknwun baapmu wut male dé kusado.” Naate wate dé wadéka de yénaa yate yéknwun baapmu wut kérae Jisasnyét kusadatakne dérét waagite, dérét de gwaamale kure yék Pailatké.

¹² Déknyényba Pailat Yerotna maama dé rak. Pailat Yerotna yéba kevérékte wadéka Jisasnyét Yerotké kure yédan tulé, Yerot wani muké dusék yate dé Pailat wale nakurak mawulé yate bét miték rak.

Jisasnyét miba viyaapata taknadoké dé Pailat wak

¹³ Pailat wadéka de nyédé duna némaan du, Isrelna némaan du wupmalemu du taakwa waho yae de jawuk.

¹⁴ Jawudaka dé derét wak, “Guné keni dut wunéké kure yae guné wak, ‘Dé du taakwana yéknwun mawulé dé yaalébaanu. Dé wupmalemu kapéredi mu débu yak.’ Naate wagunéka wuné guna méniba téte wuné dérét wani muké waatak.

Waatatakne wuné gunat kéga wo. Dé wakwe-gunén kapéredi mu las kaapuk yadén.

¹⁵ Yerot wawo waga male dé wo. Waga wadék de dérét gwaamale kure yaak wunéké. Mé véknwu. Naané dérét viyaapérekmarék yaké naané yo, kapéredi mu las yamarék yadén bege.

¹⁶ Wuné wawuru wuna du dérét bakna male viyaado dé miték yéké dé yo.”

¹⁷ [Akwi kwaaré Pasova kadému kadakwa tulé dé Romna némaan du raamény gaba kwaakwa dut nak wadéka dé raamény ga kulaknyéntakne dé miték yék.]

¹⁸ Pailat wani kudi wadéka de waba téen du taakwa de akwi némaanba kéga waak, “Wani dut viyaapérektakne méné Barabasnyét waménu dé raamény ga kulaknyéntakne yaale miték yéké dé yo.”

¹⁹ Déknyényba wani du Barabas Romna duké kélék yate Jerusalemba rakwa du taakwat wak-wedéka de Romna du wale waariyak. Nak apu Barabas dut nak dé viyaapéreknék. Waga yadéka de dérét raamény gaba taknadaka dé waba kwaak.

²⁰ Waba téen du taakwa waga waadaka dé Pailat Jisas miték yéduké dé mawulé yak. Yate dé derét tépa wak, Jisas miték yédéranké.

²¹ Wadéka de kélék yak. Yate de némaanba waate de wak, “Dérét miba mé viyaapata takna. Dérét miba mé viyaapata takna.”

²² Naate wadaka dé derét tépa wak, “Samuké? Samu kapéredi mu dé yak? Naané dérét viyaapérekmarék yaké naané yo, kapéredi mu las

yamarék yadén bege. Wuné wawuru wuna du déréti viyaado dé miték yéké dé yo.”

²³ Naate wadéka de kélík yate némaanba waate de wak, dé wadu de Jisasnyét miba viyaapata taknadoké. Waga wate de Pailatna kudi kaapuk véknwudan.

²⁴ Yadaka dé Pailat kusékéttakne dé de wan pulak yak.

²⁵ Yate dé wadéka mawulé yadan du Barabas raamény ga kulaknyéntakne gwaade dé miték yék. Déknyényba Barabas Romna duké kélík yate, du taakwat wakwedéka de Romna du wale waariyak. Nak apu Barabas dut nak dé viyaapéreknék. Waga yadéka de déréti raamény gaba taknadaka dé waba kwaak. Pailat Barabas miték yéduqué watakne dé wak, de Jisasnyét miba viyaapata taknadoké.

Jisasnyét de miba viyaapata taknak

²⁶ Romna waariyakwa du Jisasnyét kure yéte de vék Sairiniba yaan ban déku yé Saimon Jerusalemét wulaaké yadéka. Véte déréti kulékiye de wak, dé Jisasnyét viyaapata taknadaran mi yaate Jisasna kukba yéduqué. Wadaka yaate dé de wale yék.

²⁷ Yédaka de wupmalemu du taakwa de Jisasna kukba yék. Yéte de taakwa las némaa mawulé lékte de déké némaanba géraak.

²⁸ Géraadaka Jisas walaakwe dé derét wak, “Guné Jerusalemba rakwa taakwa, guné wunéké géraamarék yaké guné yo. Guné guna sépéqué, guna baadiké wawo géraaké guné yo.

29 Kapéredi tulé yaadu du taakwa kéga waké de yo, ‘Kéni kapéredi tulé taakwa deku nyaanké de némaa mawulé léknu. Lékdakwaké sanévéknwute nyaan kéraaké yapatikwa taakwa, nyaan kéraamarék yan taakwa, baadiké munyaa kwayémárék yan taakwa, wani taakwa yéknwun mawulé yaké de yo, kéni kapéredi tulé deku nyaan ramarék yadaran bege.’ Naate waké de yo.

30* Wani kapéredi tulé du taakwa deké yaaran kapéredi muké wup yate kéga waké de yo, ‘Nébu dé mé akére naanat saaptépu.’ Naate waké de yo.

31 Wuné kapéredi mu las kaapuk yawurén. De wunat kéni kapéredi mu bakna yadaran yaga pulak yaké de yo, Jerusalemba rate kapéredi mu yakwa du taakwat? Derét wupmalemu kapéredi mu yaké de yo.” Naate dé Jisas wani taakwat wak.

32 Kapéredi mu yan du vétiknét wawo de waariyakwa du kure yék. Bérét Jisas wale viyaapéreké nae de kure yék.

33 Kure ye de Maakna Apa waadakwa taalé saabak. Saabe waba de Jisasnyét miba viyaapata taknak. Yatakne de wani kapéredi mu yan du vétiknét wawo mi vétikba viyaapata taknak. Naknét de Jisasna yéknwun tuwa saknwuba viyaapata taknak. Naknét de déku aki tuwa saknwuba viyaapata taknak.

34* Jisasnyét miba viyaapata taknadaka dé Jisas wak, “Wuna yaapa, méné wunat yadakwa kapéredi muké sanévéknwumarék yate méné derét yakatamarék yaké méné yo. De yadakwa muké kaapuk kutdéngdan.” Naate dé wak.

* **23:30:** Re 6:16 * **23:34:** Sam 22:18; Mt 5:44

Jisasnyét miba viyaapata takne de rate déku baapmu wut muniké de makwal matu yatjawurék. Yatjawurédaka waare giyaa akére derét talaknan ban dé déku baapmu wut kéraak.

³⁵*Yadaka de du taakwa téte de vék. Védaka de Isrelna némaan du Jisasnyét waagite wasélékte de wak, “Dé nak duwat dé kutkalé yak. Dé naanat kutkalé yaduké Got wadén ban Krais radérén déku kapmu déku sépat kutkalé yaké dé yo.”

³⁶*Naate wadaka de waariyakwa du wawo dérétt waagite wasélékte déké yae nyégi yakwa wain gu de kwayék.

³⁷Kwayéte de wak, “Méné Judana némaan ban raménérén méné ména kapmu ména sépat kutkalé yaké méné yo.”

³⁸Jisasnyét viyaapata taknadan mi awuréba kaviye taknadan kudi wan kéga: Kéni du kén Judana némaan ban.

³⁹Jisas wale miba viyaapata taknadan du nak dé Jisasnyét waatite dé wak, “Méné méné wak, méné naanat kutkalé yaménuké Got wadén ban raménékwaké. Méné adél kudi wakweménérén bulaa ména kapmu ména sépat kutkalé yate anat wawo mé kutkalé ya.”

⁴⁰Naate wadéka dé Jisas wale miba viyaapata taknadan nak du dérétt waatite dé wak, “Jisas kiyaadérén pulak méné kiyaaké méné yo. Yate Gotké wup yamarék yate méné wani kapéredi kudi wakweyo, kapu yaga pulak?

⁴¹Kapéredi mu yaténké de anat viyaapérekdaran wan yéknwun. Kéni du kapéredi

* **23:35:** Sam 22:7-8 * **23:36:** Sam 69:21

mu las kaapuk yadén.”

42 Naate watakne dé wak, “Jisas, méné apa yate du taakwaké némaan ban raké gwaamale yaate méné wunéké sanévéknwuké méné yo.”

43 Naate wadéka dé Jisas wak, “Bulaa méné wuné wale yéknwun taaléba raké méné yo. Adél wuné ménat wakweyo.” Naate dé Jisas dérét wak.

Jisas débu kiyaak

44-45 *Nyaa nawurédéka dé akwi képmaaba gaan yak. Ye tétréka nyaa kaapuk védén. Kukba nyaa tégéruewe dawuliké yadéka dé Gotna kudi buldakwa némaa gaba lékitaknadan sémény baapmu wut nyédéba gétbiyae dé taakwi vétik yak.

46 *Yadéka dé Jisas kégä némaanba waak, “Wuna yaapa, wuna wuraanyan ména taababa wuné takno.” Waga watakne dé kiyaak.

47 Kiyaadéka dé waariyakwa duna némaan du véte Gotna yéba kevérékte dé wak, “Wani du wan yéknwun mu male yan du. Wan adél.” Naate dé wak.

48 Wani mu véké yae jawe téen akwi du taakwa Jisas kiyaadéka véte némaa mawulé lékte de deku gayét gwaamale yék.

49 Yédaka Jisasnyét kutdéngén du, taakwa las wawo waga de séknaa pulak téte de wani mu yadéka de vék. Déknyényba Jisas Galili kulaknyéntakne yédéka de wani taakwa dé wale de yaak.

* **23:44-45:** Lu 18:31; Yi 9:2-3, 6-8 * **23:46:** Sam 31:5

Jisasna gaaba ségwí matuba vaadan waaguba de taknak

⁵⁰⁻⁵¹ Arimatiaba yaan du dé nak rak. Déku yé Josep. Déku gayé wan Judana gayé nak. Dé yéknwun mu male yakwa du rate, dé Got némaan ban rate du taakwaké vérān tuléké dé raségék. Déknyényba dé kubu du rate nak kubu du wale jawe rate, Jisasnyét viyaapéreké buldan kudiké kaapuk kusékétdén.

⁵² Dé Romna némaan du Pailatké ye dé Jisasna gaaba ségwí kéraaké waatak.

⁵³ Waatadéka dé kusékétdéka ye dé Jisasna gaaba ségwí lépmwénye kure giyae dé waama baapmu wurét kusépmé dé waaguba nak taknak. Déknyényba wani waagu déku jébaa yakwa du de matuba vaakére wulaak. Déknyényba wani waaguba kiyaan dut nak kaapuk taknadán.

⁵⁴ Garabu dé Josep Jisasna gaaba ségwí waaguba taknak. Judana yaap ra nyaa yaaké yadéka dé Josep waga yak.

⁵⁵ Galiliba Jisas wale yaan taakwa de Josepna kukba ye de vék dé Jisasna gaaba ségwiba yéknwun yaama yakwa mu kutmarék ye bakna taknadéka. Taknadén taalé wawo de vék.

⁵⁶ Vétakne gayét gwaamale ye de gaaba ségwiba kutké nae yéknwun yaama yakwa mu kawu saakérak.

Yaap ra nyaa de Moses wakwen apa kudi wadén pulak de yaap rak.

24

Jisas dé tépa nébéle raapmék

1 Yaap ra nyaa yédéka Sande ganbaba nyaa yaalaké yadéka wani taakwa de kawu saakéradan yéknwun yaama yakwa mu kéræe kure de yék. Jisasna gaaba ségwi taknadén taalat de yék.

2 Ye de vék waaguba taknatépédan matu yatbal-aaku taknadaka radéka.

3 Vétakne de waaguba wulæ de Némaan Ban Jisasna gaaba ségwi radéka kaapuk védan.

4 Yatakne wani muké sanévéknwu wanévéknwute waba tédaka du vétik bari giyae bét de wale ték. Bétku baapmu wut waamat kapére yate dé kayénarék.

5 Tébétka de wup yate de kwati yaane deku ménidaama képmaaba taknak. Taknadaka bét wak, “Samu yaké guné kiyaan duna taaléba nébéle raapme rakwa duké sékalu?

6 *Dé kéba kaapuk radékwa. Débu tépa nébéle raapmék. Dé Galiliba wekna rate gunat wak-wedén kudiké sanévéknwuké guné yo.

7 Dé kéga dé wak, ‘De Akwi Du Taakwana Nyaan wunat kapéredi mu yakwa duké kwayédo de wunat miba viyaapata taknado wuné kiyaawuru nyaa kupuk yédu tépa nébéle raapké wuné yo.’ Naate wadén kudiké sanévéknwuké guné yo.”

8 Bétku kudi véknutakne de wani taakwa Jisas déknyényba wakwedén kudiké sanévéknwuk.

9 Sanévéknwute de gaaba ségwi taknadan waagu kulaknyénytakne de tépa gwaamale yék. Ye de Jisasna du taaba vétik sékét maanba kayék nakurak derét wani muké wakwek. Jisasna

* **24:6:** Lu 9:22, 18:31-33

jébaaba yaalan nak du taakwat wawo de wakwek wani muké.

10 *Jisasna duwat wani kudi wakwen taakwa wan Makdalaba yaan taakwa Maria, Joana, Jemsna néwaa Maria, taakwa las wawo.

11 De wani kudi wakwedaka de Jisasna du wak, “Wan yénaa de yo. Wan yaamabi kudi male de bulu.” Naate watakne de deku kudi kaapuk véknwudan.

12 [Yadaka dé Pita raapme dé Jisasna gaaba ségwi taknadan taalat pétépétré yék. Ye kwaatabe kwaasawule dé vék gaaba ségwi kusépdañ baapmu wut male radéka. Vétakne déku gat gwaamale ye dé wani muké sanévéknwu wanévéknwuk.]

Jisasna du vétik Emeasnyét yéte bét Jisasnyét vék

13 Wani nyaa bét déknyényba Jisas wale ye yé yeyan du vétik Emeasnyét yédakwa yaabuba yék. Du Jerusalem kulaknyéntakne wani gayét yéte séknaa pulak yéké de yo (11 kilomita).

14 Bét yéte bét Jisas kiyaadénké kudi bulte déké taakwa wawedan muké wawo bét kudi bulék.

15 Bulte yébétka dé Jisas kapmu yae dé bét wale yék.

16 Yédéka dérét véte bét dérét kaapuk kutdéngbérén.

17 Yabétka dé bérét wak, “Béné samuké béné bulkére yu?” Waga wadéka bét Jisas kiyaadénké sanévéknwute némaa mawulé lékte bét ték.

* **24:10:** Lu 8:2-3

18 Téte du nak déku yé Kliopas dé déku kudi kaatate dé wak, “Nak geba yaan wupmalemu du taakwa Jerusalemba bulaa rate de kutdéngék yadan muké. Méné, nak geba yaan du, méné kapmu keni tulé Jerusalemba yadan muké kutdéngmarék yak, kapu yaga pulak?”

19 *Wani kudi wadéka dé Jisas bérét waatak, “Samu mu de yak?” Naate wadéka bét kwatkwa téte dérét wak, “Nasaret ban Jisasnyét de wani mu yak. Dé wan Gotna yéba kudi wakwen du nak. Dé Gotna méni wupmalemu du taakwana méniba wawo téte dé kubusaaku apa jébaa yate némaa kudi wakwek.

20 Yadéka de Gotna gaba jébaa yakwa nyédé duna némaan du, naana némaan du wawo dérét de kwayék Romna duké, de dérét viyaapérekdoké. Kwayédaka de dérét miba viyaapata taknadaka dé kiyaak.

21 *Déknyényba naana mawuléba kéga naané wak, ‘Wani du naané Isrelna du taakwa naanat kéræe naanat kutkalé yaké dé yo.’ Naate wanaka de dérét viyaapéreknék. Wani muké kudi bulte keni muké wawo ané bulu. Déknyény de Jisasnyét viyaapérekdaka nyaa vétik yédéka bulaa nyaa kupuk dé yo.

22 *Nak muké wawo ané kudi bulu. Bulaa naané wale Jisasna jébaaba yaalan taakwa las kudi wakwedak naané kwagénu. Ganbaba de déku gaaba ségwit taknadan taalat de yék.

23 Ye de déku gaaba ségwit kaapuk védan. Yatakne gwaamale yae de naanat kéga wak,

* **24:19:** Ap 13:27 * **24:21:** Lu 1:68, 2:25; Ap 1:6 * **24:22:** Lu 24:1-11

‘Naané ye Gotna kudi kure giyaakwa duwat vénaka bét kéga wak, Dé débu tépa nébélé raapmék. Naate bét wak.’

²⁴ Wani taakwa yae naanat waga wadaka de naana du las yék, Jisasna gaaba ségwi taknadan taalat. Ye de wani taakwa wakwen pulak vék. Véte Jisasnyét las kaapuk védan.’

²⁵ Wani kudi wabétka dé Jisas bérét wak, “Béné las kaapuk miték sanévéknwubénékwa. Béna mawulé miték témarék yadéka béné Gotna yéba déknyényba kudi wakwen duna kudi walkamu male béné miték véknwu.

²⁶ Wani du de kéga wak, ‘Taale kapéredi mu Got wadén ban Kraiské yaadu kukba dé némaan ban radu de déku yéba kevérékgé de yo.’ Naate wadan kudi béné kaapuk miték véknwubénén.”

²⁷* Naate watakne dé Moses déké kavidén kudi, Gotna yéba kudi wakwen akwi du déké kavidan kudiké wawo dé bérét kudi wakwek.

²⁸ Yaabuba yéte bét yérən gayé de saabaké yak. Ye saabe dé Jisas tépa yéké dé yak.

²⁹ Yadéka bét dérét wak, “Nyaa dawulidu gaan yaamale yaké dé yo. Yadu méné ané wale raké méné yo.” Naate wabétka dé wulæ dé bét wale rak.

³⁰ Rate kadému kaké yate dé bérét kéræ dé Gorét wak, “Yéknwun kadému ménébu tiyaak naanéké. Wan yéknwun.” Waga watakne dé bérét bule dé bétké kwayék.

³¹* Kwayédéka bét bari dérét kutdéngék. Kutdéngbétka dé waba kaapuk radén. Bét dérét

* **24:27:** Ais 53:12; Sam 22:1-21

* **24:31:** Lu 24:16

kaapuk v b r n.

³² Yate b t kudi bulte k g  wak, “An  yaabuba y t k  d  Gotna ny g ba kwaakwa kudik  anat wakwed k , d  ana mawul  y knwun yak. Wan ad l.”

³³ Naate watakne bari raapme b t Jerusalem t t p  gwaamale y k. Ye b t v k Jisasna du taaba v tik s k t maanba kay k nakurak, d ku j ba ba yaalan nak du taakwa wale jawe radaka.

³⁴ V b t k  de b r t wak, “Naana N ma n Ban d bu t p  n b le raapm k. Wan ad l. N b le raapd k  Saimon d bu d r t v k.”

³⁵ Waga wadaka b t yaabuba y te Jisas b tk  yaad nk  b t kudi wakwek. Jisas b t wale rate b ret bul d k  wani tul  male d r t kutd ngb r nk  wawo b t der t kudi wakwek.

Jisas d ku duk  yaad k  de d r t v k

³⁶ B t wani kudi wekna wakweb t k  d  Jisas d ku kapmu yae d  deku ny d ba t k.

³⁷ T d k  de kwag nte wup yate de deku mawul ba wak, “Wan gaababan t naan  vu.”

³⁸ Naate wadaka d  der t wak, “Samuk  gun  kwag nu? Samuk  gun  guna mawul ba san v knwu wan v knwu?

³⁹ Wuna maan taabat v te raam ny t viyaadan m  v . V te gun  kutd ngk  yo. K n wun  wun  tu. Wunat kutte gun  v k  yo. V te gun  kutd ngk  yo. Gaababan kaapuk. K n wun  wun  tu. Gaababan de s p k wa pa kwaami kaapuk kure t d k wa, wun  kure t k wa pulak. K n wunat gun  vu.”

40 [Naate watakne déku maan taaba dé derét wakwatnyék, de raaményét viyaadan védoké.]

41 Jisasna du dérét véte de sanévéknwu wanévéknwuk. Yate yéknwun mawulé yate dusék yate de deku mawuléba wak, “Yaga pulak? Kén kiyae nébéle raapmén ban Jisas, kapu kiyadé?” Waga sanévéknwudaka dé derét waatak, “Guné kéba kadému las guné taknak?”

42 Naate waatadéka de tuwe taknadan gukwami déké kwayék.

43 Kwayédaka dé nyégéle kadéka de vék.

44 Wani gukwami katakne dé derét wak, “Déknyényba wuné guné wale rate gunat wuné kéga wakwek, ‘Déknyényba Moses wunéké kudi wakwedéka, Gotna yéba kudi wakwen du wawo wunéké de kudi wakwek. Déknyényba gwaaré waan du, deku gwaaréké naané wo Sam, de wawo de wunéké wakwek. Wakwedaka deku kudi Gotna nyégaba dé kwao. Wunéké kavidan kudi akwi adél yaké dé yo.’ Naate wawuréka bulaa wani kudi adél débu yak.”

45 *Naate watakne dé deku mawulat kutkalé yak, de Gotna nyégaba kwaakwa kudiké miték kutdéngdoké.

46 Yate dé derét wak, “Gotna nyégaba keni kudi dé kwao: Got wadén ban Krais apa kaagél kure kiyaaké dé yo. Kiyaadu nyaa kupuk yédu tépa nébéle raapké dé yo.

47 Déku du déku yéba keni kudi wakweké de yo nak du taakwat: ‘Guné yagunén kapéredi muké kélék ye kulaknyényunu, Got yagunén kapéredi

* **24:45:** Lu 24:27

mu yatnyéputiké dé yo.’ Wani kudi Jerusalemba rakwa du taakwat batnyé wakwete de nak geba rakwa du taakwa, akwi képmaaba rakwa du taakwat wawo wani kudi wakweké de yo.

48 Guné wani mu akwi gunébu vék.

49 *Déknyényba wuna yaapa kéga dé wak, ‘Kukba wuna Yaamabi gunéké kwayéké wuné yo. Wan adél.’ Naate wadénké wuné wawuru wuna yaapania Yaamabi guna mawuléba wulæ téké dé yo. Taale guné Jerusalemba déké raségéké guné yo. Raségégunu Gotna Yaamabi awuréba giyae gunéké apa kwayédu guné nak get yéké guné yo.”

Got wadéka dé Jisas Gotna gayét waarek

50 Wani kudi watakne dé Jisas derét kwole Jerusalem kulaknyéntakne walkamu ye de Betanit yék. Ye Betani saabe dé déku taaba kusawuréte dé Gorét waatak, dé derét kutkalé yaduké.

51 Wekna waatake derét kulaknyéndéka dé Got dérét déku gayét kure waarek.

52 *Waarédéka de yéknwun mawulé yate duséknét kapére yate de Jerusalemét gwaamale yék.

53 Ye akwi nyaa Gotna kudi buldakwa némaa gaba téte de Gotna yéba kevéréknék.

* **24:49:** Jo 15:26, 16:7 * **24:52:** Jo 14:28

Gotna Kudi
The New Testament in the Maprik dialect of the
Ambulas Language
Nupela Testamen long tokples Maprik long Niugini
copyright © 1983 Wycliffe Bible Translators, Inc.

Language: Ambulas (Maprik) (Ambulas)

Dialect: Maprik

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-04

PDF generated using Haiola and XeLaTeX on 18 Apr 2025 from source files
dated 31 Aug 2023

b436d84b-26dc-54d0-bff0-26a2d25c90de